

Ubuwuzi Butangaje
Vol. I

HARIMENSHI Alexis

Bujumbura, Gitugutu 2005

Ibirimwo

Urupapuro

Ijambo ryo gushikiriza	7
Intangamarara	8

Ibigize inyama n'ingaruka zavyo	12
1. <i>Indemamubiri</i>	12
- Igikorwa c'indemamubiri	12
- Aho indemamubiri ziva	17
2. <i>Ibinure</i>	27
- Ibinure binovu	27
- Iciza c'ibinure vyoroshe mu mubiri	36

Kugira ngo mbe mfunguye neza	38
Intete	38
Imboga	40
Ivyamwa	45
Indunduro	50
Norya ibingana gute ?	51
Norya ryari ?	53
Norya kangahe ku musi ?	54
Infungurwa zo kugirwa nyambere	59
Soya	59
Ibiharage vyumye	71
Sezame	75
Inazi	80
Ingano	87
Ibiraya	100
Ivoka	107

AMATEGEKO UMUNANI Y'UBUGOROZI BW'IVY'AMAGARA

113

Imirire	114
Indya ni iki ?	114
Twomenya gute imfungurwa zibereye ?	115
Tworya ibingana gute ?	118
Tworya ryari ?	121
Ku barya kabiri ku musi	123
Ku barya gatatu ku musi	123
Imyimenyerezo ngororamubiri	126
Uko ibihimba vy'ihumekero bikora	128
Imyimenyerezo ngororamubiri ibereye	131
Amazi	135
Uruhara rw'amazi mu mubiri	140
Nonywa amazi angana gute kandi ryari ?	142
Amazi yinjira mu mubiri ku musi	143
Uko amazi akora mu mubiri	146
Kunyoterwa kuza gute ?	146
Iyo amazi akeshe	148
Urugero rw'amazi ufatiye ku vyo umuntu akora	149
Igikorwa c'amazi ku rukoba	151
Uko amazi yo kunywa yoba ameze	152
Amazi mu mwanya wo gufungura	153
Ku batanyoterwa	155
Nywa amazi ariko kandi meza	155
Umuco w'izuba	160
Insanganyangaburo D	160
Umuti w'agahinda	161
Umuti w'itiro	165

None izuba ryopimwa gute ?	166
Kwirinda	171
Ingeso ziremwa gute ?	173
Ni kuki bitoroshe guhindura ingeso ?	175
Akayaga keza	180
Impwemu duhumeka ziva he ?	183
Guhumeka neza	183
Kutaba ahantu hugaye	184
Ukwandura kw'ikirere kubera imiduga	185
Amahinguriro	186
Itabi	186
Kugira ngo duhumeke neza	187
Ikiruhuko	191
Umuruho utewe n'ibikorwa	191
Ubwoko butari bumwe bw'umuruho	195
Umuti w'uburuhe	200
Umuntu yoruhura umubiri gute biciye mu gusinzira ?	201
Izindi nzira zo kuruhura umubiri	203
Kwizigira ubushobozi bw'Imana	208
Abasoda barwanira umubiri hamwe no kwitsa umutima	210
Urafise agaciro imbere y'Imana	214
Kubana n'Imana no kuyikorera bizana amahoro nyayo	215
IGITIGU N'INDWARA ZACO	221
Igitigu	222
Ico ari co koko	222

Bimwe mu bikorwa bitangaje vy'igitigu	223
Ibisinzikaza igitigu	226
Epatite	234
Epatite A	235
Epatite B	236
Epatite C	237
Epatite E	237
Epatite togizike	237
Jonisi	242
Urusina	248
Agasaho k'indurwe	252
Gusha mu gasaho k'indurwe	253
Udutete tw'umusenyi mu muringoti w'indurwe	257
INDWARA Z'UMUSHISHITO	266
Gusha mumushishito	269
Igikomere co mu mushishito canke co mu rura ruto	276
Kugwa mpishi	284
IZINDI NDWARA ZIKUNDA GUSINZIKAZA ABANTU	
Kunanuka	290
Diyabete	303
Kugumbiza	339
Gucibwamwo n'amacinya	345
Gutoboka amenyo	352
Ubucamvyaro n'inkurikizi zabwo	364

Amibe	371
Giripe	377
Malariya	380
Igikomere	384
Umwana acibwamwo, agira umururumbo, adahwa akaguma arira kenshi.....	386

Ibitabo twifashishije

A better way to health
Bibiliya Yera
Biology, fourth edition
Counsels On Diet and Foods
Croquez la Vie
Guide des Plantes Médicinales Vol. 2
Health Power
Homes, Ne Nous Mangez Pas
La Révolution Diététique du Docteur Atkins
La Santé par les Aliments
Le Service Chrétien
Natural Remedies Encyclopaedia
Patriarchs and Prophets (ed. 1958)
Patriarchs and Prophets (ed. 1979)
Pediatric Nutrition Handbook
Philosophie de la Santé
Rapport sur la Santé dans le Monde 2002
Régime Alimentaire, Nutrition et Prévention des Maladies
Chroniques (OMS)
Régime Alimentaire, Nutrition et Prévention des Maladies
Chroniques, OMS 1990
Régime Alimentaire, Nutrition et Prévention des Maladies
Chroniques, Série de Rapports Techniques 1990
Tell of His Power
Testimonies for The Church, Vol. 5
Textbook of Biochemistry, Sixth Edition
The Health of The Nations
The Novus Solar System Mobile (1987)
The Science of Natural Healing

Ijambo ryo gushikiriza

Haheze ikiringo kirenga umwaka ndiko ndabategurira kino gitabo. Aho nafata ingingo yo gusenga cane no gukora ubushakashatsi kubera ivyo nipfuza gushira mu gitabo nk'iki, nari ndajwe ishingira n'ukubona abantu bose bashobora gusoma ikirundi boronka igitabo kivuga ku magara y'abantu kikabashika ku nyota, kandi ivyo sindabikekeranya kw'ariko biza kumerera umusomyi wese aza gusoma kino gitabo, n'aho yoba asomye ingingo imwe gusa.

N'aho nyene natanguye kwandika kino gitabo ntafise amikoro agishoboye, Imana ntiyabuze kwugurura inzira ibicishije mu gukora ku mitima y'abizera barajwe ishingira n'uko umuco Imana yaduhishuriye kubw'imbabazi zayo, werekeranye n'ivugabutumwa riciye mu buvuzi hamwe no kugabanya umubabaro mu bantu, wokwira hose.

Iki gitabo ndagituye umuntu wese yitaye ku rutare akagira ico akoze ngo gisohoke biciye mu ntererano y'amasengesho, amafaranga n'inama zirashe. Ndagituye kandi abo bese batahengeshanije kunsunika ngo ndagisohore kuko bari bakirindiranye igishika. Kibashike ku nyota, kibabere inyishu y'ibibazo vyinshi mwari mufise kuvy'amagara hamwe no gusobanukirwa n'ico mwokora mu guteza imbere igikorwa c'ivugabutumwa biciye mu buvuzi kama.

*Kudakunda gusoma ni ukwiyugaranira mu
mwiza no mu bujuru.*

Dan.9 :2

Intangamarara

Kuva kw'igenekerezo rya 6 gushika 13 Ntwarante 1989, i Genève ku murwa mukuru w'igihugu c'Ubuswisi hari hakoraniye inama y'umurwi w'ishirahamwe mpuzamakungu ryitaho amagara y'abantu kw'isi (Organisation Mondiale de la Santé – O.M.S.) ufise intumbero yo kwiga indwara n'ibizitera hamwe rero n'uko amagara yifashe buri mwaka mw'isi yose muri rusangi. Igihe dogiteri Hiroshi Nakajima ari nawe yari Umuyobozi Mukuru (D.G) w'iryo shirahamwe yatanguza iyo nama, Dogiteri **Hu Ching-Li** nawe yaciye aronka akaryo ko kwemeza ko urugero (quantité) n'ubwoko (nature) vy'ibifungurwa vyiherejwe arivyo vyari intandaro y'uko amagara y'abantu yari yifashe muri rusangi. Ivyo birahambaye cane kumenywa uno munsu, narirya indwara nyinshi zisinzikaje abantu muri kino gihe ziterwa ahanini n'ibituma bibiri :

- a) kwihereza ibifungurwa n'ibinyobwa bitabereye canke naho tukavyihereza nabi.*
- b) Kwima umubiri ivyo wari ukeneye vyiza no mu bihe vyiza.*

Hamwe woramuka utewe iteka ryo kwigirira amahirwe yo gusoma ibitabo vy'abahinga batari bamwe bandika ku kibazo c'amagara y'abantu uno musu, ntivyokugora gutahura ca cemezo ca Dogiteri

Osler, Umuganga rurangiranwa w’umunya Kanada, aho yemeza ko ibice 90 kw’ijana (90%) vy’indwara zose abantu barwaye ukuyemwo amasanganya (accidents) n’iziterwa n’amamikorobi canke imigera (maladies infectieuses), ziterwa n’amakosa akorwa mu mirire.

Muri kino gihe c’iterambere, abantu basa n’abariko baribagira gufungura ibifungurwa kama bitacishijwe mu mahinguriro nk’ibiharage, umuceri, isoya, ingano, ibigori, ubwishaza, ivyamwa n’imboga maze bakagenda babisubiriza ivyacishijwe mu mahinguriro. Nk’akarorero, isukari yasubiriye ubuki n’aho nyene abahinga bemeza ko iyo (sukari) ari indya « ipfuye », kuko isukari ari igikaju (umusigati) cataye agaciro kuko camburirwa mu mahinguriro insanganyangaburo (vitamines) n’ivyunyonyu (sels minéraux), ikoroha gukoreshwa ariko ataco ikimariye umubiri uretse kuwusinzikaza.

Iryo hindagurika ry’uburyo bwo kubaho mu vy’ingaburo n’amagara y’abantu rero, rigenda rijaniranye no gushira imbere ivyonona amagara, maze ibiyatotahaza navyo bigakumirwa kuko abantu batabizi canke n’aho akayabagu kabo (appétit) kaba arivyo gakunze gusumba. Iyo abantu bose ba kino gihe baba bazi inyama, amagi, ifi n’amata ico arico kandi bakaba bafise n’ubushobozi bwo kwitegeka, bobikuye ku meza zabo babizinutswe rwose.

Umugambi wa kino gitabo, ni uwo kwerekana ico ubushakashatsi buherutse kuvumbura ku ngaburo, kugira ngo turabe ico ikora ku magara yacu. Sinoba ndengeje urugero mvuze ko niwamara gutsontsomera kino gitabo uzoba ushoboye gutahura cane ingaburo ibereye iyo ariyo kandi ushoboye kubitahuza n’abandi mu ntumbero yo gukingirira amagara y’umubiri, ay’ubwenge n’ay’ivya Mpwemu hamwe rero no kuvura indwara dukoresheje ibidukikije Imana yaremye kandi bitononekariye mu mahinguriro. Ivyo birahambaye kumenywa muri kino gihe, na cane cane ku bavuga ubutumwa bwa Malayika wa gatatu.

Kino gitabo kandi kizogufasha cane gusobanukirwa inyanduruko y’indwara zigisibije, uburyo wozikingira n’uko wozivura wikoze ku ngaburo ibereye n’ibindi bidukikije.

*« Mu gihe akwiragira hiryu no hino, umuvugabutumwa azagenda ahura n’abarwayi benshi. Ategerezwa kuba afise ubumenyi bwimbitse bw’ibitera indwara n’ubwo kumenya kuzivura akoresheje imiti yoroheje, ngo aruhure abababaye »*¹. Umwizera atazi ubuvuzi kama kandi ngo atabukoresha mu kugabanya imibabaro y’abasinzikaye, ntaba aramenya iyo aja.

¹ Ellen G. White, Service Chrétien, P.164.

« Tugeze mu gihe umudivantiste wese yategerezwa gukora igikorwa c'ivugabutumwa biciye mu buvuzi ».²

« Bene Data na basaza banje bari bakwiriye kwitwararika cane igikorwa c'ubuvuzi. Ni bitegure kugira ico bimariye n'ico bamariye abandi babicishije mu gusoma ibitabo bivuga kuri iki kibazo (c'intungamagara). Ivyo bitabo vyari bibereye kwitabwaho cane gusumba uko vyigeze gukorwa muri kahise. Buri wese afise inyungu akura mu kubimenya kuko ahanini vyandikiwe kutwigisha ku mategeko agenga amagara. Abashira mu ngiro ayo mategeko bazoronka imigisha myinshi mu buryo bw'umubiri no mu vya Mpwemu. Inyigisho y'ivy'amagara izobabera inkinzo ibakingira ikibi kigenda ciyongera na ntaryo ».

Alexis HARIMENSHI

² Ellen G. White, Service Chrétien, P.166.

Ibigize inyama n'ingaruka zavyo ku mubiri wawe

1. INDEMAMUBIRI

Iryo jambo « indemamubiri » (Protéines) ryavumbuwe mu 1838, rikaba risobanura ngo « ikiza imbere », « ikirengeye ibindi ». Ikibazo kirabana n'indemamubiri (protéines) kiraraje ishingira abatari bake hirya no hino kw'isi. Ikibazo abenshi bakunze kwibaza n'iki ngo: « Mbega ubwo noba ndonka indemamubiri zitoheje kandi z'agaciro » ? Ico kibazo kirafise ishingiro narirya indemamubiri (protéines) ari ibintu vy'agaciro gahambaye cane mu ngaburo y'umuntu kubera ibikorwa bikomakomeye zikora muri we.

Igikorwa c'indemamubiri

a) Indemamubiri (protéines) zitera igikuriro

Abashakashatsi benshi nka **Osborne, Mendel** na **Rose** bemeza neza ko igihe umwana abuze indemamubiri zimwe zimwe aca azingama. Nka **Rose** yamaze imyaka 24 yose (1906-1930) akora

ubushakashatsi ku ndemamubiri (protéines) aca avumbura ko igihe umwana agaburiwe ingaburo irimwo indemamubiri z'agaciro akura neza, azibuze naho akazingama.

b) Gutanga inguvu z'umubiri

Hisunzwe ubushakashatsi bwakozwe n'abahinga mu vy'ingaburo n'amagara y'abantu, vyaribonekeje kenshi ko n'aho umuntu atorya ikintu na kimwe kirimwo isukari (hydrates de carbone) ariko akaronka ibinure (graisses) n'Indemamubiri (Protéines) atokwigera abura isukari ikenewe mu mubiri. Hariho impamvu yumvikana. Umuhinga mu vy'ingaburo n'amagara y'abantu, Dogiteri **Robert C. Atkins** yemeza ko ibice 58 kw'ijana (58%) vy'indemamubiri dukura mu ngaburo umubiri uzihinguramwo isukari (sucre)³, kandi ko bene iyo sukari igitigu (foie) gihingura mu ndemamubiri ikoresha neza n'umubiri gusumba irya abantu bakunda gukoresha ivuye mu mahinguriro. Iyo ncabwenge **Robert C. Atkins** wewe abona ko icoba ciza ari uko n'amahinguriro y'isukari atari akwiriye kubaho kuko ariyo soko ry'indwara zikomakomeye :

« Indwara zikomakomeye kurusha izindi zisinzikaje abantu ba kino gihe zikomoka ku co

³ La Révolution Diététique du Docteur Atkins, P. 305

*nokwita ngo « kurogwa n'isukari »*⁴. Yarongeye kandi, ati « *Umwansi atugeramiye kuruta abandi ni ihinguriro ry'isukari* ». Mu gihe isukari yo mu mahinguriro isanzwe ari umwansi w'amagara y'abantu, iyo igitigu cihingurira mu ndemamubiri yoyo ni nziza cane ku magara. Mumenye kandi ko inkomezi umubiri ukoresha buri kanya kose ahanini ziva mw'isukari. Isukari ni igifungurwa ntanganguvu, kandi ni naco gituma n'indemamubiri (protéines) nazo bazita igifungurwa ntanganguvu. Kubura indemamubiri bituma umuntu aba magoyagi, akagwara kwashi n'ayandi mabi bigendana n'iyi ngorane.

c) **Guhingurwamwo ibindi bintu umubiri ukenera**

Mu bisanzwe umubiri w'umuntu ukenera vyinshi kugira ngo ukore neza kandi vyose ntiturinda kuvyihereza mu ngaburo. Dushobora kwihereza isukari ikavyara ibinure canke tukihereza ibinure bikavyara isukari. Igitigu c'umuntu iyo gikora neza kiba gifise ubwo bushobozi bwo guhingura ibintu mu bindi. Ni nako bigenda no ku ndemamubiri.

Indemamubiri (protéines) zirahingurwamwo :

* Indurwe (bile) itangwa n'igitigu kugira ngo inoze imfungurwa ziri mu rura ruto (intestin grêle) zivuye mu mushishito (estomac).

⁴ La Révolution Diététique du Docteur Atkins, P. 13

* Indemamubiri bita emoglobine (hémoglobine) ikwiragiza impwemu duhumeka (oxygène) mu mubiri.

* Indemamubiri bita ensiline (insuline) ihingurirwa mu rwagasha (pancréas) igatuma isukari itaba umurengera mu maraso (hyperglycémie) ngo umuntu abe arwaye diyabete.

* Ibintu bita orumone (hormone) bituma ibihimba vy'irondoka n'ibindi bihimba bitari bimwe bikora ku rutonde rwiza, n'ibindi vyinshi.

d. Gusanura ivyasambutse

Mu bisanzwe, buri bihimba vyose bigize umubiri ukuyemwo ivyo ubwonko, birasaza bigasubirizwa ibindi. Nk'akarorero uduce ndema ngingo tutaboneshwa ijisho aritwo bita selile (cellules) tw'umushishito, urura ruto n'utwubitse igitigu, dusaza tumaze imisi 2 gushika kuri 15 uhareye igihe tubereyeho; utwo amagufa n'imisoso natwo dusaza tumaze imisi 15 gushika 80, gutyo gutyo.

Umuntu atarwaye kandi afungura neza, buri musi umubiri wiwe uhingura uduce ndemangingo (cellules) twubitse umutuku w'amaraso (globes rouges): hahingurwa imiliyoni 2 z'uduce ndemangingo twubitse umutuku w'amaraso (globules rouges).

Ariko kandi igihe ayo maraso amaze guhingurwa arasaza kandi agapfa amaze imisi 120, agasangangurwa kandi agashingurwa n'igitigu (foie) hamwe n'agahimba bita impindura (rate) gaherereye munsu y'ibere ry'i bubamfu. Utwo duce ndema ngingo (cellules) twubatse amagufa, amaraso, urukoba, imisoso n'ibindi dusaza rero umubiri udusubiriza utundi wikoze ku ndemamubiri (protéines) n'aho n'ibinure navyo bidasigara inyuma mw'irangurwa ry'ico gikorwa gihambaye.

Kugira ngo ivyo ushobore kubitahura, ntiwokwimurika mu nda ngo wirabe, eka mbere ntiwokwibona no mu maraso ngo witegereze iryo hindagurika. Ariko kandi uramaze kwibonera ukuntu inzoka yiyubura, umubiri ugasaza ugasubirizwa uwundi. Uramaze kandi kubona aho umuntu akomereka umubiri ukongera kwiremarema gushika n'aho aho hantu hashaje hasubirizwa ahandi kandi atawundi mubiri abaganga bahometseko. Ico n'igikorwa umubiri ukora wifashishije indemamubiri n'ibinure.

e. Gutunganya urugero rubereye rw'ubushuhe

Indemamubiri (Protéines) ni kimwe mu bintu umubiri ukenera hamwe n'ibinure kugira ngo birinde umuntu kujugumira mu bihe bitari ivyo uburwayi n'imbeho. Akarorero kogufasha gutahura, urazi ko

abantu bonze cane aribo bakunze kujugumira no mu gihe atayindi ndwara bafise canke hadakonje. Kimwe mu mvo zibituma ni ibinure bike mu mubiri.

Aho indemamubiri ziva

Dufatiye kw'utwo turorero duke kandi tugufi cane ku birabana n'ibikorwa vy'indemamubiri mu mubiri yacu, bica bidufasha gusobanukirwa ko ingaburo iy'ariyo yose ikenye indemamubiri (protéines) itotunga umuntu, n'aho yoba igwiriye mu ibinure, isukari, insanganyangaburo (vitamines), ivyunyuny (minéraux) n'ibindi, kuko atanakimwe co mw'ivyo umubiri uhinguramwo indemamubiri. Mu bifungurwa bigwiriye mu indemamubiri nyinshi cane kandi z'agaciro gahambaye, inyama, amagi, ifi, amata n'ibibihinguramwo bifata ikibanza gihambaye mu ngaburo z'ibiva mu bikoko. Mu ngaburo y'ibiva mu bimera naho, ibiharage, ubwishaza, ingano, ibihoke (tournesol), ivoka, inazi (noix de coco), igisuru (ortie), igikakakaka (aloès), ibiyoba, biragwiriye mu ariko bigeze kw'isoya naho bikaba igitangaza. Isoya nico gifungurwa conyene kiva mu bimera gitanga ubwoko kw'indemamubiri zose z'agaciro umubiri ukeneye nk'uko bisanzwe bigenda ku ngaburo y'ibiva mu bikoko. Mu gihe ingaburo y'ibimera igwiriye mu intete zitari zimwe, imboga n'ivyamwa, dushobora kwizera tudakekeranya ko umubiri waronse ingaburo ibereye.

“Indemamubiri abana n’abakuze bakenera barazironka bitabavunye mu gihe bafise ingaburo ihindagurwa, ishingiyeye ku ntete (céréales) n’ivyamira mu mihanyu (ibiharage, ubwishaza,...)”⁵. Ikizoba gisigaye ni ukumenya uko ivyo twihereza vyateguwe n’ukuntu tuvuyihereza. Erega imfungurwa nzima irashobora gupfa, kandi umuntu ashobora kwihereza intica ntikize y’igifungurwa ciza canke naho akarenza urugero. Igihe kimwe mw’ivyo vyompi gikozwe, ntitwokwitega ko Imana izokwama yakoze igitangaza mu kuturinda indwara :

“Namba umuco Imana yatanze ku vy’ubugorozi bw’ivy’amagara wirengagijwe, ntizokora igitangaza mu kurinda indwara abashishikara guca mu nzira ituma bitera indwara ubwabo.”⁶

Isoko, itandukaniro ry’indemamubiri n’ingaruka zazo mu mubiri

N’aho nyene bishobora kuboneka nk’ibitangaje cane, ibimera ni vyo vyonyene bihingura indemamubiri (Protéines) maze ibikoko n’abantu bakazironka ar’uko bariye canke banyoye ikintu kivuye mw’ivyo bimera. Impamvu y’ivyo, n’uko abahinga basanze ko kugira ngo indemamubiri zibeho hakenerwa ivyo bita azote (Azote), iyo nayo ikaba

⁵ Régime Alimentaire, Nutrition et Prévention des Maladies Chroniques, p.102 (OMS)

⁶ Ellen G. White, Counsels on Diet and Foods, P.401

ikoresha n'ibiterwa gusa mu guhingura ibintu bita acides aminés vyubatswe indemamubiri. Ibikoko ntivyigera bihingura indemamubiri.

Mu gihe ibikoko bikeneye indemamubiri (protéines) rero, bitegerezwa kwihereza ibimera canke naho bikarya bigenzi vyavyo vyariye ibimera. Umuntu ariye ibimera, aca aronka za ndemamubiri akeneye kuko ziva mu bimera. Ico ni naco gituma abashakashatsi mu vy'ingaburo n'amagara y'abantu basanze ko igihe abantu batarya ikintu na kimwe kiva mu bikoko (végétariens stricts), bihereje ibinyantete bitari bimwe, baheza bakaronka indemamubiri zose z'agaciro.

Dogiteri **Georges Pamploma Roger** aremeza ko umuntu adakeneye kurinda kurya ibikoko kugira ngo aronke indemamubiri z'agaciro : *“Abahinga bese barashigikirana kandi n'ubushakashatsi buravyerekana ko inyama atari zo ngombwa mu ngaburo y'umuntu kugira ngo agire amagara meza”*.⁷

Ivyo, n'ishirahamwe mpuzamakungu ryitaho amagara y'abantu kw'isi (OMS) rirabishigikira ryivuye inyuma, mu gihe ryemeza ko ingaburo y'ibimera iteguranywe ubwenge n'ubuhinga itanga indemamubiri zose zikomeye :

⁷ Croquez la Vie, P.57

*« Indemamubiri (protéines) abana n'abakuze bakenera zirashobora kuboneka zihagije vyoroshe igihe bafise ingaburo ihindagurwa ishingiyeye ku binyantete (céréales) no mu ntete ziva mu mihanyu (légumineuses) ».*⁸

Ingaburo igizwe n'ibinyantete (céréales) nk'umuceri, ingano, amasaka, uburo, ibigori, hamwe n'intete ziva mu mihanyu (légumineuses) nk'ibiharage, isoya, ubwishaza, inkore, ububage, n'ibindi nk'ivyo nivyo vyamye bigize ingaburo Imana yari yageneye umuntu imbere yo gucumura kwiwe :

*« Imana irababwira, it'Ehe ndabahaye ivyatsi vyose vyama utubuto biri kw'isi yose, n'igiti cose cama ivyamwa birimwo imbuto zavyo : bibabere ivyo kurya vyanyu.»*⁹

Ingaburo y'ibiva mu bikoko yagiye kurekurirwa umuntu inyuma y'umwuzure ari ukubera ko ibimera vyose vyari vyatikijwe n'amazi¹⁰. Kanatsinda, n'aho nyene ingaburo y'ibiva mu bikoko irimwo ibintu bigaburira umubiri vy'agaciro, na cane cane ibinure n'indemamubiri, ivyo nyene birateye isibe mw'isi kubera ingorane biteza mu mubiri w'umuntu. Ibinure vy'ibikoko, abahinga benshi basanze ko arivyo nkwezi

⁸ Régime Alimentaire, Nutrition et Prévention des Maladies Chroniques, (OMS) 1990, P.102

⁹ Bibiliya Yera, Itanguriro 1: 29

¹⁰ Bibiliya Yera, Itanguriro 9: 2-3

y'amarere n'amakuba kw'isi, ariko rero indemamubiri (protéines) zo ni agaheta.

Imyanda iva mu ndemamubiri z'ibikoko

Igihe umuntu yihereje ibifungurwa canke ibinyobwa vy'ibikoko, bigwiriye indemamubiri (protéines) : inyama, ifi, amagi, amata n'ibihingwe muri vyo, bica bivyara imyanda myinshi kandi ikomeye iteza indwara ziteye ubwoba n'ubumuga. Iyo myanda rero niyo y'iyi :

- . Ire (Urée)
- . Pirine (Purines)
- . Aside irike (acide urique)
- . Amoniyake (ammoniac) n'iyindi.

Iyo myanda yose itembera mu maraso kandi ikaba yavyawe n'indemamubiri mu gihe zariko zirahingurirwa mu gitigu. Ikindi naco womenya, n'uko iyo myanda tuvuze itaboneka ngo ni uko igikoko coba kigwaye.

a) Ire (Urée)

Mu bisanzwe amafyigo y'umuntu yama ariko arasohora bene uyo mwanda bita ire (urée) abicishije mu mwanda muto. Ariko rero nko mu gihe bishitse umuntu akihereza ingaburo igwiriye indemamubiri ziva mu bikoko (inyama, amafi, amagi,

amata), ya ire (urée) ica iba umurengera mu maraso maze amafyigo nayo akarengerwa gushika n'aho ubushobozi bwayo bwo kuyisohora mu mwanda muto bunanirwa. Iyo ire (urée) ica irundarundana mu maraso maze ayo nayo akayikwiragiza mu bice vyose vy'umubiri. Uwo mwanda ire (urée) rero uca uruhisha cane uduce ndemangingo tugize umubiri (cellules) na cane cane utw'ubwonko, bigatuma umuntu yama yumva arushe, bigatera indwara y'umutima (hypertension artérielle), gukoherana n'ukwumagana kw'imitsi itembereza amaraso (artériosclérose) n'ayandi mabi menshi, tutibagiye ko ingaburo igwiriyemwo indemamubiri ziva mu bikoko zituma amafyigo asinzikara cane. Wibuke kandi ko n'aho ingaburo y'ibimera bimwe bimwe igwiriyemwo indemamubiri bitoroshe kuyironkamwo iz'umurengera n'imyanda bigendana navyo.

b. Pirine (Purines) na Aside irike (acide urique)

Pirine nazo ni umwanda utembera mu maraso uvuye mw'ihingurwa ry'indemamubiri mu mubiri kandi ukaba utembera mu maraso nka ya ire (urée). Pirine nayo isohorwa n'amafyigo icye mu mwanda muto. Igihe rero bishitse ikarundarundana mu maraso kuko yagwiriyemwo mu ngaburo canke kuko amafyigo agwaye ntayisohore uko bikwiriyemwo, amaraso aca ayikwiragiza hose mu mubiri na cane cane mu bwonko, bigatuma umuntu yama yumva arushe mu bwenge. Ikindi kandi,

iyu pirine (purines) umubiri urayikorako mu kuyihinguramwo umwanda ukomeye cane bita aside irike (acide urique). Mu gihe pirine na aside irike bibaye umurengera mu maraso, bica biba uburozi kuko biteza indwara nyinshi: Indwara y’umutima irangwa n’umuvuduko w’umurindi w’amaraso (hypertension artérielle), amafyigo (atteinte rénale), umuruho w’ubwonko, gusazira imbura gihe, n’ayandi mabi menshi.

Ku bw’ivyo rero, nta muntu akwiriye kurazwa ishingira n’uko ataronse indemamubiri (Protéines) ziva mu bikoko (inyama, amafi, amagi n’amata) kuko iziva mw’iryo soko zozo twabonye ko zigeramiye amagara y’abantu. Mu cegeranyo cashizwe ahabona n’ishirahamwe mpuzamakungu ryitaho amagara y’abantu kw’isi (Organisation Mondiale de la Santé – OMS) mu 1990 baravuze bati :

*« Nta karusho kazwi kodutuma tugwiza cane indemamubiri (protéines) twihereza, kandi kwihereza indemamubiri nyinshi cane bishobora no kuzana inkurikizi mbi mu gutuma icunyunyu Kalisiyumu (calcium) gitakara ku bwinshi ».*¹¹

Twisunze igiharuzo (tableau comparatif) kiri hano hepfo kitwereka ubusumbasumbane bw’ibifungurwa bimwe bimwe biva mu bimera hamwe

¹¹ Régime Alimentaire, Nutrition et Prévention des Maladies Chroniques, P.102.

n'urugero kimwe kimwe cose cotanga kugira ngo tube turonse urugero rw'indemamubiri zikenewe ku musi, biratworohera kumenya imfungurwa zo kugirwa nyambere izo ari zo kandi ko atari ikigoye kuronka indemamubiri zihagije ku musi no ku muntu afise ingaburo ihindagurwa kandi ishingiyeye ku ntete (ingano, amasaka, uburo, ibigori) no ku ntete zikurira mu mihanyu (soya, ibiharage, ubwishaza, ububage, n'ibindi).

Imfungurwa zimwe zimwe n'urugero rwazo mu indemamubiri

Imfungurwa	Amagarama y'indemamubiri atangwa n'amagarama 100 y'igifungurwa	Amagarama y'igifungurwa atanga amarama 52,5 y'indemamubiri umuntu akuze asabwa k'umusi
Soja	38	138
Intete z'ibihoke	27	194
Lantiye mbisi (lentilles crues)	24	219
Soja mbisi	14	375
Ingano	13	404
Ibigori	9.4	559
Umukate w'ingano (pain complet)	8.9	590
Umukate wera (pain blanc)	8.2	640
Umuceri	7.2	729
Ubwishaza butoto	6.7	784

Ibizinu	3.7	1420
Ibiraya	2	2625
Itomati	1.3	4040
Igitunguru c'igoma	1.2	4375
Konkombure (concombre)	1	5250
Inazi (noix de coco)	5	1050
Elayo (olives)	3.5	1500
Ivoka	2.1	2500
Umucungwe	0.8	6563
Inyama y'inkoko	20	263
Inyama y'inyana (veau)	20	263
Ingurube	19	276
Irigi	13	404
Iforomaji yera	8.7	603
Amata y'inka	3.5	1500

Twisunze ivyo tubona aho mu giharuzo, dusanga ko amagarama 138 y'isoya atanga amagarama 52,5 y'indemamubiri zisabwa ku musi, n'aho woba atakindi woba wariye canke wanyoye kirimwo indemamubiri. Duca tubona ko atari ikigoye kuronka indemamubiri zisabwa ku munsu. Ariko kandi, iyo ngaburo ntiyoba ishingiyeye ku myumbati, ibirayi, igitoke, ibijumpu, imboga, ivyamwa, ahubwo yoba ishingiyeye ku ntete (céréales) n'intete zikurira mu mihanyu (légumineuses) maze ivyo navyo bikaza ari ukwuhirira. Iyo ni yo ngaburo ibereye umuntu.

*« Ubugorozi mu vy'imirire, butegerezwa kubandanya intambwe ku yindi. Indwara ziriko zigwirirana mu bikoko, gukoresha amata n'amagi bizogenda bibamwo akaga. Hari hakwiye gukorwa akigoro ngo ikibanza cavyo gisubirizwe ibindi bintu vyiza kandi bizimbutse. Abantu bo mu mihingo yose bari bakwiriye kwigishwa uko boteka badakoresheje amata n'amagi uburyo bwose bushoboka, ariko ku buryo baronka imfungurwa ziryoshe zitera akayabagu ».*¹²

¹² Ellen G. White, Counsels on Diet and Foods, P. 469-470.

2. IBINURE

Uko vyoba bitangaje kwose, umenye ko ibinure biri amoko menshi cane kandi bikagira n'ingaruka zitandukanye ku mubiri bivanye n'isoko vyavuyemwo, urugero wihereje n'ubwoko bwavyo, ariko vyose bikaba bigabuye mu migabane 2 mikuru mikuru : ibinure binovu (acides gras saturés) n'ibinure vyoroshe (acides gras insaturés).

a. Ibinure binovu

Ibinure na cane cane ibigumye (acides gras saturés) birateba mu nda ntibihoke vuba. Ivyo binure bigumye kandi bisanzwe biruhisha ibihimba bihingura ibifungurwa (appareil digestif) na cane cane igitigu (foie) n'urwagasha (pancréas). Ni naco gituma igihe umuntu arwaye urwagasha canke igitigu abujijwe kurya ingaburo irimwo ibinure vyinshi kuko ivyo bihimba 2 arivyo bitanga ibintu bituma ibinure binozwa neza mu rura ruto (intestin grêle).

Isoko ry'ibinure binovu

Ibinure binovu rero biva mu ngaburo y'ibiva mu bikoko : inyama, amagi, amata, ifi n'ibibihinguwemwo, uretse ko n'amamesa hamwe n'amavuta y'inazi nayo atanga ibinure binovu nk'ibiva mu nyama. Ingaburo yose igwiriyemwo ibinure binovu (acides gras saturés)

yaba ari ibiva mu bikoko canke mu bimera yari ikwiriye kwirindwa cane, iramutse ibaye igikoreshwa naho igakoreshanywa ubwitonzi bwinshi. Ingorane ziterwa n'ibinure mu ngaburo ni nyinshi:

❖ **Kuruhisha ibihimba bihingura ibifungurwa**

Igihe ibinure (acides gras) vyiherejwe, bigeze mu rura ruto (intestin grêle), urwo rura ruca rutanga ibintu bita orumone (hormone) bigenda mu gitigu no mu rwagasha kugira ngo ivyo bihimba bibiri bice bitanga ibintu biza gutuma ivyo binure nyene bisyerebwa neza aho mu rura ruto kugira ngo bibone gushika mu maraso, kugira birangure amabanga bijejwe. Nko mu gihe ivyo binure bigumye (acides gras saturés) naho, bica bisigura ko biruhisha ico gitigu n'urwo rwagasha, bigatuma vyonarwara. Ariko ku binure vyoroshe biva mu bimera nk'ivy'ibiyoba, isoya, ibiharage n'ibindi nk'ivyo hoho siko bimeze, kiretse gusa nko mu gihe igitigu n'urwo rwagasha vyoba birwaye. Ingorane ziterwa n'ibinure rero ni nyinshi cane n'aho zidashikira iziterwa n'indemamubiri (protéines).

❖ **Kwipfundapfundika kw'amaraso agacika udu-tete tw'umumenyi (calculs)**

Nk'uko twabibabwiye, ibinure biri amoko menshi kandi ayo moko akagira n'ingaruka zitandukanye mu

mubiri. Nko mu gihe umuntu akomeje kwihereza ingaburo igwiriyemwo ibinure binovu (acides gras saturés) na cane cane ivyo bita kolesterole (cholestérol LDL) bisanzwe ata handi biva uretse mu bikoko gusa, bishitse mu maraso biyatera kutongera kuvuragira ku rugero rwiza, ahubwo ayo maraso agaca yiremaremamwo udutetetete tugenda dukura kandi dukomera buhoro buhoro gushika n’aho ducika nk’intete z’umusenyi (calculs).

❖ Umusenyi mu bice bitari bimwe vy’umubiri

Hariho igihe bishika utwo dutete tw’umusenyi twiremaremye mu maraso avanze n’ibinure binovu (cholestérol LDL) tukaguma hamwe mu mitsi ntidutembere. Baca batwita amboli (embolies). Hari n’aho bishika tugatembera mu mitsi itembereza amaraso; baca batwita tromboze (thromboses). Nko mu gihe bishitse utwo dutete tumeze nk’umusenyi tukaba mugasaho k’indurwe (vésicule biliaire), dushobora gutuma ya ndurwe (bile) ihingurwa n’igitigu, igatangwa naco kugira ngo inoze neza indemamubiri (protéines) mu rura ruto (intestin grêle), itaba ikibonetse bigatuma izo ndemamubiri naho twazihereje ataco ziza kumarira umubiri. Ikindi naco, umuntu aba arwaye indwara y’igitigu bita cholecystite.

Mu bindi bihe naho birashika ko utwo dutete tumeze nk’umusenyi twiremaremara mu gasaho

gaherereye munsu y'umukondo kakira umwanda muto urungitswe n'amafyigo (bakita vessie). Utwo dutete tumeze nk'umusenyi (calculs) rero dushobora kwiremarema uwo muntu aya inyama, amagi, ifi, amamesa menshi canke anywa amata atabizi.

Turakura buhoro buhoro gushika n'aho tungana nk'irigi ry'inkoko mw'ako gasaho kakira umwanda muto (uruhago). Iyo bituma umuntu asigara yumva ababara cane munsu y'umukondo (mu kiziba c'inda), agasoba vyanka kandi akazana utumatuma kandi ababara cane.

Ariko kandi mwomenya ko iyo ngorane idaterwa no kwihereza ingaburo igwiriye mw'ibinure binovu biboneka mu mata, mu magi, mu nyama mw'ifi, mu mamesa no mu mavuta y'inazi gusa, ahubwo no mu gihe umuntu adakora imyimenyerezo ngororamubiri kandi ntanywe amazi akwiriye naho nyene bituma amaraso yiwe yipfundapfundika agacika udusenyi duteza izo ngorane ziteye ubwoba. Kwihereza umunyu mwinshi navyo nyene birateza iyo ngorane.

Twa dutete tumeze nk'umusenyi kandi dushobora kuba mu dutsi two mu mutima (artères coronaires) bigatuma tuzibira inzira y'amaraso bigashika n'igihe utwo dutsi turemerwa n'umurindi w'amaraso tugaturika, amaraso akavira imbere umuntu akaba apfuye. Iyo bayita infarctus du

myocarde canke angine de poitrine. Birashika n'igihe utwo dusenyi (calculs) tuba mu mitsi itembereza amaraso mu bwonko bigatuma amaraso ataba agifise umwidgegemvye wo gutembera mw'iyi mitsi atwaye ibibugaburira nk'isukari, impwemu duhumeka (oxygène) n'ibindi. Igihe iyo ngorane bishitse ikabandanya, imitsi yo mu bwonko irashobora kuremerwa n'umuvuduko w'umurindi w'amaraso (tension artérielle) igaturika kuko yazibiwe n'udutete tw'umusenye (calculs cérébraux) akabura aho aca. Amaraso aviriye imbere umuntu aca apfa. Ivyo rero nivyoy bita « Amasanganya y'imitsi yo mu bwonko » (Accidents Vasculaires Cérébraux) asanzwe yiha inkumbi y'abantu indiri kw'isi bazize ukutamenya no kutirinda.

❖ Ikomantara ry'imitsi

Hariho ibihe bishika umuntu akihereza ibinure binovu (Acides gras saturés) vyinshi biboneka mu nyama, mu magi, mu mata y'ibikoko, mw'ifi, mu mamesa no mu mavuta y'inazi. Uko ivyoy binure bigumye bigenda bigwirirana mu maraso, ni nako bigenda vyihoma mu mitsi itembereza amaraso, nayo ikagenda yumagana kandi ikoberana kubera ivyoy binure biyihomyeko. Amaraso ntaba agitembera neza, maze hagaca haba ibihimba biyakena gusumba ibindi ivyoy navyo bikaba ari birya biri kure y'umutima nk'ubwonko, amaboko n'amaguru. Umuntu asigara

asamara kenshi, yumva arushe mu bwenge, abura itiro, aruha umubiri wose, agwa ikinya mu maguru, yama uruherehere na cane cane mu maso, agasaza urukoba gushika n’aho bimukwegera kanseri y’urukoba. **Marlene Wehr** atumenyesha ko ku bantu 450.000 barwara kanseri yo ku rukoba kw’isi buri mwaka, abenshi bo muri bo baba babitewe n’ingaburo igwiriyemwo ibinure vyinshi¹³.

❖ Ubuvyibuhe bw’umurengera

Igihe umuntu yihereza ingaburo y’ibiva mu bikoko igwiriyemwo ibinure n’indema mubiri vyinshi, ituma ivyo binure bipakangirana munsu y’urukoba bikamutera kuvyibuha vy’umurengera (obésité). Mubisanzwe, umuntu akuze afise amagara meza yategerezwa kugira ibiro bingana n’amasantimetero arenga ku metero 1 y’uburebure bwiwe. Nk’akarorero, mu gihe umuntu apima imetero 1 na santimetero 50 (1,50 m) yategerezwa gupima ibiro 50. Nko mu gihe umuntu agiye munsu y’ivyo biro agapima nka 40 niho bavugaga ko yonze (maigre). Aho rero aba afise amagara mabi. Yoca anyaragasa kwa muganga kwipimisha kuko ashobora kuba arwaye. Imvo zitera kwonda ni nyinshi :

- Kurya intica ntikize
- Kwama kungaburo y’ibara rimwe ikenye ibinure, isukari kama n’indemamubiri.

¹³ The Health of the Nations, P.6

- Gukora ibikorwa no kugendagenda cane kandi utarya ibihagije.
- Kurwara igitigu urwagasha, amara (intestins), umushishito, gucibwamwo kenshi, imyitwarariko y’umurengera (stress).
- Inzoka zo mu nda zikunyoha n’ibindi.

Mu gihushane co kwonda naho, hariho igihe bishika umuntu akavyibuha cane gushika n’aho arenza ibiro 20 ku vyo yategerezwa kuba afise. Dufate akarorero, umuntu apima imetero 1 na santimetero 70 ariko agapima ibiro 90, aba arengejeko ibiro 20. Aho rero aba amaze gusesa inda (obésité). Ico gihe rero, ntaba avyibushye gusa, ahubwo aba arwaye indwara ikomeye cane ishoboye no kumutwara agatwe hamwe atoreka kwongera kwimbisha imva amenyo n’ifurusheti mu maguru masha. Dogiteri **Robert C. Atkins** avuga ko igihe umuntu avyibushye vy’umurengera adakwiriye kwicara ngo arere amaboko nk’aho ataco bimutwaye.

*“Ntiwibagire ko kuvyibuha ugasesa inda (obésité) ari indwara”*¹⁴, mu gihe Dogiteri **G. Pamplona Roger** nawe yemeza ko bene ubwo buvyibuhe bw’umurengera bugabanya igihe co kubaho : *“Ikilo kimwe kirenze ku vyo umuntu yategerezwa kuba afise kingana n’umwaka umwe ukuwe kuyo yobayeho”*¹⁵. **Pamplona Roger** kandi ashishikara yemeza ko atari icoroshe kuronka umuntu atunzwe n’ingaburo

¹⁴ La Révolution Diététique du Docteur Atkins, P.101

¹⁵ Croquez la Vie, P. 155

y'ibimera (végétarien) yavyibushye vy'umurengera. **Ellen G. White** nawe yemeza ko ico cose gituma imisi yo kubaho kwacu igabanuka bituvuyeko ari icaha c'ubwicanyi, mu gihe kurya ibiva mu bikoko navyo ari kimwe mu bituma bikomeye.

*«Ibikorwa vyose vy'akarenganyo bigamije kugabanya igihe co kubaho; agatima k'urwanko n'ukwihora, kwinezeroza mu cipfuzo ico arico cose kiyoborera gukorera abandi inabi canke bituyoborera kubipfuriza inabi (kuko uwanka mwene se wese ari umwicanyi); ukwikunda gutera kwirengagiza kwitaho abakene n'ababayabaye; ukwinezeroza kwose canke ukwiyima kudakenewe canke ugukora ukarenza kugamije gusinzikaza amagara; ivyo vyose ni guhonyanga icagezwe ca gatandatu¹⁶ ku rugero ruto canke ruhambaye ».*¹⁷

Kurya ibinure vyinshi biboneka mu nyama, mu mata, mu magi, mw'ifi no mu bibihinguwemwo ni kimwe mu bituma bikomeye bitera kuvyibuha vy'umurengera. Dogiteri **Georges Pamplona** atugabisha ku mabi aterwa no kunywa amata y'inka ati : *“Amata n'ibiyahinguwemwo ni isoko rikomeye rivamwo icunyunyu kalisiyumu (calcium). Ariko kandi, amata y'inka arimwo ibinure vyinshi, bibereye gukuza*

¹⁶ Bibiliya Yera, Kuvayo 20: 13

¹⁷ Patriarchs and Prophets (Ed. 1958), P. 277.

*inyana y'inka atari ikiremwa muntu, na cane cane igihe boba ari abantu bakuze*¹⁸.

Kunywa amata y'inka bituma icunyunyu Kalisiyumu (Calcium) kitinjira mu maraso neza. Umuhinga muvy'ingaburo n'amagara y'abantu yitwa **Benjamin Harrow** yemeza ko igihe umuntu anyoye amata y'inka, ibice 20 gushika 30 kw'ijana (20-30%) vya Kalisiyumu (calcium) biyarimwo arivyo vyonyene vyinjira mu maraso, ibindi navyo bikisohokera hanze¹⁹.

None ivyo biterwa n'iki ? Umurengera w'ibinure n'indemamubiri biba mu mata y'inka nivyo ntandaro y'iyo ngorane. Igihe ico cunyunyu Kalisiyumu gikeshe mu mubiri rero amagufa asigara adakomeye, akavunika bukwi. Iyo ndwara bayita Ostéoporose ku bagore, ostéomalacie ku bagabo, na rachitisme ku bana. Umwana ayigwaye abura ubwenge bukwiye, arazingama canke naho amaguru akaba ahese nk'umutego (Imibango). Amabi aterwa n'ibinure binovu nay'ingaburo y'ibiva mu bikoko ntitwoyadondagura mu kirundi no muri kino gitabo gito, ariko ico twovuga ni kimwe : hagarika ivyo kwimbisha imva amenyo. Ukugabisha kwa **Ellen G. White** ku vyo akamenyero ko kura ibiva mu bikoko kurahambaye cane kuri twebwe.

¹⁸ Croquez la Vie, P.79

¹⁹ Textbook of Biochemistry, Sixth Edition, P.308

*“Abarya inyama baba bakengereye imburi zose Imana yatanze kw’iki kibazo. Ntaco bafise cokwerekana ko bariko bagendera mu nzira ibuzemwo akaga. Nta cireguzo na gito bafise cotuma barya inyama z’ibikoko vyapfuye. Umuvumo w’Imana uri ku biremwa vy’ibikoko. Ibihe vyinshi, iyo inyama ziherejwe, ziborera mu mushishito maze zigateza indwara. Kanseri, ibivyimba hamwe n’indwara z’amahaha biterwa no kurya inyama”.*²⁰

b. Iciza c’ibinure vyoroshe mu mubiri

Ibinure vyoroshe (acides gras non saturés) rero ni ibintu vyiza bikora ibikorwa bikomeye mu mubiri :

- Gutuma umubiri ugira ubushuhe bubereye
- Kuvyibuha ku rugero rwiza
- Gutuma ibihimba vy’irondoka (ku bagabo n’abagore) bikora neza
- Gutuma urukoba ruremba
- Gutuma ubwonko bukora neza.
- Gutuma insanganyangaburo zimwe zimwe (vitamines A, D, F na K) zihingurwa kandi zigashika aho zagenewe gukora mu mubiri, n’ibindi bikorwa vyinshi.

Ariko n’aho biri uko, ukutamenya no kutirinda bituma abenshi bihereza cane ubwoko n’urugero bitabereye vy’ibinure biva mu bikoko no mu bimera,

²⁰ Ellen G. White, Counsels on Diet and Foods, P. 383.

ivyo bikababera intandaro ikomeye yo gusinzikazwa n'indwara zikomakomeye. Ubushakashatsi buratwemeza ko indwara nyinshi zikomeye nka Diyabete, umutima, kugumbiza (constipation), amafyigo (affections rénales), ikomantara n'ikoberana ry'imitsi itembereza amaraso (artériosclérose), ikomantara n'ikoberana ry'imitsi yo mu mutima (infarctus du myocarde), amasanganya y'imitsi yo mu bwonko (accidents vasculaires cérébraux), ingwara z'igitigu zitari zimwe (affections hépatiques), indwara z'urwagasha (Pancréatite), kubura itiro (insomnie), kanseri, gukena isukari mu maraso (hypoglycémie), muhekenyi (rhumatisme) n'izindi tutavuze, ahanini ziterwa n'ibinure hamwe n'indemamubiri biva cane cane mu ngaburo Imana itahaye umuntu mw'irema : inyama, amafi, amata, amagi n'ibibihinguwemwo.

Kugira ngo mbe mfunguye neza

Ellen G. White aradufasha mu ntumbero yo gutuma tumenya ingaburo ibereye umuntu iyo ariyo : *“Intete, ivyamwa, inazi (noix) hamwe n’imboga nivyo bigize ingaburo umuremyi yadutoranirije. Ivyo bifungurwa igihe biteguwe mu buryo busanzwe bushoboka, nivyo bitanga amagara meza kandi bironsa umubiri ivyo ukeneye”*²¹.

a. Intete

Mw’iyo ngaburo rero yoba igizwe n’ubwishaza, ibigori, ingano, amasaka, uburo, inkore, ububage, ibihoke, umuceri utera n’ibindi uko amoko yavyo ari, hamwe na soya. Muri bene izo ntete kandi, mu gihe zikoreshejwe zitononekariye mu mahinguriro, zitatetswe nabi, canke ngo zononekare mu bundi buryo, ziba zifise ibintu vyose vy’agaciro umubiri ukenera :

- . Isukari (hydrates de carbone)
- . Ibinure (graisses)
- . Indemamubiri (protéines)
- . Insanganyangaburo (vitamines)
- . Ivyunyunyu (sels minéraux) n’ibindi

²¹ Counsels on Diet and Foods, P. 310

Bene iyo ngaburo niyo ishirahamwe mpuzamakungu ryitaho amagara y'abantu kw'isi (Organisation Mondiale de la Santé – O.M.S.) rishingira intahe muri ano majambo :

« Indemamubiri zihagije (protéines) abana n'abakuze bakenera zirashobora kuboneka vyoroshe igihe bafise ingaburo ihindagurwa ishingiyeye ku ntete (céréales) no mu ntete ziva mu mihanyu (légumineuses) »²².

Umusururu w'intete utegurwa gute ?

Hariho uburyo bworoshe bwodufasha kuronka ayo moko atari amwe y'intete (céréales) bitavunanye. Umusururu canke igikoma c'intete zitari zimwe vyoba imwe mu nzira yotuma umuntu aronka ibigaburira umubiri bitoheje no mu gihe ingaburo yiwe yoba atako yifashe muri rusangi. Uwo musururu woba ushingiyeye ku ntete zitunze gusumba izindi, kuko zose zitanganya ubutunzi. Ikindi kandi uko zigenda zisumbasumbanya ubutunzi ni nako n'urugero rwazo rugenda rusumbasumbana mu kuvangavanga amafu yazo. Intete zitunze cane zoba arizo nke zikaba munsu y'izo bikurikirana mu butunzi.

Nk'akarorero, dufate soja, ingano, amasaka n'ibigori. Mu gupima uca uhura ku bigori. Namba ibigori wapimye ikiro 1, amasaka (uburo) uca ugira inusu

²² Régime Alimentaire, Nutrition et Prévention des Maladies Chroniques, P.102

y'ikiro, ingano icakane c'ikiro maze soja nazo ukagira ic'umunani c'ikiro.

Umusururu ugizwe n'amafu ya bene izo ntete zicangacanze muri ubwo buryo kandi zitononekaye muri ubu buryo canke buriya ziba zikwiye. Umuntu ashobora guhora anywa igikombe c'uwo musururu buri gitondo, akawunywa wonyene canke yashizemwo ubuki bw'umutsama. Ariko rero, yokwirinda isukari kuko iyo ari igifungurwa gipfuye giteza amasanganya menshi na cane cane mu gihe akunze kwama ayironka kenshi. Dogiteri **Robert C. Atkins** atugabisha ku vyo ububisha bw'isukari ati: *"Twese turageramiye n'ishirwa hejuru ry'isukari, ico gisebe (plaie) c'igitema, kitibonekeza, c'akaranda ciraye muri kino kinjana turimwo"*²³.

Yongeye kuvuga kuvy'iyi sukari ati : *"Niyo bansi batugeramiye, abicanyi katwa"*.²⁴

b. Imboga

Imboga nazo naho zisanzwe zikenye ibinure n'indemamubiri, kiretse gusa isombe (irara), igisuru (ortie) n'izindi nke zifise indemamubiri, zisanzwe zisohora cane mu nsanganyangaburo (vitamines) n'ivyunyonyu (sels minéraux), na cane cane mu gihe ziriwe ari mbisi canke zinyowe umutobe

²³ La Révolution Diététique du Docteur Atkins, P. 152

²⁴ La Révolution Diététique du Docteur Atkins, P. 303-304

wazikanywemwo utarinze gucishwa ku ziko. Igihe tuvuze imboga rero tuba tuvuze :

Amakaroti, itomati, ishu, irengarenga, ibitunguru, isereri, konkombure (concombre), beterave, epinari, peresile, salade, igisuru, isombe, umukubi (umusogoro), isogo, amababi y'ibirayi n'ayo ipiripiri. No mu gihe umuntu atoba ashoboye kuronka imboga zose, hariho izari zikwiriye kudahara : isombe, igisuru (ortie), ikaroti, igitunguru, epinari, itomati. Ikindi naco, zimwe mw'izo zirashoboye kuribwa mbisi, kandi niho umuntu aba aronse imfungurwa nzima zitishwe n'umuriro.

Imboga mbisi zisukuye neza.

Imboga mbisi zitarimwo imigera y'indwara zoba ziteguye uku gukurikira : Fata imboga wategekaniye (ishu, itomati, ikaroti, igoma ry'igitunguru, igisuru wasoromye ukakirabika amasaha 12 ngo ntikikubabe, n'ibindi. Zironge mu mazi meza uce uzinika mu mazi ukuye ku ziko ariko arabira ziyamaremwo amasegonda 30 (igice c'umunota), zinure uce uzikatagura dutoduto cane ku rutonde rwiza, ubwoko bumwe bumwe bwose ubukate ukwabwo nyene. Zivangire kw'isahani uce ushiramwo ikiyiko c'umutobe w'indimu n'ic'amavuta y'ibihoke (huile de tournesol) kw'isahani imwe, hanyuma uce uzihereza. Gushira umunyu mu mboga mbisi nk'izo ntibikenewe kuko zifitiye umunyu wazo kama. Izo mboga mbisi ziribwa

imbere yo gufungura kandi nta vyamwa vyojana kiretse mu gihe ivyo vyamwa vyoba ari indimu, ivoka canke pome (pomme) gusa. Ibindi vyamwa vyose ntukigere ubirira rimwe n'ingaburo irimwo imboga izo arizo zose, zaba mbisi canke izitetse.

Inkurikizi zo kurira imboga n'ivyamwa icarimwe

Kurya imboga n'ivyamwa icarimwe uretse bimwe 3 birekuwe, bituma imfungurwa zidasebwa neza mu mushishito, uwaziriye agwa mpishi akanatura amangati, eka mbere n'ivyo wafunguye ntibiheze ngo vyinjire mu maraso neza kuko bitanoze. Igihe iyo ngorane woba uyifise, woca uyikosora mu maguru masha kuko ari umuzi w'indwara nyinshi zigeramiye ab'ataco bazi canke abatirinda kandi nyinshi cane muri zo bari bashoboye kuzikingira.

Inkarisha (vinaigre) na mayoneze (mayonaise) mu mboga

Ntukigere ushira inkarisha (vinaigre) mu mfungurwa zawe canke mayoneze (mayonaise). Mayoneze ikorwa mu magi no mu nkarisha. Inkarisha mu mfungurwa ituma zitutumbirana mu mushishito ntizinozwe neza kandi ikagabanya amaraso. Ikindi kandi, hamwe wosuzuma abantu benshi bakoresha cane inkarisha na mayoneze, uzosanga bafise imwe canke zose mw'izo ngorane zibiri. Mu gishingo ca

mayoneze shiramwo ivoka maze inkarisha nayo uyisubirize indimu.

Ivyo bizotuma uronka imboga zuzuye akanovera kandi zirembye, nayo insanganyangaburo (vitamines) n'ivyunyuyu (sels minéraux) uzozironkamwo vyovyo ni igitangaza. Izo mboga mbisi rero, si igifungurwa gisanze, kuko uwaziriye arabaza kugumbiza (constipation) ico arico, urukoba rurembye n'ubwiza bw'urukoba bibarizwa i we, umugore yazikorereje (yazimenyereje) nawe ubwiza buramumara maze umucance wiwe nawe akamwemwe kamusye mu gihe azoba ariko amumwenyurira amwitegereje mu maso. Mbega war'uzi ko ingo nyinshi cane zisamburwa n'imirire mibi. Indya zawe zishobora gutuma utekereza canke usaragurika, ugira ubwiza bw'urukoba n'amaso canke ufutana n'ibindi vyinshi bifise ingaruka mbi ku mubano w'abubatswe.

Kwihereza imboga mbisi nk'izo, bituma umuntu atigera yumva arushe ata mvo na cane cane mu gatondo. Birakinga kandi bikavura ingwara z'amaso, uwaziriye arabaza kumeneka umutwe, inzara ziwe ntizivunagurika, ntavyibuha vy'umurengeraho, agira akamwemwe, zimurinda gukama amaraso no kubura itiro n'ibindi vyiza vyazo vyinshi tutoshobora kudondagura hano. Umugabo w'incabwenge azokwirinda gusuma inyama, ifi, amagi, n'ibindi vyononekariye mu mahinguriro, ariko imboga, intete n'ivyamwa ntibizova mu giseke, mu gihe umukenyezi

w'inkerebutsi kandi yitwararitse urugo rwiwe nawe atazosamara ngo agume azana ku meza imboga zitetse yirengagiye mbisi. Ikindi naco, imboga mbisi n'izitetse zirashobora kujana mu ngaburo imwe atangorane.

Guteka imboga neza.

Nko mu gihe bishitse imboga zigatekwa naho, bisabwa ngo imboga zirongwe neza, zitekwe mu kintu gipfundikirwa kiruma neza kandi ku muriro ubayabaye, utagurumana. Amazi wazitekesheje wokwirinda kuyamena, kandi ntuziteke ngo zishaye ahubwo zigumane akantu ko gukunjagurika.

Icitonderwa : Igihe imboga (n'ibindi vyose bitekwa) zitetswe zipfunduruye, zigatekeshwa umuriro ugurumana, zigashaya, umenye amazi wazitekesheje zitakaza insanganyangaburo (vitamines) n'ivyunyuny (sels minéraux) kandi ivyo nyene ari vyo zikesha akamaro zifise.

Akarorero twobaha, Dogiteri **Ernst Schneider** yemeza ko igihe ufashe ibirayi ukabiharura ugaca ubiteka mu mazi, biza gusha vyatakaje ibice 25 kw'ijana vy'ivyunyuny (sels minéraux) bibirimwo hamwe n'ivy'insanganyaburo (vitamine) C. Igihe wihenze ukabishusha cane hoho, ya nsanganyangaburo C yoyo ica ihasiga amajigo²⁵.

²⁵ La Santé par les Aliments, P. 175

c. Ivyamwa

Ivyamwa navyo ni kimwe mu bifungurwa bikomakomeye Imana yageneye umuntu.

Ingaburo iyo ariyo yose itagira ivyamwa iba ari nkene kandi ni icicaró c'indwara zikomeye mbere z'akayoberabahinga. Ivyamwa biri amoko menshi kandi vyose ntibitunze ibintu bimwe kandi ku rugero rumwe. Nk'uko bisanzwe bimeze ku ntete canke ku ntete zikurira mu mihanyu no ku mboga, tuba dukoze ikosa rikomeye cane igihe twibwiye ko twihereje ivyamwa ariko tukama ku bwoko bumwe. Uko yoba itunze ibigaburira umubiri kwose, ingaburo yose idahindagurwa iba ari nkene. Ivyamwa co kimwe n'ibindi vyose bikwiriye guhindagurwa kugira ngo vyuzuzanye, kugira ngo ivyo utaronse mw'ivoka ubironke mw'ipapayi, ivyo utaronse mw'ipapayi ubironke mu ndimu, gurtyo gurtyo.

Ni ibihe vyamwa nogira nyambere ?

Nk'uko twabivuze, ivyamwa vyose ntibitunze kumwe, kandi muri kino gitabo gito ntihadukundira kwerekana icamwa cose n'ibikigize. Ico dushoboye gusa, turakwereka ivyamwa wogira nyambere kubera ubutunzi bwavyo mu bintu bigaburira umubiri, biwukingira kandi bikawuvura indwara, ivyo na vyo nivyo vy'ibi :

- Indimu
- Mandarine
- Umutima w'impfizi (chérimore)
- Ivoka
- Ipapayi
- Umwembe
- Inanasi
- Umuhwi, ariko mw'ivyo vyose pome (pomme) kikaza imbere ya vyose. Pome bacita « *umwami w'ingaburo y'ibimera* ».

Ikindi naco, abantu benshi cane baratinya indimu bakibwira ko itobagura umushishito, ikamya amaraso, yonona n'amagufa. Ubushakashatsi bumaze kuyikorwako n'abahinga bwasanze ko ivyo birego vyose bihagaze mu vyiyumviro vy'abantu gusa, bidafise ishingiro. Nk'akarorero, **dogiteri Carlos Kozel** atumenyesha ko indimu ivura indwara zibarizwa ku 150 mu mubiri w'umuntu: « *Mu vyamwa bishobora kuvura uburwayi, indimu ifata ikibanza ca mbere kuko bimaze kugaragazwa, ishoboye kuvura indwara 150* ». ²⁶

²⁶ The Science of Natural Healing, P.57.

Akamaro k'ivyamwa.

Bivanye n'uko tudashoboye kudondagura kimwe cose mu mwanya waco, ivyamwa ni isoko rikomeye cane ry'insanganyangaburo (vitamines) n'ivyunyuyu (sels minéraux). Bimwe muri vyo nk'ivoka, birimwo ibinure (graisses) vyiza cane n'indemamubiri (protéines). Ivyo bica bituma ivyamwa biba igifungurwa gikora ibikorwa bihambaye :

Gusohora imyanda mu mubiri.

Mu bisanzwe, igihe cose turya imfungurwa zitetswe, hariho amaside (acides) aca azibonekamwo na cane cane igihe ziba zatetswe nabi zigashaya. Ivyo biza kwunyuka mu gihe mw'iyi ngaburo yawe iba igwiriyemwo indemamubiri nyinshi n'ibinure, na cane cane ibiva mu bikoko (inyama, amagi, ifi, amata n'ibibihinguwemwo). Kurya ivyamwa vyinshi na cane cane kunywa umutobe wavyo nk'uw'indimu, imicungwe, pome n'ibindi, bituma iyo myanda n'iyindi tutavuze isohorwa n'amafyigo mu mwanda muto. Umuntu asigara yumva aguwe neza, atama yumva arushe ata mpamvu.

Kugabanya ubunini bw'umurengera.

Abenshi bishizemwo ko indimu yonyene n'inanasi vyonyene arivyo bigabanya ibunure mu

mubiri. Ukwo ni ukwihenda kutoroshe. Ivyamwa vyose, na cane cane umutobe wavyo ni inzira irashe wocamwo mu gihe wipfuzwa kugabanya umurengera w'ibinure mu mubiri. Si icoroshe kubona umuntu akunze kwihereza ivyamwa n'imboga avyibushye agasesa inda (obèse). Ariko kandi, mu gihe umuntu yihereza ivyo vyamwa ariko agafungura neza ntibituma yonda cane ngo ananuke ahubwo ivyo vyo bitekurura umurengera w'ibinure vyoguteje indwara gusa kandi bikagusiga uguwe neza.

Urukoba n'ubwiza

Umuntu afise amahirwe yo kwironkera amoko atari amwe y'ivyamwa uzosanga amaso yiwe aca ibibatsi kandi urukoba rwiwe ruremye. Ya magaragamba nk'ay' isamaki usanga ku rukoba rw'abantu batari bamwe ntabarizwa aho aherereye.

Kumeneka umutwe no kugumbiza.

Hariho abantu benshi bama bamenetse umutwe. Naho ibituma ari vyinshi, kugumbiza canke kutaja ku mwanda mukuru biboroheye (constipation) ni kimwe mu bituma bikomeye. Kurya ivyamwa (imboga n'intete) birakinga kandi bikavura iyo ngorane, na cane cane ipapayi, umutobe w'indimu, w'imicungwe n'uwa pome. Umuntu yonywa

nk'umutobe w'indimu 10 ku musi yawuvanze n'amazi canke akawunywesha umukenke.

Izindi ngorane bikinga.

Kwihereza ivyamwa vyinshi, bikinga indwara y'umutima, kanseri, amafyigo, urwagasha, kuvirirana amaraso mu menyo kutatewe n'uko hagagiranyemwo imyanda, kuvunika umugongo, muhekenyi (rhumatisme) n'izindi ndwara zigisibije kubwo kutirinda kutamenya no.

Ivyamwa vyoribwa ryari ?

Ivyamwa co kimwe n'imboga mbisi, bikwiriye kwiherezwa imbere yo gufungura atari inyuma y'imfungurwa zitetse. Ivyamwa n'imboga ntibikigere bihurira ku meza yawe kuko ari abansi babiri batemerana, inkuba zibiri zidasangira igicu. Namba mu ngaburo yawe yo mu gitondo waronse ivyamwa, imboga ntizikenewe. Namba sasita uzi ko ivyamwa biza kuboneka ku meza, imboga ntizikenewe kuko vyotera intambara mu mushishito ukagwa mpishi, n'ivyo wariye ntihagire ico bikumarira. Iyo ni imwe mu mpamvu ituma abenshi bakunze gutura amangati, bakuzura inda kuko bavangavanga amoko menshi y'ibitajana mu ngaburo imwe. Ivoka, indimu na Pome, nivyo vyamwa vyonyene ushobora kurira rimwe n'imboga ntihagire ico bigutwara.

Umutobe w'indimu, w'umucungwe, mandarine canke uwa pomme, nico kinyobwa ciza ukuye amazi. Mu gihe abenshi cane basinzikajwe n'indwara n'ubumuga baterwa n'amafanta, icayi n'ikawa, inzoga zambiyeye n'ibindi binyobwa biteguye nabi kubwo kutamenya no kutirinda, kwinywera umutobe w'ivyamwa udatetse kandi utongewemwo isukari, bizokubera isoko ry'amagara meza bikurinde n'ubumuga bugeramiye abimbisha imva zabo amenyo.

“Umutobe wa pome utavanze, utarimwo umwambiro, ni ikinyobwa kiryoshe cane. Ariko ibinyobwa vyinshi birimwo alukolo biriko binyobwa ku bwinshi uno munsu, biba birimwo ibindi bikwega urupfu... Fata icamwa abe arico ugira umugabane w'ingaburo yawe co gushirwa ku meza yawe, kibe arico kigira ingaburo. Umutobe w'ivyamwa bijaniranye n'umukate w'ingano (pain complet) uzosanga ari igitangaza. Icamwa gihishiye, ciza kitaboze nico kintu twari dukwiriye gushimira Imana, kuko ari ngirakamaro cane ku magara”²⁷.

d. Indunduro

Ingaburo igizwe n'intete (céréales) : umuceri utera, ingano zitononekariye mu mahinguriro, amasaka, uburo, ibigori, ububage n'ibindi nk'ivyo, intete zikurira mu mihanyu (légumineuses), ibiharage,

²⁷ Ellen G. White, Counsels on Diet and Foods, PP. 436-437

ubwishaza, soja, inkore, ubusharuzo, ubulantiye (lentilles) n'ibindi nk'ivyo, ivyamwa n'imboga hamwe rero n'inazi, ni ingaburo ifise ibintu vyose dukenera mu mfungurwa umubiri ukenera. Reka rero kwibwira ko ingaburo nk'iyi ari ingaburo nkene itotunga umuntu. Ikindi naco, iyi niyo ngaburo yatanze n'Umuhinga rurangiranwa mu vy'ingaburo wa kera cane akaba ari nawe yigishije ivy'ingaburo abantu ba kino gihe²⁸.

Mw'iyi ngaburo igizwe n'ibimera gusa, wirinde ibintu vyononekariye mu mahinguriro nk'amavuta yose uzosanga yanditsweko ngo "huile raffinée" (refined oil, pure vegetable oil). Ayo mavuta aba yaratakaje ibigize igiterwa yahinguwemwo, aba ari igifungurwa gipfuye nk'uko Dogiteri **Ernst Schneider** ayita. Nico kimwe n'ikintu cose cakozwe muri irya fu (farine) yera yitirirwa ingano kandi idasa n'ingano. Izo ni imfungurwa z'inyiganano, zishushanya n'ibimera zahinguwemwo kandi zarapfuye. Zimeze nk'inoti y'inyiganano itazwi na Reta ariko ikaba isa n'izindi.

Norya ibingana gute ?

"Norya ibingana gute" ? Ni ikibazo gikunze kubazwa kenshi. Ariko kandi yaba **Ellen G. White** canke abandi bahinga banonosoye ivy'ingaburo, basanga ko ata rugero rudahinduka wogenera abantu

²⁸ Bibiliya Yera, Itanguriro 1 :29

bose mu vyo ingaburo. Uwitwa **Raul Escobar** avuga ati : *“Mu gihe umushishito wacu ata dirisha ufise ryo kurabiramwo ngo tubone ko twariye ibihagije, dukeneye gukoresha ubwenge ngo biturinde kurenza urugero”*²⁹.

Kumenya urugero rw’ivyo twihereza birahambaye cane kuko ibihimba vyacu bihingura imfungurwa (umushishito, urura ruto, igitigu n’urwagasha) bifise uruhara ruhambaye cane mu gutuma tugumana amagara meza. Igihe rero twihereje imfungurwa zirenze izo umubiri ukeneye, vya bihimba biraruha, bigacobogora maze bikagwara. Kandi igihe hagize na kimwe co muri vyo gisinzikara, umubiri wose uba urwaye. Igihe umuntu ariye intica ntikize naho, ku birabana n’urugero canke agaciro k’ivyo dufungura, umubiri urahambarira ibara kuko ukenera gukoresha inkomezi utashoboye guhabwa na bene iyo ngaburo atako yifashe. Ivyo biza kwunyuka mu gihe umuntu ariye intica ntikize canke ingaburo ataco imariye umubiri kandi akora ibikorwa bisaba inguvu canke ingendo ndende. Nk’akarorero, igihe umuntu akora ibikorwa ku murango atafunguye mu gatondo, isukari ishobora kumuherana mu mubiri. Kugirango ntagire isanganya ryo kuzimira ubwenge no kuraba, umubiri uca ufata ibinure n’indemamubiri vyo muri we ukabihinduramwo isukari itanga inguvu (glycogène). Umuntu ashishikara kubaho ariko

²⁹ Better Way to Health, P.14

akagenda ashira umunywera. Umuntu rero yorya gushika aho yumva ko ahaze ariko adafoye amabondo kandi ntarinde kuva ku meza kuko akayabagu gaheze. **Dogiteri Atkins** ati : *“Abarya bike nibo benshi cane kuruta abarya umurengera”*.

Norya ryari ?

Imisi yose, umuntu yokwirinda kurya adashonje, kuko inzara ni ikimenyetso c’uko umushishito uba witeguye kwakira ibifungurwa kandi ukabisya neza ngo vyubake umubiri. Igihe umuntu afise umushishito ukora neza, igihe imfungurwa zitarunzemwo ibinure, mayoneze, vinaigre canke amafiriti, igihe zitagizwe n’uruvangatirane rw’amoko arenze 3 y’ibifungurwa bidasa, igihe utabiriye hakanye canke ubabaye, igihe ibifungurwa vyakanjwe neza mu kanwa maze ntibipfe guhenagurirwa munda kubera ukwihutagiza canke umunoho, umuntu atagwaye amenyo canke ngo ivyo ariye abijoborore mu kuca anywa amazi ariko ararya, ibifungurwa bitwara amasaha 3 gushika kuri 4 ngo bibone kunoga mu mushishito. Nta kantu na gato kari gakwiriye kuribwa ico kiringo kitarahera. Kanatsinda umushishito, co kimwe n’ibindi bihimba vy’umubiri, urakenera ikiruhuko imbere y’uko usubira guhabwa uwundi mutwaro.

Norya kangahe ku musi ?

Kugira ngo imfungurwa zisebwe neza mu mushishito kandi zigire ico zimariye umubiri, hariho ibintu bine bitegerezwa kwubahirizwa :

1. Ryana ubwitonzi, utihutagiza.
2. Kanja neza unoze imfungurwa n'imiburiburi incuro 32 muri rusangi.
3. Reka amate avangane n'imfungurwa ari menshi kuko arimwo ibituma zisebwa neza (enzymes digestives) kandi bigakingira umushishito kwisya (mucus).
4. Irinde kurya uhagaritse umutima canke ubabaye.

Igihe imfungurwa zikanjwe neza zikavangwa n'amate menshi zizosyebwa neza mu mushishito. Iryo bizotuma umushishito nawo utaruha kandi n'izo ndya nazo zinjire mu maraso kwubaka umubiri namba zidasanzwe zarapfuye. Kugira ngo ivyo bishoboke rero, umenye ko uko wifashe uriko urafungura arikwo gutuma amate aboneka ari menshi canke make. Kurya uhagaritse umutima canke ubabaye, ubwonko buca bugira ingorane yo gutegeka uduhimba tuba munsu y'ururimi ngo dutange amate agwiriye. Iryo bizotuma indya zisebwa nabi mu mushishito eka

mbere n’umushishito urware, bice bigira ingaruka ku bihimba vyose vy’umubiri. Erega ibisa bityo Salomo yari yaravyigishijwe n’Imana aho yavyandika ati :*“Umutima unezerewe ni umuti ukiza, ariko umutima ubabaye wumisha amagufa »*³⁰. Incuro umuntu yorya n’urugero rw’ivyo yorya ku musi rero bitegerezwa kwisunga ibi bintu bikurikira:

- Ibikorwa akora
- Imyaka yiwe
- Ibihe arimwo

Ivyo birahambaye cane kumenywa kuko hariho amabi menshi ashikira umubiri aterwa n’uko umuntu yafunguye ibitamubereye no kubihe bitabereye.

a. Ibikorwa akora.

Mu gihe umuntu akora ibikorwa bisaba inkomezi : umurimy, umubaji, uwugendesha ikinga, uwugendesha amaguru igihe kire kire n’abandi nk’abo, vyoba vyiza ariye incuro 3 ku musi, mu gitondo nk’isaha imwe agahaga cane, isaha zitandatu agahaga ibindi navyo akavyihereza ku mugoroba amasaha 3 imbere yo kuja kuryama. Kuvyihereza isaha icumi n’imwe canke incumi na zibiri vyoba ari vyiza. Nko mu gihe bene iyo ngaburo yoba igizwe na zino imfungurwa: ibiharage, ingano, ubwishaza, ibigori, soja, ibiyoba, imboga n’ivyamwa maze ibindi

³⁰ Bibiliya Yera, Imigani 17 : 22.

navyo bikaza vyuhira, inkomezi umubiri ukoresha zica zisubirizwa bikakurinda kwonda hamwe n'ingaruka mbi bigendana. Abantu badakoresha cane umubiri borya kabiri ku musi, mu gitondo no ku mugoroba ariko ingaburo ya kabiri ikiherezwa amasaha atatu imbere yo kuja kuryama.

b. Imyaka yiwe n'ibihe arimwo.

Ivyo umubiri ukenera ku musi, bitegerezwa guhwana n'imyaka yiwe. Abana bagikura, abagore bonsa n'abibungenze bakwiriye kwitwararikwa cane bakihereza ibifungurwa n'ibinyobwa bihagije kuko umubiri w'umwana usaba vyinshi kugira ngo ukure n'umugore yibungenze canke yonsa nawe aba agaburira babiri. Iyo tuvuze ko abo bantu bakenera vyinshi, ntituba tuvuze ngo nibame bariko barisenena canke barya buri kanya canke ngo barye bafunereze, ahubwo tuba tuvuze ngo abana bamaze kurya bashobora kurya incuro 4 ku musi, abagore bibungenze n'abonsa nabo bakarya gatatu kandi bakihereza imfungurwa ngirakamaro nk'izo twerekanye. Hariho abana benshi bavuka ari ibimuga canke ari amayoberane mu bundi buryo kandi Imana itabifisemwo uruhara, ahubwo vyavuye ku makosa yakozwe mu mirire ya ba nyina babo. Nk'akarorero, igihe umwana abuze insanganyangaburo (vitamines) A na D, aca azingama kandi n'amagufa yiwe ntaheza ngo akure.

Mu ngaburo y'umugore yibungenze canke yonsa ibi bintu ntivyari bikwiriye kubura : Umusururu w'isoya, ingano, amasaka n'uburo, ibigori biseku

ye canke yisyeshereje atari amafu yaguriye mw'isoko, narirya amafu menshi aba yarapfuye. Akarorero, ifu y'ingano itangura guta agaciro ku musi ugira 8 uherye umusi yasyereweko. Inyuma y'ayo mezi hoho iba isigaye ari imburakimazi. Ibindi bitobura ni ibiyoba bidakaranze, ivoka, inazi, imboga n'ivyamwa bitandukanye. Ibihe vyo kurirako bikwiriye kwubahirizwa, incuro 3 ku muntu akora ibikorwa vy'inguvu, incuro 3 ku mugore yibungenze canke yonsa, incuro 3 canke 4 ku mwana agikura. Hagati y'ivyo bihe, nta kantu kari gakwiriye kuribwa. Kuryagagura canke kwama umuntu apfa utwo atoraguye, bituma umushishito uruha bigatera kugwa mpishi, kandi bigateza ibikomere vyo mu mushishito.

Ellen G. White atugabisha kw'ako kamenyero kagayitse gatuma urusengero rwa mpwemu yera rufutana, ati : *“Mu gihe uhejeje kurya ku gihe cagenywe, umushishito ukwiriye guhabwa akaruhuko k'amasaha atanu. Nta n'akavunguka k'ivyo kurya kari gakwiriye kwinjizwa mu mushishito gushika igihe c'iyindi ngaburo kigeze. Mur'ico kiringo, umushishito uzoba uriko urarangura igikorwa cawo, hanyuma ube witeguye kwakira ibindi bifungurwa”*³¹.

“Ndatangazwa no kwumva ko benshi bo muri mwebwe baryagagura kandi bamaze guhabwa umuco

³¹ Counsels on Diet and Foods, P. 179

*uraho ! Ntiwari ukwiriye kwigera ureka ngo hagire n'akavunguka kinjira mu kanwa kawe hagati y'ibihe vyawe vyo kurirako. Rya ivyo ukwiriye kurya, ariko rero ubirire ku bihe vyavyo, hanyuma ubone kurindira ikindi gihe co kurirako ko kigera.”*³²

*“Ingendo yo kurya kabiri gusa ku musu niyo usanga ibereye amagara ; ariko rero mu bihe bimwe, abantu barashobora gukenere ingaburo igira gatatu. Ariko kandi, hamwe iyo yoramuka yiherejwe naho, yategerezwa kuba yoroshe cane, kandi igizwe n'ibifungurwa bidateba mu nda”.*³³

³² Counsels on Diet and Foods, p. 180.

³³ Counsels on Diet and Foods, p. 176.

Imfungurwa zo kugirwa nyambere

SOYA

Soya ni igiterwa c'intete gikomoka mu Bushinwa. Gishobora gukura gushika ku burebure bw'imetero 1. Zifise amoko atari amwe: hariho izo usanga intete zazo zirabura, zera, canke zitukura co kimwe n'umuceri. Soya zimaze imyaka irenga ibihumbi 2 ari igifungurwa ciganje mu ngaburo y'abanya Aziya yo mu bumanuko bushira ubuseruko ari naho usanga ivyo gufungura inyama, amagi n'amata atari agaharawe. Abo bantu babitewe no kurya igifungurwa ca Soya, nta ngorane bigera bagira ifatiye ku kubura ibikwiriye mu mibiri yabo. Ico gifungurwa ca soya rero abantu batari bake mbere barimwo n'abahinga mu vy'ingaburo n'amagara y'abantu basanze ko soya atari igifungurwa co kwitiranya n'ikindi gifungurwa ic'ari co cose kibaho kw'isi ahubwo ari igifungurwa cari gikwiriye guhabwa ikibanza caco kikibereye mu ngaburo y'umuntu wese yipfuzza kugira amagara meza.

Dogiteri **Georges Pamplona Roger** avuga ku gifungurwa ca soya ati : « *ni umwami w'ingaburo y'ibimera .»* Dogiteri **Ernst Schneider** ahayagiza ico gifungurwa c'igitangaza ca soya ati : « *Kubera agaciro kadasanzwe k'ivyo zinjiza, soya zari zikwiriye kuronka ikibanza ca buri munsu mu ngaburo ya minsu yose ku barwayi b'igituntu, ba kanseri, bakamye amaraso*

(anémiques), barwaye indwara zandukira (infections) hamwe n'abasinzikajwe n'imirire mibi ». Dogiteri **Carlos Kozel** nawe yashimagije ico gifungurwa c'igitangaza ati : « Ntabwo ari ikigoye kuririmbira soja indirimbo y'ishimwe. Amashimwe yo gushimagiza soja yaririmbwe n'abantu bazimenye mu binjana vyinshi vyashize maze muri zo bakahavumbura ivy'agaciro vyinshi ».

Ibigize soya

- Soya ziragwiriye indemamubiri (protéines) nyinshi kandi z'igiciro mu mubiri gushika naho ibice mirongine kw'ijana (40%) vy'ibigize soya vyose ari indemamubiri (protéines) mu gihe indemamubiri usanga zifise ya ma aside amine (acides aminés) yubatswe indemamubiri.
- Soya zifise urugero ruhambaye n'ibinure vyorohera umubiri guhingura no gukoresha (acides gras insaturés) ibice mirongibiri kw'ijana (20%) muri vyo hakaba harimwo n'ivyo bita aside linoleyike (acide linoléique) ifise uruhara ruhambaye mu mubiri w'umuntu na cane cane mu bihimba vyo mu mutwe :
- Ituma umubiri ukura
- Itunganya ibihimba vyo mu mutwe
- Iremarema kandi igatuma urukoba, umushatsi n'inzara bigumana itoto n'ibindi.

Soya kandi irafise ivyo bita lesitine (lécithine) bishika ku bice mirongibiri na bitanu kw'ijana (25%). Iyo lesitine ifise uruhara rudasanze mu gutuma ibihimba vyo mu mutwe bikora neza, bigatuma ca kinure kibi kolesterole (Cholésterol L.D.L.) kigabanuka mu maraso bigatera igitigu gukora neza eka mbere hariho n'abahinga mu vy'ingaburo bemeza ko iyo lesitine ifasha mw'ihingurwa ry'ibinure mu mubiri³⁴. Indemamubiri (protéines) zo muri soja zigereranywa n'izo mu nyama dufatiye ku co zimaze mu mubiri gushika no ku rugero rw'uko zishobora no gusubirira inyama. Imicuko, kuko ikeneye kw'injiza indemamubiri nyinshi, ishobora gukura neza ata ngorane mu gihe yoba ihawe amata ahinguwe muri soya.

Dogiteri **Georges Pamplona Roger** yemeza ko soya ari igifungurwa cinjiza ibintu vyinshi cane bigaburira umubiri ku buryo mbere atari na nkenerwa kubirenzamwo urugero canke kwama waziriye uko bukeye uko bwije.

- Indemamubiri (protéines) ziva muri soya zirasumba iziva mu nyama kuko zifise ama aside amine nk'ay'inyama ariko muri yo hakaba hatigera haboneka ya myanda itera indwara mu mubiri yitwa aside irike (acide urique). Iyo aside irike niyo itera indwara nyinshi nka gute (Goute), muhekenyi (Rhumatisme) n'izindi. Iyo nayo isanzwe igwiriye mu mfungurwa ziva mu bikoko kandi ikaba iboneka no mu biyoba bikaranze.

³⁴ Text Book of Biochemistry, Sixth Edition p.38

- Indemamubiri zo muri soya kandi ntizigera zibonekamwo ya myanda bita pirine (Purines) na amoniyake (Amoniaque) nk'uko isanzwe iboneka mu ndemamubiri ziva mu bikoko, isukari iboneka muri soya ni iy'agaciro cane kandi irashoboye no kwihanganirwa n'abarwayi ba diyabete kuko itarimwo bwa bwoko bwa ya sukari igumye bita amido (Amidon) idashobora kuyonzwa n'imyanya ibishinzwe y'uwo murwayi. Soya kandi ziratanze cane ya sukari bita seliloze (cellulose) ibuza ikinure kibi koresterole (Cholestérol L.D.L.) kugwirirana mu maraso kuko ikizibira ngo nticingire ku bwinshi giciye mu rura ruto. Iyo sukari isanzwe isohora n'iyindi myanda mu mubiri igakinga kanseri, ikabuza ingorane yo kugumbiza (constipation) n'ibindi.
- Soya ntabwo zirundanyemwo insanganya-ngaburo zo mu mugwi wa B gusa ahubwo kandi ziranagwiriyemwo A, B₁, B₂, D, E na K. Ziragwiriyemwo kandi ivyunyunyuye vyinshi kubera ko izuba "Nyina w'ubuzima" ryazihaye ivyunyunyuye vy'agaciro nka kalisiyumu, fosiforo, manyeziyumu.... ivyo navyo akaba ari ibituma soya iba imfungurwa yuzuye kandi ngirakamaro cane ku magara y'abantu.
- Soya rero zirashobora kuribwa n'abantu bafise imitsi yarushe igacobogora cane cane bitewe na lesitine irimwo ibinure hamwe n'icunyunyuye fosiforo kuko ivyo bitera igihimba c'umutwe, igitugu, amagufa, amenyo n'ibindi kumererwa neza. Indemamubiri (protéines) hamwe n'ibinure (graisses) vyiganje muri soya

vyatumye abantu bo hambere bemera ko soya ari igifungurwa c'ijunja gishobora gusubirira inyama, amagi, amata, amafi hamwe n'ibikozwe muri ivyo. Kubw'ivyo abakera barategura ifu ya soya bakayihinguramwo imfungurwa z'uburyo atari bumwe: isupu, umusururu (ubuyi), ibirungo vy'ibifungurwa, imikate nko mu gihe baba bayivanze n'ayandi mafu hamwe rero n'amata ya soya.

Kubw'ico gifungurwa ca soya, abanyagihugu bo muri aziya (imwe mu migabane 5 igize isi) benshi cane barashoboye guheba inyama, amata, amaforomaji. Ibihugu bigize Aziya vyimbura soya zishika ku matoni imiliyoni 7 gushika 8 ya soya ku mwaka. Kugira tumenye agaciro soya zifise mu ngaburo yikwije, reka mumenye canke mwibuke ko amagarama 500 (inusu y'ikiro) y'intete za soya arimwo ibinure (graisses) hamwe n'indemamubiri (protéines) bingana n'ivyo twosanga mu malitiro 3,75l y'amata y'inka canke mu magi 27 ³⁵.

Soya ni igifungurwa gitunze rwose na cane cane ku bantu batunzwe n'ingaburo y'ibimera gusa. Amata ya soja arashoboye gusubirira ayandi mata yose, eka mbere n'aho hoba ku bana bato. Kubera ko zigaburira umubiri ku buryo budasanzwe; Dogiteri **Ernst Schneider** asaba ko soja zitokwigera zihara ku meza y'abagwayi b'igituntu, kanseri, abakamye amaraso, abananutse kubera gufungura nabi hamwe n'abagwayi ba kwashi.

³⁵ La santé par les aliments page 109

Soya ni igifungurwa kibereye na cane cane abarwaye indwara zisaba ingaburo itashizemwo umunyu na ca kinure kibi kolesterole (Cholestérol L.D.L) nk'amafyigo, indwara y'umuvuduko w'umurindi w'amaraso (hypertension artérielle), y'amahere n'ibindi. Indwara zo kwipfundapfundika kw'amaraso akamera nk'udutete tw'umusenye mu mafyigo (calculs rénaux), mu gasaho k'indurwe (calculs biliaires), mu mitsi itembereza amaraso (thromboses artérielles), mu mitsi yo mu bwonko (thrombose cérébrale), muhekenye (rhumatisme) ikomantara n'ikoberana ry'imitsi itembereza amaraso (artériosclérose), diyabete, kwuzura amazi musu y'urukoba gushika naho umuntu avyimbagana ibice bimwe bimwe vy'umubiri (oedèmes), igitigu (affections hépatiques) n'izindi.

Uwitwa **Shellong** yarerekanye neza ko ufashe umurwayi wa diyabete y'igisukari ukamugaburira soya, bifise ububasha bwo kugabanya isukari yo mu maraso (Glycémie) no kuyasohoramwo aside yatewe no kwandura kw'amaraso.

Uburyo bwiza rero ni ukudakoresha ifu ya soya iva hanze ukirinda aya mafu agurwa mw'isoko kuko akenshi aba yaramaze kwononekara cane.

Dogiteri **Carlos Kozel** avuga ko tudakwiriye kwigera twizigira ifu ya soya mu gihe itavuye aho tumenyereye. Ifu yitwa ngo ni iya soya iva hanze mu bindi bihugu akenshi iba yarambuwe ivya ngombwa

vyayo, kugira ngo turonke ifu nziza rero umuntu n'ukwironkera intete tukazisekurira maze tukaziyoungurura.

Dogiteri **Kozel** abandanya ahimiriza amaleta y'ibihugu vyose kwijukira kurimisha ico giterwa ahantu hose kuko kizanira ibihugu ingaburo ibereye abanyagihugu bavyo. Ikindi kandi soja ntitura isi irimwe ko (nk'uko bisanzwe bikorwa n'ibindi biterwa bimwe bimwe), ahubwo nyabuna zozo ziraheza zikayisigira ibitabizo vy'icunyunyu azote (Nitrogen)³⁶. Abantu bipfuza ico basubiriza indemamubiri n'ibinure vyo mu nyama, mu mata hamwe no mu magi, hamwe boramuka baronse soya ni bace biruhutsa bavuge bati ashiiiiii !

Bosanga ko soya ari igitangaza ko zitanga amagara meza ariko kandi zozo zikaba ata mabi nk'ay'inyama zifise.

KUKI SOJA ZIRUTA INYAMA ?

INYAMA			SOYA
Zirimwo	ibinure	bibi	Ntabinure bibi kolesterole zifise
Zirimwo	imyanda	aside irike	Nta myanda aside irike zifise
Zirimwo	imyanda	ire (urée)	Nta myanda ire (urée) zifise
Zirimwo	imyanda	pirine (purines)	Nta myanda pirine zifise
Zirimwo	imyanda	amoniya	Nta myanda amoniya

³⁶ The science of Natural Healing, p90

(ammoniaque)

Zitera indwara nyinshi cane nk'umutima, diyabete, gute(goute), kanseri, iziba ry'imitsi, amafyigo n'izindi..

zifise

Aho guteza indwara zirazivura kandi zikazikinga

Ufashe soya ukazigaburira igitungwa, kirakomera cane kigatanga amata menshi kandi y'agaciro. Ufashe umurwayi wa kwashi ukamugaburira ibikozwe muri soya, inyuma y'imisi mike, usigara uraba ya mishatsi yabenje, ya maguru, inda no mu maso havyimbaganye, ukayoberwa iyo vyagiye. Mbega hari n'umwe ayobewe n'abagiraneza mu gihe bariko baravura abana canke abakuze basinzikajwe na kwashi hamwe n'izindi ndwara zishingiye ku mirire mibi ko babaha umusururu ugizwe n'ifu ya soja, ibigori n'amavuta ? Hariho umunsi n'umwe bararinda kuzana amagi, inyama canke amafi ngo bondagure amagara y'impunzi zibayeho nabi mu vy'imirire ?

Soya rero ni igifungurwa c'igitangaza ku barwayi ba diyabete, abantu bananutse kubera imirire ataco yinjiza mu mubiri, abafise imishishito y'iminyantega nke ugasanga iyo bariye biguma vyuzuye inda ntibihoke.

Dogiteri Carlos Kozel atumenyesha ko ikiro 1 c'ifu y'isoya kirimwo indemamubiri zingana n'iziva mu magi 70 canke mu biro 3 vy'inyama³⁷.

³⁷ The Science of Natural Healing p.91

Ivyo twohingura mu ntete za soya

1. Kuzihekenya nk'ibiyoba

Uhengera harya ku mugoroba ukazinika mu mazi azirengeye zikayararamwo.

Bukeye uca uzironga neza ugaca uzishira ku kazuba zigakamuka amazi. Ca uzikaranga ku muriro ubayabaye nka kurya bakaranga ibiyoba. Harya zimaze gufata irangi ushobora gutoba akunyu gake mu tuzi duke ukazisukako zikiri ku ziko ukazigaragura gushika zumye neza. Ca uzishira mu kirahure hanyuma ushobora guhekenya harya uhejeje gufungura.

Icitonderwa

Kirazira kuzikaranga mu kintu canke kuzikarangisha ikintu gishobora kugwa ingese nk'icuma. Nko mu gihe naho utazinitse amasaha 12 (ijoro ryose) mu mazi, ushobora kubanza kuziteka ku ziko iminota mirongo 30 ziriko zirabira.

Ico bivyara:

Igihe uzinitse canke ukaziteka mu mazi mw'ubwo buryo bituma zitakaza aside atari nziza kandi ntizigumarara inyuma y'ukuzikaranga. Zirongera kandi zigahindura n'akamoto.

2. Amata ya soya.

Uhengera harya ku mugoroba ukinika intete za soya mu mazi azirengeye bikararana ijoro ryose bukeye mu gitondo ugaca uzironga neza hanyuma ukazisekura mw'isekuro gushika zinoze neza. Ico gihe uba wibangikaniye amazi ibirahure 5 canke 6 vy'amazi bihura n'ikirahure 1 ca soya. Uraheza rero ugafata bimwe wasekuye ukabironga ukabisubiza mw'isekuro gurtyo gurtyo gushika hasigaye ibikumbi gusa. Ca urondera igitambara ciza uminine ayo mazi hanyuma uce uyashira ku ziko. Bisaba uyabe hafi kuko bibira bigasesa kurya kw'amata y'inka. Mu gihe bibize uce uhuha bigasubiza hasi, hanyuma ubonye bisubiye kubira ugaca uterura.

Ico gihe rero uba uronse amata ya soja. Ushobora kuyanywa washizemwo n'ubuki (ikiyiko 1) canke isukari. Nko mugihe woba ugomba kuyagira ikivuguto naho, woca uyashingura ahantu hakanye cane (nko muri frigo) canke ahandi akamara nk'amasaha 12, bivana n'urugero bw'ubukanye bw'aho hantu.

Nko mugihe bitoba bikworoheye nko kuzisekura mw'isekuro, naho wofata intete winitse canke ugateka muri bwa buryo twavuga, ukazijana kuzisekuza ku mashini. Umaze kuronka ifu urayifata ukayitoba mu mazi mabisi (ikirahuri c'ifu ku birahuri 6 vy'amazi).

Fata igitambara ciza kitagira intoboro ube arico umininisha.

Teka ku ziko bibire hanyuma biduze ubwa mbere uce uhuha bisubize hasi. Uze guterura bisubiye kuduga ubwakabiri. Ico gihe rero uzoba uronse amata. Ariko kandi wibuke ko bene ayo mata hari ivyo yatakaje biruta ivyo isoya zasekuwe mw'isekuro.

3.Ifomaji ya soya

Uhengera harya amata atanguye kubira ugaca usukamwo umutobe w'indimu nko mu birahuri 6 vy'amata wosukamwo umutobe ukanywe mu ndimu zine. Ico gihe amazi aca aja ukwayo, ibigize isoja navyo bikaja ukwavyo. Terura ukure ku ziko ube wateguye igitambara gishobora kuva amazi uce ufata ivyo ukuye ku ziko uce usuka muri ico gitambara maze uce uvyeneneka hejuru kugira ngo amazi yose akamuke neza.

Igihe ibisigaye vyumutse, ca ubishira ku kintu nk'isiniya ni waba ufise nk'akarorero akunyu n'ibirungo ufise uce ubivangavanga. Mu nyuma ca ubibumbabumba uko wipfuza ariko ukagira ikingana n'ikigigu c'inyama bakaranga, ca ushira amavuta ku ziko uce ukaranga kurya bakaranga inyama gushika bizanye irangi. Nyuma naho ca ubikorera isupu uko ugomba, hanyuma uzoba uronse ifomaji ya soya. Iyo fomaji rero, niyo abantu bo mu bihugu vyinshi

bahevye inyama n'ibindi biva mu bikoko babisubiriza kuko iba irimwo ibinure n'indemamubiri hamwe n'ibindi umubiri ukenera ku rugero rushimishije.

4. Inyama za soya

Mu gutegura inyama za soya , bafata ca gikandu wakanya ukakivanga na vya bikamvu wakuramwo ibiza kuba amata bikiri mu mazi mabisi, imbere y'uko ubiteka. Uhejeje kubivanga neza, uca ukora nko kw'iforomaji mu gushiramwo ibirungo imbere y'uko ubitegurira isupu bikwiranye.

Icitonderwa

Abantu bipfuza ingaburo yo kuganuka ubunini bokwirinda soya cane canke ikindi kintu cose gikozwe muri zo.

IBIHARAGE VYUMYE

Burya n’aho abantu benshi cane batabizi, ibiharage vyumye navyo n’igifungurwa gihambaye cane mu ngaburo y’ibimera. Tubishize mu giharuzo (Tableau) wosanga ko biri mu bifungurwa bikomakomeye cane mu ngaburo y’ibimera.

Amagarama 100 y’ibiharage vyumye arimwo amagarama 22 y’indemamubiri (protéines), hamwe n’amagarama 62 y’isukari, ivyo bikaba vyababanwa n’ibiri mu bwishaza busatuye (pois cassés) no mu malantiye. Amagarama 100 y’ibiharage vyumye atanga intanganguvu (calories) 350 ari nazo umuntu akenera ku munsu. Ivyo rero, bituma ibiharage biba igifungurwa c’agaciro mu mubiri w’umuntu. Ikindi naco, ibiharage vyumye bisanzwe vyisohora ku vyunyonyu bikomakomeye nka kalisiyumu, Manyeziyumu, fere, kwivre hamwe na manganeze. Ivyo biharage vyumye kandi biratunze cane insanganyangaburo A, B₁, B₂ na C. Ariko kandi hariho n’ibindi bintu bihambaye bituma ibiharage vyumye na cane cane birya vyera, biba igifungurwa c’ijunja mu ngaburo ibereye, ivyo navyo bikaba ari aside nikotinike (acide nicotinique). Iyo aside nikotinike ifasha mu kugira ngo umubiri uhingure isukari wakira, ibinure hamwe na alukolo. Iyo aside nikotinike kandi ni kirumara ku barwaye indwara zo gukama amaraso (anémies) tutibagiye n’uko abahinga basanze ko

ibihimba vyakira bigahingura ibifungurwa (appareil digestif), urukoba hamwe n'ibihimba vyo mu mutwe biheza bikarangura neza ibikorwa bijejwe.

Nk'uko kandi bisanzwe bimeze ku bwishaza, ku makaroti, kuri shuflere, soja, ku gisuru, ku mwambiro (levure), ku ntete, ku nazi, ku magi no ku gitigu; ni nako n'ibiharage vyumye bigwiriye aside pantotenike (acide panthothénique). Iyo aside rero ifise uruhara mu kurwanya uburozi (toxines) bwinjiye mu mubiri butewe n'ubumara canke imiti. Irafise kandi n'uruhara ruhambaye cane mu gutuma indemamubiri (protéines) n'ibinure (graisses) bihingurwa neza mu mubiri, bikingira urukoba kandi bigatuma umushatsi ukura neza; aho rero tugaca tubona ko ibiharage bitagaburira umubiri mu buryo buhambaye gusa ahubwo si n'igifungurwa co gufata minenerwe ku bantu bipfuzira umutekano imibiri yabo.

Dogiteri **Ernst Schneider** adusaba ko dukwiriye kugira inama abantu barwaye indwara zifatye ku mirire mibi, mu gukama amaraso, ibihimba vyo mu nda bikora nabi, abarwaye indwara z'urukoba n'amahere n'ibindi, abahema nabi, abarwaye indwara z'urukoba, amahere yo ku rukoba atari amwe, abarwaye indwara yo kuvunguka umushatsi, abafise umushatsi udakura n'ibindi ngo bahore bihereza na ntaryo ico gifungurwa c'igitangaza: ibiharage vyumye.

Dogiteri **Pamplona Roger** yemeza ko uretse ko mu biharage (vyumye) harimwo insanganyangaburo (vitamines) A, B na C hamwe n'ivyunyuny, birimwo

kandi na ya sukari idasanzwe bita seliloze (celluloses) mukibuka ko iyo sukari isanzwe ikora igikorwa kidasanzwe mu mubiri w'umuntu. Ikora igikorwa c'umukubuzo mu kwegeranya imyanda yo mu rura ruto ikayibuza kwinjira mu maraso maze igaca iyegeraniriza mu rura rukuru (gros intestin) kugira ngo ize gusohokana n'umwanda mukuru.

- isukari idasanzwe seluloze ibuza ca kinure kibi kolesterore (cholésterol L.D.L.) kwinjira mu maraso ku bwinshi biciye mu rura ruto.
- Iyo sukari ikinga kanseri y'urura rukuru (cancer du côlon) n'ibindi vyinshi.

Ibiharage vyumye kandi bifise isukari itanga inguvu nyinshi mu mubiri (amidon) ariko kandi ben'iyi sukari ntishobora kwihanganirwa n'abarwayi ba diyabete. Muri rusangi rero, Dogiteri **Pamplona** asanga ko ibiharage bifise ibikorwa bitatu bihambaye mu mubiri :

1. *Gusohora imyanda mu mubiri*: bitewe n'ivyunyunyu vyavyo hamwe n'ivyo bita arijinine(arginine), ibiharage birashoboye gusohora imyanda iri mu mubiri ariko ntibica bituma ca cunyunyu potasiyumu gisohoka naco nk'uko bisanzwe bikorwa n'imiti y'ikizungu. Ivyo rero ni ngirakamaro nko mu gihe amaguru canke ibindi bice vy'umubiri biviyimbishwa n'amazi yiretse musu y'urukoba (oedèmes), bitewe n'uko umutima canke amafyigo bidakora neza ico bijejwe. Ibishishwa vy'ibiharage kandi birakoreshwa mu kuvura indwara ya gute

(goute) hamwe no mu gihe amaraso yipfundapfunditse nk'udutete tw'umusenyi mu mafyigo (lithiasse urinaire), kuko bisohora ya myanda iva mu nyama bita aside irike (acide urique).

2. *Ibiharage vyumye bitera umutima gukora neza:*
Nk'igihe umutima usigaye utera ntushikane (hypotension), bituma wongera inguvu zawo. Ivyo bishishwa bigabanya isukari yo mu maraso (glucose) ku barwayi ba diyabete, uko vyokoresheha nakwo akaba ari uku gukurikira :

Teka amagarama 100 (ni nk'urushi) y'ibishishwa vyumye mw'iritiro ry'amazi. Rindira bibire gushika hasigaye igice c'ayo watekesheje. Shira mw'icupa uce uza uranywa duke duke gushika umurango wose uheze. Namba wipfuza kwironkera ingaburo ifashe kandi ikurinda umuyoro w'indwara wewe n'abo mu muryango, ibiharage na cane cane vyumye ntibikujane.

SEZAME

Sezame (sésame) ni udutete dutoduto dusa nka kurya kw'udutete tw'itomati, ariko sezame zozo zikaba ziruta ubunini imbuto z'itomati nk'incuro 2. Hari igihe usanga zitukura canke zirabura bivanye n'amoko yazo ukw'ari kandi mu kanwa zishaka kurura.

Sezame rero ni igiterwa cahoze gikunzwe kuva kera na rindi i Mezopotamiya, mu Buhindi, muri Egipta, mu Bushinwa no mu Bugiriki; barazihurumbira cane nk'ikirungo c'imfungurwa hamwe n'igifungurwa cisohora mu gutanga inkomezi. Sezame n'igiterwa gitunze cane kandi kiboneka ku bwinshi. Reka tubamenyeshe kandi ko igifungurwa ca sezame citaweho cane cane mu bihugu vya Amerika ari naho basanzwe banagihinguramwo ikinyobwa abagore bonsa banywa kugira ngo baronke amaberebere menshi. Mu gihugu c'Ubugande naho nyene ico giterwa kirijukiwe cane ku buryo usanga kibarizwa mu bifungurwa bizimbutse bibaho.

N'aho nyene ico gifungurwa kitamenyerewe cane hano mu gihugu cacu c'uburundi, ushobora kugisanga nko mu mamangazine y'ibifungurwa (alimentations) amw'amwe nk'aho bita kwa Dimitri.

Ibigize Sezame

Intete za sezame (Sézame) ziriganjemwo ibintu vy'agaciro kenshi cane bigaburira umubiri ku rugero rushimishije.

Ufashe amagarama 100 yazo uba uronse amagarama 52 y'ibinure vyiza bitagora umubiri (acides gras insaturés), bene ivyo binure navyo bikaba bifise uruhara ruhambaye mu guhomora ca kinure kibi kolesterole (Cholestérol L.D.L.) aho cagagiranye mu mitsi kugira ngo bice bija mu gitigu guhingurwamwo indurwe (bile) iheza ikaza gusukwa mu rura ruto (intestin grêle) ngo ifashe mw'itunganywa ry'ibinure. Sezame zirimwo kandi na Lesitine (Lécithine), iyo nayo ikaba ifise uruhara rukomeye cane mu kubungabunga ibihimba vyo mu mutwe, bigatera ubwonko n'igitigu gukora neza, hamwe n'ikora neza ry'amafyigo.

Iyo lesitine kandi iraboneka no mu maraso, mu ntanga z'umugabo (sperme) no mu ndurwe (bile). Ituma kandi ibihimba vy'irondoka bikora neza. Eka mbere, abahinga bemeza ko uduce twose tugize umubiri w'umuntu (cellules) turi muri lesitine (Lécithine)³⁸. Soja na sezame rero nivyo bifungurwa bibiri bikomakomeye bibonekamwo lesitine (Lécithine) nyinshi gusumba ibindi vyose mu ngaburo y'ibimera. Ikindi kandi n'uko amagarama ijana y'intete za

³⁸ Textbook of Biochemistry, Sixth Edition p.23

sezame aba arimwo amagarama 20 y'indemamubiri (protéines) z'agaciro gahambaye cane zigizwe n'ama aside amine (acides aminés) 15 y'amoko atari amwe mu gihe umuntu akuze akenera ama aside amine 20, umwana nawe 22.

Sezame ziragwiriye mu n'insanganyaburo na cane cane E, B₁ na B₂; ziragwiriye mu n'ivyunyunyu nka kalisiyumu, fosiforo, fere, manyeziyumu, kwivire hamwe na krome (Chrome). Zirimwo kandi n'ibintu bituma imyanda isohoka mu mubiri (mucilages). Kubw'ivyo rero, si igitangaza kubona ko mu bihugu bitari bimwe vyo kw'isi sezame zifatwa nk'igifungurwa kinagura ubushobozi n'inkomezi vy'ibihimba vy'irondoka. Reka rero tubereke bike vyo mu masinzi y'ibikorwa birangurwa na sezame.

Ingorane zo mu bwonko

Sezame ni igifungurwa c'abantu barushe mu bwonko canke mu mutwe. Abantu bishwe n'agahinda, abana bijiriwe hamwe n'abantu b'inkazi zirabaruhura mu mutwe bagasigara biyumvira neza batekanye. Igihe umuntu yama afise ubwenge budafata ivyo yumvise, yasomye canke yize, yokwikora kuri sezame kugira ngo imutabare. Igihe umuntu asigaye arara atagohetse kubera kubura itiro yokwitabaza sezame kugira ngo aronke agatiro keza. Sezame ifise uruhara ntangere mu gutururuza umutwe umeneka (céphalée)

eka mbere n’aho woba umeneka uruhande rumwe (migraine).

Abantu bakoresha ubwenge cane nk’abasomyi, abanditsi, abanyeshure, abajejwe guharura amahera, abadandaji n’abandi nk’abo; batumirirwa guhurumbira udutete twa sezame na cane cane mu gihe boba bipfuzwa ko ubwenge bwabo bukora neza. Abakaza urwibagiza nabo, muri sezame baharonka umuti ukaze w’indwara yabo.

Igihe umubiri uremerewe.

Abantu bakunze gukora imyimenyerezo ngororamubiri, abagore bibungenze, umuvyeyi yonsa ariko ata maberebere afise, mu gihe c’amagara make bitewe n’uko umuntu yabazwe kwa muganga canke bivuye ku zindi ndwara, mu gihe umuntu ari magoyagi canke yonze cane bitewe n’imirire atako yifashe; yokwitwaza sezame kugira ngo imukorere ibitangaza. Mu gihe umugore canke umugabo aba ata nkomezi agifise zo kurangura amabanga y’abubatse (impuissance sexuelle). Mu gihe umuntu agwaye indwara irangwa n’iyumagana n’ikoberana ry’imitsi itembereza amaraso (artériosclérose) ituma amaraso ataba agitembera neza mu bice vyose vy’umubiri, sezame yomukorera ibitangaza.

Uko sezame zikoreshwa

Ufata urugero runaka ufatiye ku bo ugomba kuziha uko bangana hamwe no ku minsi bozihereza uko ingana. Zinike mu mazi mabisi iminota 15 kugira ngo zihomokeko udusenyi n'inkungugu bikunze kuba bizirimwo, ziyunguruze akayungiro canke ubundi buryo bwokuramwo udusenyi bukubaye hafi. Ca uzikaranga ku muriro ubayabaye, ariko ugume uzigaragura kenshi kugira ngo ntizizigire narirya zifitiye n'imbaga zibayabaye. Zimaze kwumuka ca uzibika mu kirahuri. Hora uhekenya utuyiko dutatu duto duto canke ikiyiko n'igice kinini imisi yose harya uhejeje gufungura.

Icitonderwa

Abantu bipfuza kwigabanya ubunini, bokwirinda kwama bihereje sezame, kuko zitera kuvyibuha; bisigura ko abipfuza kuvyibuha boziyegereza.

INAZI

Igitu c'ikigazi c'amoko y'inazi (noix de coco) uretse ko ari igisharizo kuko kiryohera ijisho kandi abenshi bakaba bakunze no kugitera mu mpangu zabo na cane cane mu gisagara, gisanzwe gifise n'icamwa kigaburira umubiri mu buryo butangaje bita *inazi*. Ubushakashatsi bwakozwe, bwasanze ko Inazi ari igifungurwa gitunze ivyunyuny vyinshi nka kalisiyumu, manyeziyumu, fere, fosiforo, sufere (Soufre) na potasiyumu. Nk'akarorero, ico cunyuny potasiyumu gifise uruhara ruhambaye, kuko icyo gifadikanyije na kalisiyumu na fosiforo, bikomeza inzara urukoba, umushatsi, amenyi n'igikankara c'amagufa. Ikindi nacyo, umubiri w'umuntu urakenera icyunyuny manyeziyumu kugira ngo ugumane inkomezi z'imisomo (muscles).

Umuhinga mu vy'amagara y'abantu yitwa **Delbet** yarerekanye uruhara icyo cunyuny gifise mu gukingira indwara ya kanseri. Ivyo bica bisigura rero ko ibifungurwa bigwiriye icyo cunyuny Manyeziyumu nk'imicungwe, ubwoko, ibigori, amande, isereri, soja, hamwe rero n'inazi bikomeye cane mu kwikingira icyo cacyo ca kanseri gitakira inganda. Icyunyuny Manyeziyumu kigwiriye mu nazi kirakomeye cane mu gikorwa c'ikora neza ry'igikankara c'amagufa, ubwonko, kuko gifise uruhara rumwe na fosiforo. Icyo cunyuny fosiforo nacyo, gituma inazi iba igifungurwa gitanga amaraso meza kandi n'amagufa agakomera.

Ico cunyunyu fere naco, gituma inazi iba igifungurwa gitera igitigu gukora neza no kugifasha gusohora uburozi (toxines) mu mubiri, eka mbere n'aho bwoba bwavuye ku miti. Inazi kandi iragwiriyemwo n'insanganyangaburo A, B, E, na Biotine. Ikindi naco inazi ziragwiriyemwo amata menshi. Amata yazo yuzuyemwo ibintu bibungabunga kandi bigakiza n'umubiri ku bato n'abakuze kandi akaba ari n'igifungurwa kidasanzwe ku bana bato. Mu turere turimwo inazi nyinshi abagore usanga bonsa abana bakoresheje ayo mata yonyene. Abo bana usanga bakurana igikuriro n'amagara meza. Amata y'inazi arakinga iterambere ry'indwara mu mubiri, agatanga amaraso meza, akubaka ingingo zikomeye neza, agakomeza umushishito n'amara, maze ivyo bigatuma inazi ica iba umuti ku bantu bagwa mpishi (barya bakaguma buzuye inda), barwaye canke bababara mu mara. Amata y'inazi kandi, ni meza ku bantu barwaye indwara zifatira mu mutwe nk'ubujuju, urwibagiza, kumeneka umutwe, kwamana agahinda n'ibindi. Ni umuti ku bantu bafise amahaha y'amanantegye nke, umushishito wikwega mu gusya ibifungurwa, amata y'inazi kandi ni igifungurwa ku bantu bonze bipfuzwa kugarura ibiro, avura kuribwa mu mushishito n'ibiviyimba vyo mu mushishito. Aravura indwara yo kwumva umururumbo mu nda canke umubiri wose muri rusangi. Ufashe ugasya inazi mu kuma gasya ikaroti (rape carottes) hanyuma ugaca uyivanga n'amakaroti wasyeye, mur'ubwo buryo

n'umuti ukaze cane mu gusohora inzoka zo mu nda na cane cane iyo ubifashe mu gatondo ataco urihereza kandi ukamara amasaha menshi ata kindi uriye kiretse ivyo gusa.

Dogiteri **Ernst Schneider** atumenyesha ko inazi ari igifungurwa co kwihereza no mu gihe umuntu agwaye ingwara zisaba kwihereza imfungurwa zitarimwo umunyu nk'umutima wiruka cane, goute (goute), amafyigo, igitigu, diyabete n'izindi. Abahinga batari bake mu vy'ingaburo n'amagara y'abantu basaba ko mu gihe umuntu ahevye ibiva mu bikoko yoca abisubiriza soja n'inazi maze ibindi vyose akazogenda yuhirirako. Dogiteri **Ernst Schneider** avuga ku bifungurwa bifise amavuta nk'ibiyoba, isoja, amavoka, inazi n'ibindi nk'ivyo ati: *“Igituma ibinyamavuta bifise agaciro gahambaye cane ni kubera ko vyiganjemwo indema mubiri (albumine) ziva mu bimera vy'agaciro gahambaye (ibice 14 gushika 18 kw'ijana) ukuyemwo soya, urwo rugero nirwo rwinshi rushoboye kuboneka mu bimera akaba ari naco gituma bisubirira inyama ku bantu batunzwe n'ibimera gusa”* ³⁹.

Hamwe twobishira mu biharuro nk'uko abahinga babivumbuye, wosanga ko ivyo tuvuze atari indoto.

Amagarama 500 (inusu y'ikiro) y'inazi, arimwo indemamubiri (albumines) zingana n'iziri mu kiro n'inusu c'inyama z'ingurube yonze (Jambon maigre), nk'iziri mu biro 2 vy'inyama y'intama, nk'iziri mu biro 2

³⁹ La Santé par les Aliments, p. 61

vya rognons, iziri mu biro 2 vya crème épaisse, ibiro 2 n'inusu vy'amagi, ibiro 2 n'amagarama 75 vy'inyama y'inyana y'inka (veau), ibiro 3 vy'inyama y'inkoko, amalitiro 4,75 y'amata. Ikindi naco izo ndemamubiri z'agaciro gakomeye, zigwiriye aside amine (acides aminés) kandi zirihagije nk'iziboneka mu nyama eka mbere zikaba zinafise n'ibintu zirusha iziva mu nyama kubera izi mpamvu zikurikira:

1. Indemamubiri ziva mu nazi nta myanda bita aside irike (acide urique) itera indwara ya gute (goute) na muhekenyi (rhumatisme) zirimwo.
2. Mw'izo ndemamubiri nta ire (urée) na sikatore (Scatol) zirimwo nk'uko bisanzwe biboneka mu ndemamubiri z'inyama n'aho ibitungwa vyoba bitarwaye kandi iyo myanda ikaba idashobora kwicwa n'umuriro mwinshi.
3. Igihe umuntu yihereje indemamubiri (protéines) ziva mu nazi co kimwe n'ibindi bimera muri rusangi, ntizishobora kuborera mu nda (putréfaction) nk'uko bisanzwe bigenda ku nyama .
4. Nta nzoka nka teniya n'izindi zigera ziboneka mu ndemamubiri ziva mu bimera nk'inazi nk'uko biri ku nyama.
5. Nta ca kinure kibi kolesterole (Cholestérol L.D.L.) cigera kiboneka mu ngaburo y'ibimera nk'inazi nk'uko gisanzwe kiboneka mu ngaburo iva mu bikoko.

6. Inazi ziribwa zikiri mbisi zigifise insanganya-ngaburo n'ivyunyungu vyavyo vyinshi mu gihe inyama zo zirinda gutekwa kandi zikononwa n'umuriro, ikindi naco ibinure biboneka mu binyamavuta nk'inazi bifise agaciro gahambaye mu mubiri w'umuntu kuko ari ibinure vyakirwa neza mu mubiri ntibizivye n'imitsi itembereza amaraso.

Abantu bose babeshejweho n'ingaburo y'ibimera gusa (végétaliens) batumirirwa kwitwararika soya n'inazi bakabigira nyambere mu ngaburo yabo maze ibindi bimera bikaza nyuma vyuhira, ahandi hoho boba bagomba kwigerezako. Impamvu y'ivyo n'uko umubiri w'umuntu wubatswe n'indemamubiri (protéines) mu gihe soya nayo arico gifungurwa co mu bimera gitunze indemamubiri zikwiye nk'izo mu nyama ariko kandi zikaba zidafise ibibi nk'ivyo mu nyama. Inazi nazo nk'uko twabibonye zikaba ari igifungurwa c'ijunja mu ngaburo y'ibimera. Ikindi naco, abarwayi b'umutima, amafyigo, diyabete, abakoresha ubwenge cane, abishwe n'umunanu utewe n'imirire atako yifashe hamwe rero n'abamunzwe n'ubugwayi, nibagire nyambere inazi mu ngaburo kiretse gusa mu gihe boba bakeneye ingaburo igabanya ubunini bw'umubiri.

Mu gutegura amata y'inazi

Satura ikibarara cayo, sya kirya gihimba cera c'imbere mu kibarara ukoresheje ka kuma gasya ikaroti yo gufungura ari mbisi (râpe-carottes), uce uvanga n'amazi agereranye uteke, hanyuma abize, uce uminina. Amazi uronse niyo mata y'inazi. Bene ayo mata aba atunze cane ku buryo ashobora gusubirira n'amaberebere ku bana ba nyina batagishoboye kwonsa kubera ubugwayi canke ku zindi mpamvu bivanye n'uko haba harimwo aside lorike (acide laurique) nk'iyiri mu maberebere. Mu ntambara ya kabiri y'isi yose (1918) ni yo yari yabaye agaharawe mbere banayasuburiza n'amata y'inka⁴⁰, ivyo vyatuma abana bagira igikuriro maze abakuze bakagira amagara meza.

Kanatsinda hariho abahinga mu vyo kwiga ibimera (Botanistes) babiri aribo **Shanti** na **FC Stewart** bavumbuye ko mu mata y'inazi harimwo ibintu bita diphényl-urée bitera igikuriro bisanzwe bisa nk'ibiba mu mubiri w'umuntu.

Amavuta y'inazi

Gushika mu mwaka w'1850, i Buraya bari bamaze kumenya ubuhinga bwo guhingura amavuta y'inazi, ayo mavuta rero usanga ariyo agize maragarine

⁴⁰ A Better Way to Health, p.84

ahanini. Uko babigenza rero umuntu afata kirya gihimba cera cayo akagitaragaza iminsi 5 ku zuba canke akacotsa mw'ifuru hagaca haboneka amavuta. Ufashe ikiyiko 1 cayo rero uba ufise intanganguvu (calories) 9280, zihakwa gushikira izo umubiri w'umuntu adakoresha inguvu yokenera mu minsi itatu. Ikindi naco ayo mavuta afise, ni ububasha bwo gukiza butangaje cane ku buryo avura n'indwara z'akayoberabahinga nk'imibembe (lèpre).

Mu mwaka wa 450 imbere y'ivuka rya Kristo, **Raya** umwami w'igihugu ca Ceylan ngo yoba yarakize imibembe yari arwaye biciye mu kwisiga ayo mavuta hamwe no kunywa amata y'inazi. Abantu boba bagihinyura ingaburo y'ibimera nk'aho ari ingaburo nkene, ntagukekeranya, babiterwa no kutamenya guterwa n'ukudasoma ngo bamenye.

Mbega ukuntu soya, Sezame, n'inazi vyari bikwiye kwizizira imeza z'abategereje kugaruka kwa Kristo kugira ngo bisubirire inyama z'ibikoko vyapfuye ! *“Ni kubw'ineza yabo bwite umwami agira ishengero ry'amasigarira inama zo kwigizayo ivyo gukoresha inyama, icayi n'ikawa, hamwe n'izindi mfungurwa zonona. Hariho ibindi bintu vyinshi cane vyoshobora kutubeshaho biryoshe kandi vyiza”*⁴¹.

⁴¹ Ellen G.White

INGANO

Abahinga mu gutohoza ivya kahise babicishije mu kwigira ku bisigarira vy'ivyahambwe mu kuzimu (archéologues) barerekanye ko abashinwa hamwe n'abanya Egiputa bari basanzwe barya ingano (blé) no mu myaka ibihumbi bitatu imbere y'ivuka rya Kristo. Eka mbere muri ino myaka hoho, abahinga bakoze ubushakashatsi ku vyerekeranye n'ingaburo baremeje ko ingano ari igifungurwa kitari gikwiye guhara ku meza z'abo bose bipfuzza kugira amagara meza.

Ingano rero naho nyene abantu benshi bataramenya neza agaciro kazo, zisanzwe ari igifungurwa gisanzwe kirimwa na hano mu gihugu cacu na cane cane mu ntara za Muramvya na Kayanza, zikaba kandi zigwiriye mw'isoko nkuru ya Bujumbura, aho ushobora kuzironka ari intete zikuweko amashishwa canke ifu. Abantu benshi rero bakunze kuzirya bazikozemwo umutsima (ubugari) canke bakazinywa mu musururu (ubuyi), bozivanga n'ayandi mafu nk'ibigori na soja. Abahinga mu vy'ingaburo n' amagara y'abantu ba kino gihe rero, ntibahengeshanya guhayagiza ico giterwa -Ingano-.

Dogiteri **Ernst Schneider** yazivuze ati : *“Urutete rw'ingano rugizwe n'ibintu vyinshi cane ngirakamaro bigaburira umubiri w'umuntu. Umukate ukozwe mu*

ngano zitamburiwe ibizigize mu mahinguriro (pain complet) woshobora kubera igifungurwa umuntu igihe kirekire cane ari wonyene”⁴².

Umuhinga rurangiranwa mu vy’ingaburo w’umunya Swise (Suisse) ariwe Dogiteri **Bircher-Benner** yaremeje ati : *“Kugira ngo abantu baronke amagara meza n’inkomezi bisaba ko baba bafise intete zitononekariye mu mahinguriro (céréales complètes), canke mu kugura bakaraba umukate ukozwe mw’ifu itamburiwe ivya ngombwa vyayo mu mahinguriro.”*

Dogiteri **E. Schneider** nawe ati: *“Intete zitononekariye mu mahinguriro zoshobora gukinga indwara nyinshi cane ziterwa n’iterambere, gusaza umuntu atageze, hamwe n’ibindi bimenyetso vyinshi biranga ubuhenebere bw’umuntu wa kino gihe. Ikibazo c’umukate w’ingano zitononekariye mu mahinguriro cari gikwiriye gufatwa nka kimwe mu bibazo nkoramutima vyega amagara hamwe n’akazozza k’abantu”.* Mu mukate w’ingano (ariko atari imwe tumenyereye ikorwa mw’ifu yera, dusanga ko harimwo insanganyangaburo zo mu mugwi wa B zihagije rwose zihwanye n’izo umuntu akeneye i ruhande y’insanganyangaburo B₁, B₂, B₆ n’izindi. Harimwo n’ibindi bintu abahinga batarasobanukirwa neza, ariko kandi bifise uruhara rukomeye mu mubiri w’umuntu.

⁴² La santé par les Aliments

Ingano zinitse

Ingano zinitse zikazana imigera (germes de blé), ziri mu bintu vya mbere bimera bigwiriye insanganyangaburo (vitamines). Ubwa mbere ho mwomenya ko ziba zigwiriye insanganyangaburo zo mu mugwi wa B (B1, B2, B6 n'izindi), E, K, A, D, F, hamwe n'indemamubiri (protéines) z'agaciro gatangaje mu mubiri, tudashize inyuma umukimba w'ivyunyunyuka nka kalisiyumu, manyeziyumu na kwivire. Bisanzwe bizwi ko insanganyangaburo zo mu murwi wa B zituma umubiri wose uko wakabaye ukora neza kuko zitera ubwonko gukora neza mu gihe ubwonko nabwo ari bwo bukoresha ibice vyose vy'umubiri. Si igitangaza rero kubona ko igihe umuntu akenye izo nsanganyangaburo aca yadukwako n'amabi atadondoreka nko gukaza urwibagiza, gukaza ishavu, kumeneka umutwe kudasanzwe, kubana nabi n'abandi, kudafata ku mutwe neza, indwara z'urukoba, kwumagana no gusadagurika umunwa n'ibindi.

Ibibunduguru n'abana

Ingano zinitse zikazana imigera zifise agaciro ntangere mu ngaburo y'abana bagikura kuko zituma bagira igikuriko n'amagara meza, ay'umubiri n'ay'ubwenge.

Abarwayi ba Diyabete

Umwigisha (professeur) **Stepp** yabaye rurangiranwa kubera ubushakashatsi yakoze ku nsanganyangaburo (vitamines), yemeje ko insanganyangaburo B1 yoba yorohereza ya ndemamubiri insuline itangwa n'urwagasha (pancéas) ngo yinjire mu duce tugize umubiri (cellules) igatuma isukari irungikwa mu gitigu no mu misokoro ivuye mu maraso hamwe rero no kuhahindurirwa ibinure bita *glikojene* (glycogène) arivyo sukari ibikwa mu gitigu (foie) no mu misoso (muscles) ngo ize gusukwa mu maraso igihe iyatemberamwo yarangiye.

Insanganyangaburo E nayo nyene ngo yoba ikora ibisa n'ivyo n'aho nyene bitarashigikirwa n'abahinga mu vy'ingaburo n'amagara y'abantu. Ingano zinitse zikazana imigera rero bivanye n'uko zifise izo nsanganyangaburo zose uko ari zibiri B1 na E ku bwinshi, zifise ikibanza c'icubahiro mu ngaburo y'abarwayi ba diyabete.

Igihe umurwayi wa diyabete yokwama yihereza ibiyiko 4 gushika kuri bitanu vy'ingano zinitse zikazana imigera kandi akabikora buri musi, azosanga urugero rw'isukari yo mu maraso (glycémie) hamwe n'urw'iyo mu mwanda muto (glycosurie) rwagabanutse bimwe biboneka.

Dogiteri **E. Schneider** yemeza ko gukora ivyo bishobora no gutuma bene abo barwayi bagabanywa

za nshinge bita insiline (insuline) bakunze kubatera ngo zigabanye isukari yo mu maraso no mu mwanda muto.

Uko binika intete ngo zizane imigera:

Dogiteri **Evers** ni umuhinga rurangiranwa mu vy'ingaburo n'amagara y'abantu , yarerekanye uko umuntu yobigenza kugira ngo aronke intete zinitse zikazana imigera (germination) n'aho nyene ubwo buryo canke ubusa nabwo abarundi basanzwe babumenyereye: Ku mugoroba urafata intete z'ingano ukazivanga n'izindi nk'iz'isoya n'izindi ukazishira mu gakombe gato (tasse) maze ugaheza ukazirengeza amazi rwose kuko iyo zivyimvye zica zigwiza na kabiri uko zangana. Urazireka zikamara amasaha nk'icumi n'abiri (ijoro ryose) bwaca ukamena ya mazi zigaca zirirwa ata mazi zirimwo umurango wose. Hageze ku mugoroba uca wongeramwo ayandi mazi aza kurarana nazo maze hagera mu gatondo ugaca uyamena zikirirwa ata mazi arimwo ugashishikara kubikora uko gushika ubonye zizanye imigera kuko ico gihe utongera kuzishiramwo ayandi mazi. Iyo migera rero itegerezwa kuba ireha na santimetero 1. Igihe iyo migera uretse ikarenza ico gihe naho, za ntete zica zitakaza akanovera.

Ico gikorwa rero gishobora gufata ikiringo kingana kuva ku minsi itatu n'itanu ivyo bigatuma za ntete ziba

zisigaye zoroshe ntizijiginyure amenyo n'imisaya mu kuzihekenya. Aho intete zinikwa hategerezwa kuba hari urugero rw'ubushuhe rugereranye. Nko muri frigo intete zica zisohora imigera n'ingoga na n'ingoga mu gihe urutete narwo ruca ruguma rugumaraye. Igihe aho hantu hashushe cane, n'aho imigera isohoka yatevye maze ugasanga intete nazo zirimwo ama acide menshi kandi zigumye cane. Nko mu gihe umuntu yoba afise icuma gipima ubushuhe (thermomètre) naho, yozinika ahantu hashushe ku ma dogere (degré) 12 gushika 18.

Imbere yo kwihereza izo ntete zinitse zikazana iyo migera, vyoba ngombwa ko ubanza ukazironga mu mazi meza kandi menshi kugira ngo ubanze kuzikuramwo umwambiro (levure) hamwe n'ibindi bintu bidakenewe kuziherezanya vyagiye vyiremarema muri zo. Ivyo rero bica bisobanura ko umuntu yotegura izo akoresha nko ku munsu umwe canke ibiri gusa akirinda guca azanikira kugira ngo ntizume, kandi akirinda kuzigumiza mu kintu gikanye canke ahantu zitutikiranijwe kugira ngo ntizibore ngo zigume ziduza imigera. Izo ntete zinitse, umuntu ashobora kuzihereza uko nyene ziri canke naho agashiramwo ubuki bukeyi kugira ngo ziyongere mu kanovera.

Umwigisha (Professeur) yitwa **Kollath** nawe yarerekanye iyindi nzira umuntu yocamwo mu gutegura intete zinitse zikazana imigera. Mu gihe

intete zamaze kuzana imigera, woca uzisanza ku kintu kitotembamwo amazi gitezwe impande zose kugira ngo ntizize gusanzara canke ngo zirundane uruhande rumwe. Intibatimba y'izo ntete kuva hasi gushika hejuru yoba ari nk'intete zitatu zigerekeranye kugira ngo ntizirundarundaneko ari nyinshi zigahava zibora. Igihe rero zinitse uko zica zumuka, kubw'ivyo rero zikaba zoshobora no kumara n'iminsi (3) gushika kuri (5) zigikomeye. Ariko kugira ngo ntizibe intetere wohora uza urazimemerako utuzi duke duke cane, ngo zigume zibomvye. Ariko kandi dusanga ko ubwo buryo bwambere Dogiteri **Evers** aduhanura aribwo bworoshe gusumba ubu bwa **Kollath**.

Nk'abantu bokwigirira amahirwe yo kwironkera amavuta akuwe mu ntete z'ingano zinitswe zikazana imigera, bokwironkera ibinure vyiza bidasinzikaza imibiri, insanganyangaburo n'ivyunyunyuyinshi cane hamwe rero na vya binure lesitine (lécithine) irusha agaciro iyiva mu bikoko. Ayo mavuta kandi hamwe atoba yamburiwe ibiyagize mu mahinguriro aba ari umuti ukomakomeye kuko arimwo ibintu bivura bikurikira:

1. *Insanganyangaburo A*

Amavuta avuye mu ntete zinitse zikazana imigera cane cane ay'ingano aratuza ingorane ziterwa no kubura insanganyangaburo A nazo zikaba zisanzwe zariraye mw'ino si yacu: kuzingama

(crétinisme), kwonda, kutaba ukibona neza iyo hageze ku mugoroba (héméralopie), gusigara wumva umengo mu maso hatembagara umusenyi, kumeneka umutwe, indwara z’amaso, gukarirwa n’indwara z’urukoba, kwumagana no gusatagurika umunwa, kwipfundapfundika kw’amaraso akamera nk’udusenyi mu mafyigo (lithiases urinaires), indwara zifatira mu bihimba vy’irondoka n’izindi.

2. Insanganyangaburo D

Ivyo bita erigosterine (ergostérine) vyirundarunda munsu y’urukoba maze igihe izuba rikurasiyeko bigaca vyihinduramwo insanganyangaburo D3 iyo nayo ikaba ifasha umubiri mw’itunganywa ry’ivyunyonyu. Igenda mu rura ruto igafata ivyunyonyu nka kalisiyumu na fosiforo ikavyinjiza mu maraso kandi ikabihoma ku gikankara c’amagufa, amenyo n’ahandi bigatuma amagufa n’amenyo bikomera. Iyo insanganyangaburo D3 ikeshe mu mubiri naho, bitewe n’uko utaronka imfugurwa irimwo canke umuco w’izuba, bituma urura ruto rudashobora kwinjiza ca cunyonyu kalisiyumu maze bigateza inkurikizi ziteye ubwoba. Ariko kandi wibuke ko n’aho woba wota karya kazuba ko mu gatondo iminota 30 gushika ku minota 60 ku munsu udashobora gukena insanganyangaburo D3, kiretse gusa nko mu gihe igitigu (foie) cawe coba carasinzikaye, ntikibe kigishoboye kuyishingura neza.

3. *Insanganyangaburo K*

Iboneka mu mavuta y'intete zinitse. Ni nkenerwa cane kuko itanga insanganyangaburo K naho nyene iboneka ku rugero ruto. Kanatsinda dusanzwe tuzi ko ama bagiteri (bactéries) aba mu rura rukuru (gros intestin) asanzwe yihingurira insanganyangaburo K ku rugero umubiri w'umuntu ukenera buri munsu. Ariko kandi, mu gihe ikora nabi ry'urura rifadikanije no kutayihereza mu ngaburo, igitigu gica kiyibura bigaca bitera amaraso kutavura ku rugero rubereye, ari navyo bituma umuntu yama ava umwuna canke ava amaraso mu zindi nzira, igihe akomeretse naho akava nk'inka barashe. Mwomenya ariko ko abana bakarirwa gusumba abakuze.

4. *Insanganyangaburo E*

Amavuta y'ingano zinitse usanga harimwo insanganyangaburo E nyinshi. Uno munsu bisanzwe bizwi ko mu gihe iyo nsanganyangaburo ibuze biteza ingorane zimitsi, ibihimba vyo mu mutwe n'ibihimba vy'irondoka.

5. *Insanganyangaburo F*

Iyo nsanganyangaburo F ituma ibinure vyorohera mu mubiri bigatera urukoba kuremba, igatera

umushatsi gukura neza no kutavungagurika, ikarinda kutarwara amaherehere n'ibindi. Intete z'ingano kandi umuntu ashobora no kuziteka mu mazi akazitegura kurya kw'ibiharage akazikoza umuceri n'ibindi.

INYAMA ZIKOZWE MU NGANO

Intete z'ingano kandi bazihinguramwo inyama nziza z'akanovera. Kandi zirimwo indemamubiri, ibinure vyiza n'ibindi vyinshi bigaburira umubiri ariko bitonona amagara nk'uko bisanzwe bikorwa n'iziva mu bikoko.

UKO ZITEGURWA

Ufata ifu y'ingano ukayitoba mu mazi mabisi gushika uronse umutsima ugumye, ariko ifu yavangavanzwe neza. Fata uwo mutsima uronse uwushire mu kintu woshobora gusukamwo amazi bigakunda nk'isafuriya, isorori, canke ikindi; uce usukamwo amazi kandi arengere wa mutsima (igikandu). Bireke bimare amasaha atatu canke arenga, tangura uze urakanya ugikanyira mw'ayo mazi nyene.

Ariko utagishwanyagura gushika n'aho ayo mazi asigara yeruka nk'ifu. Guma uza urahindura amazi gushika ubonye ko ata bintu vyera bikiva muri ca gikandu. Mera nk'uwukanya neza ico gikandu gikamuke hanyuma ugisanze neza ku meza nka kurya bagira igikandu bakoramwo imikate canke amandazi. Vanga ico gikandu n'akunyu bikwiranye

n'ibindi birungo vyiza uzi vyotuma biza kumota neza ni wabiteka, nk'ibitunguru-sumu bisekuye, pelesire, sereri, pwavro n'ibindi.

Vanga vanga hanyuma ubibumbabumbe kugira ngo niwabishira mu mavuta bize gusa neza. Katagura udupande tumeze nk'utw'imisoso maze uduterere mu mazi ariko arabira bimarane nk'iminota 20. Vyinure mw'ayo mazi hanyuma ubishire ahantu vyota amazi. Shira ivyo bipande mu mavuta ahiye ari ku ziko ukarange gushika ivyo bipande bizanye irangi nk'imisoso y'inyama ikarangishijwe amavuta.

Tegura isupu yawe wipfuza, ishobora kuba igizwe n'amavuta, ibitunguru vy'amagoma, pwavro n'ibindi hanyuma bitunganye, uce ushiramwo za nyama z'ingano bimarane umwanya muto cane uce ushiramwo utuzi duke tugereranye. Aho rero uba uronse inyama z'ingano.

ABISHWE N'UMUNANU

Ibintu bisanasana umubiri birundarunze mu ngano zinitse zikazana imigera, bishoboye kunagura umubiri wari warasinzikaye igihe kirekire kubera kwihereza ingaburo y'imburakimazi, bikongera inguvu abakonyokewe n'abandendebukiwe kubera ko zigwiriye indemamubiri n'ibinure hamwe rero n'ibindi bintu vyinshi umubiri ukenera.

Bisanzwe bizwi ko abantu bakunze kwihereza umusururu (ubuyi) w'intete gusumba uko bokoresha

ivyahinguwe muri irya fu y'ingano yera bakoramwo umukate usanzwe n'amabenyi, usanga badakunze kurwara ibozoka ry'amenyo (carie dentaire), ari naco gituma benshi baturumbira cane uwo musururu.

Igihe umuntu avangavanze amafu y'amoko menshi aca yuzuzanya maze agatanga vya ngombwa umubiri ukenera umuntu atarinze gukenera amata y'inka. Ivyo bica bituma ivyo utaronse ku rugero rukwiye mu ngano, uca ubironka mu bigori, ivyo utaronse mu bigori, ugaca ubironka muri soya, gurtyo gurtyo.

Izo ntete zibereye mu gutegeza uwo musururu ufise ivyo agaciro umubiri ukenera, nazo rero nizo z'izi: ingano, ibigori, amasaka, uburo, umuceri ...

Dogiteri **Ernst Schneider** asaba ko urwo ruvange rw'amafu y'amoko atandukanye rwari rukwiriye kwama rutegurwamwo umusururu buri gatondo, kugira ngo bimwe mu binyobwa bibi cane abantu bamenyereye gukoresha ataco vyijinza mu mubiri uretse kuwusangangura nk'icayi n'ikawa, bikurweho.

IFU Y'INGANO YOBIKWA IMISI INGAHE?

Ifu y'ingano, iba yataye agaciro kayo kuva ku munsu ugira umunani uhagaze ku munsu bayisyerako. Ico gihe rero, ngo ntaco iba igisumbije ayandi mafu y'agaciro gato, asanzwe agurigwa mu masoko. Inzira imwe rudende yotuma umuntu aronka ifu y'ubuyi ifise vya ngombwa vyayo; ni ugufata intete wipfuza

gukuramwo uwo musururu ukazisekuza canke ukazisekurira hanyuma rero ugaheza ugacungera ko iyo fu itarenza imisi 8, kuko nk'uko twabibonye iba yataye agaciro. Intete zinitswe zikazana imigera, zifise agaciro kadasanzwe mu gutanga ibintu vy'agaciro umubiri ukenera. Ivyo akaba ari navyo abantu benshi batazi mu gihe abandi bantu bavyirengagiza kenshi.

*"...Intete nizo zari zikwiye kugira ingaburo yacu. Nta n'akamanyu k'inyama kari gakwiye kwinjira mu mishishito yacu."*⁴³

⁴³ Ellen White

IBIRAYA

Ikiraya gikomoka muri Amerika y'epfo, kikaba cashitse i buraya hagati mu mwaka w'1500, kizanywe n'abasoza b'abanya Esupanye. Uko niko ikiraya cahavuye kiba gikwira kandi kigahinduka igifungurwa gihurumbiwe na benshi kandi akaba ari igifungurwa kigaburira umubiri mu buryo abenshi batibaza.

Uno musu uri hejuru, hariho amoko ashika 100 y'ibiraya. Bimwe birera ibindi biratukura, ibindi bisa n'umuhondo, hakaba mbere n'ivyo usanga bisa n'urwatsi rubisi. Ariko kandi, ayo moko menshi agizwe n'ivyangombwa bimwe. Abahinga mu vy'ingaburo rero, bamaze gukora ubushakashatsi butari bumwe kugira ngo bamenye neza agaciro ikiraya gifise mu mubiri w'umuntu. Hariho abagabo 2 aribo **K. Kon** na **A. Klein** b'abadagi bemeje ko hariho abantu 2, umusore n'inkumi bihayeye kumara imisi 167 ata kindi bihereza atari ibirayi gusa ariko babishizemwo amavuta y'ibimera, bakarya n'icamwa pome hamwe n'isukari. Bose bemeye ko iyo ngaburo ariyo ibahagije kandi ko batigeze biyumvamwo ko bari bakwiye kuyihindura. Dogiteri **Carlos Kozel** nawe yaremeje ati : *“Imfungurwa zigizwe n'ibiraya, imboga z'ama leti (laitues), ama epinari canke izindi mboga mbisi zikwiye kandi ko ari ingaburo itazimvye”*.

Dogiteri **Hindle Dein** w'i Copenhagen muri Danemarike (Danemark); uwo azwi nk'umuhinga rurangiranwa mu vy'ingaburo, yamaze imyaka irenga

30 yiga ibigaburira umubiri, ibigize ibifungurwa n'ico bimaze mu mubiri w'umuntu.

Ikiraya coco yagikozeko ubushakashatsi buenze ubwo yakoze ku bindi vyose. Mw'ikoraniro ryabereye i Battle Creek (Amerika), aho hari muri Nzero 1929, yaremeje ati : *“Jewe n'abandi bantu, twatanguye kubeshwaho n'ibirayi hamwe n'amavuta ava mu bimera vyonyene. Sinari niteze ingaruka nziza, ariko nari nashatse ngo nibonere inkurikizi z'ingaburo nk'iyo. Nari nashatse kubona inyama n'amagi nokwongeye kw'iyo ngaburo uko bingana kugira ngo ndonke indemamubiri (protéines) zitosheje. Ariko noneho nasanze ko atari ngombwa kurinda kwongera ikindi kintu ico arico cose kuri iyi ngaburo. Ibiraya birimwo indemamubiri nyinshi cane”.*

Umwigisha (professeur) **Abderhalden** nawe nyene yatanze igishingantahe gisa nk'ico nyene aho yavuga ati : *“Nta gukekeranya, birashoboka kubeshwaho n'ibirayi vyonyene. Ibirayi ni igifungurwa cikwiye.”* N'aho nyene twisunze ubumenyi bwa kino gihe mu vy'ubushakashatsi tutokwemera ko umuntu akwiriye gutungwa n'ibirayi gusa, ivyo bishingantahe vy'ivyo bihangange mu vy'ingaburo n'amagara y'abantu biratwemeza ko ibirayi ari igifungurwa c'ijunja cari gikwiriye kuronka ikibanza c'agateka mu ngaburo y'umuntu wese yipfuza kwironkera amagara meza.

Ibigize ibiraya

Ibiraya biragwiriye mwo isukari bita amido (amidon) itanga inkomezi z'umubiri wose, indema-mubiri (albumine) nyinshi, ivyunyunyuru n'insanganya-ngaburo nyinshi cane.

Mu mwaka w'1359, niho abahinga batangura kwiga ivyo bintu mu biraya. Basanze ko ibirayi vyiganjemwo icunyunyuru Potasiyumu, kalisiyumu, fere, aliminium, nikelu, kobalite, zenke na manyeziyumu ku bwinshi. Ibirayi kandi birafise insanganya-ngaburo C nyinshi, B₁, B₂, B₆, PP na K.

Mu gihe ibifungurwa bitari bimwe bisanzwe bitakaza ivyangombwa nk'insanganya-ngaburo n'ivyunyunyuru, iyo vyimbuwe bikabikwa; ku birayi hoho siko biri. Dogiteri **Ernst schneider**, uwo ni umuhinga rurangiranwa mu vy'ingaburo n'amagara y'abantu, atumenyesha ko ibiraya bidateshwa agaciro n'uko vyimbuwe, eka mbere n'iyi woba uvyimburiye ahantu hadashika umuco kandi hakanye cane nko mu cumba co hasi (cave).

Ariko rero n'aho biri uko, iyo ncabwenge **E. Schneider** atumenyesha ko hariho umwansi adahetwa ageramiye ibiraya. Uwo nawe ngo ni "inteko". Aravugaga ati: *"Ibirayi bikuweko amashishwa birushiriza gusinzikazwa cane no kubiteka gusumba ibitekanywe amashishwa. Gutekesha indugumba gusa (cuisson à vapeur), ni vyo vyiza gusumba gutekesha amazi. Ibirayi vyokejwe canke vyatetswe*

amaganda(cuisson en robe de chambre) hanyuma bigatonorwa, bigakarangwa mu mavuta; bigumana vyangombwa vyavyo bigaburira umubiri. Ibirayi vyaharuwe hanyuma bigatekwa mu mazi biba vyatakaje ibice 25 kw'ijana vy'isanganyangaburo C hamwe n'ivyunyuny." ⁴⁴

Impavu ituma ivyo, n'uko insanganyangaburo C iri mu zikarirwa n'umuriro, na cane cane mu gihe ivyo birimwa bitetse igihe kirekire cane, canke ku muriro mwinshi cane, ikitavuzwe co ni igihe wongeye gushusha ivyo wari watetse; y'uko itikira yose uko yakabaye. Uburyo bwiza rero bwo kugira ngo ivyo turondera mu biraya ntibiduce mu myanya y'intoke ni uko tubitekana amashishwa kandi bikaribwa bigitekwa.

Uruhara rw'ibiraya mu kuvura indwara

Dogiteri **Carlos Kozel** yemeza ko :

- Ibirayi bicuresha ukubabara mu mushishito
- Bivura indwara z'umushishito
- Bivura indwara z'amara

Uko wobitegura

Mw'ico gihe wokatagura udupande dutoduto canke naho ukabicisha muri ka kuma gasya

⁴⁴ La Santé par les Aliments P.175

amakarote ya salade (Rape-Carottes) hanyuma ivyo usyeye ugashiramwo ubuki bukeyi kugira ngo wongereze akanovera. Ivyo birayi bibisi, igihe cose ubiteguriye wohora utegura bikeya. Mu gihe umuntu afise umwuka (gaz) mwinshi mu nda naho, yohengera harya ataco ararya akanywa amazi yatekeshejwe ibirayi akamukiza iyo ngorane kubera ivyunyunyuye vyinshi biba birimwo. Umutobe ukanywe mu birayi bibisi biharuye kandi bigasekurwa canke bigacishwa muri Rape-Carotte, urafasha mu gusohora imyanda n'uburozi vyo mu bihimba vyo mu nda.

Mu ndwara zisaba kwivurisha imiti ishushye nk'ibivyimba, ibihute, ibikomere, kubabara mu nda, mu gikiriza no mu mugongo, kuribwa mu gutwi n'izindi; wofata ibirayi ukuye ku ziko bihiye, ugaca ubicucuma hanyuma ugafata ico gicumbe ukagihomeka aho harwaye bigishushye ku rugero rwokwihanganirwa n'umubiri. Uwitwa **Barbara Watts** nawe arerekana uburyo bwokoreshwa mu kwivurisha ibirayi.

Amazi y'ibiraya

Amazi y'ibiraya afasha mu kwoza amara no mu kugabanya ama aside mu mushishito no mu rura. Mu gutegura ayo mazi rero, fata ikirayi cose kiboneka ukironge kandi ugikatazure duto duto cane, cinike mu gikombe c'amazi washizemwo akunyu gake cane, bimare ijoro ryose. Mu gatondo, mimina kandi uce

unywa ayo mazi ataco urarya canke uranywa. Guma ubikora mu gatondo gushika iyo ngorane iheze.

Gusohora imyanda

Kugira ngo ushobore gusohora imyanda mu mubiri, ingaburo y'ibiraya kumara imisi ibiri yiramvuriye ata kindi kiyigize, ni ngombwa. Ivyo kandi vyoza n'imyanda iba iri mu maraso. Mu birayi kandi, harimwo ibintu bisohora ya myanda itera ya ndwara ya gute ari yo acide irike (acide urique), sikatole (scotol) n'ibindi. Kugira ngo ivyo bishoboke rero, wohora urya ikirayi kimwe, ariko umusi ukaza kurangira uriye 5 mu myanya itandukanye kandi vyatekanywe amaganda, utibagiye kandi guhora unywa amazi menshi cane ⁴⁵.

Mu gihe umuntu afise uburwayi bumwe bumwe butera kureka amazi nko kuvyimba amaguru, n'ibindi bihimba (oedèmes), umwigisha (professeur) **N. Jagé** asaba ko umuntu yoca amara imisi yihereza ibiraya imisi itatu yikurikiranya akabirya bitarimwo umunyu canke ibinure (amavuta), akabifata kabiri kabiri ku musu. Ivyo rero bisaba ko yoca ahagarika ibikorwa vyomuruhisha mu gihe cose ariko afata uwo muti, kandi agaheza akaguma awusubiramwo uko haheze igihe. Ubifashe uno musu, ejo haza na hirya yejo; uzosubira haheze indwi zitanu gutyo gutyo. Ikindi naco kandi tworangiza tubamenyesha, n'uko n'aho

⁴⁵ A Better Way to Health P. 142

ibirayi bigwiriye mwo intanganguvu (calories), indemamubiri (protéines), insanganyangaburo (vitamines), n'ivyunyunyuru (sels minéraux) vyinshi; bidatera kuvyibuka ngo umuntu arenze urugero kuko ubushakashatsi bwakozwe bwasanze ko abanyarwanda ari abantu bagize ibirayi ivya mbere mu ngaburo y'abo, ariko tukaba dusanga ari abantu b'imbaga nta muri rusangi.

Ikindi naco, n'uko umudagi wo mu buseruko arya ibirayi cane, atavyibuka ngo asese inda (obèse) nk'umudagi wo mu maj'epfo y'Ubudagi. Biraboneka ko benshi batari agaciro k'ikiraya ari naco gituma bagishira gake canke ntibagishire mu ngaburo yabo. Abantu batari bake na cane cane mu burundi; bahora bibaza ko ibirayi ari igifungurwa cyo kuribwa kuko umuntu agikumbuye canke kimubaye hafi gusa, ariko ataco kimaze gihambaye mu kugaburira umubiri. Ariko uko ni ukwihenda gukomeye cane gukorwa ku kirayi nk'uko gusanze gukorwa no ku bindi bifungurwa imana yaremye nk'ibiharage.

*“Abarwayi n'abakomeye; mu kiraya ntibahasanga, intanganguvu (calories) nyinshi gusa, ariko kandi banahasanga n'indemamubiri (protéines) nyishi, insanganyangaburo hamwe n'ivyunyunyuru vy'agaciro. Umunyakigo (ménagère), abona kure icyo bitekanywe amaganda(amashishwa) kenshi gashoboka”.*⁴⁶

⁴⁶ Dr Ernst Schneider, La santé par les Aliments, P. 176

IVOKA

Abakoze ubushakashatsi ku camwa c'Ivoka basanze ko ari icamwa gitunze ibintu vyinshi vy'agaciro. Abakera bo bahora barifata nk'igifungurwa cabo c'ibanze, maze inyama nazo bakazifata na buhoro, ugasanga ni abanyenkomezi kandi bafise amagara meza, bitayeko, ntibakunda gusinzikazwa n'ibirwara bigeramiye abantu amasinzi y'abantu ba kino gihe.

Ivoka rero, turarisangamwo insanganyangaburo (vitamines) A, izo mu murwi wa B,C,E hamwe n'umurengera w'ivyunyunyuka nka fere, potasiyumu, indemamubiri (Protéines) nyinshi cane, hamwe n'intanganguvu (calories) ku rugero rukomeye. Ivoka ntirifise ibintu bikiza gusa, ahubwo riranafise ibintu vyinshi bisanasana umubiri. Bitayeko kandi, kubera ibinure vyinshi rifise, rimara inzara bidatevye.

Ingaburo igizwe n'inyama izana imyanda myinshi mu mubiri (urée, acide urique, purines, ammoniaque), tudasize inyuma ca kinure kibi kolestorole (cholesterol LDL), ari navyo bitera indwara nyinshi ziteye ubwoba nk'umutima urangwa n'umuvuduko w'umurindi w'amaraso (hypertension artérielle), diyabete, amakanseri, gute (Goute), muhekenyi (rhumatisme), igitigu, iyononekara ry'imitsi n'ibindi. Iki camwa gitangaje "c'ivoka" coco rero, kirahanagura kikoza imyanda n'indwara mu mubiri, kandi kikagaburira umubiri ivyo ukeneye.

N'aho gifise ibinure vy'inshi, kiragwanya kugumbiza, mu gihe iyo ngorane isanzwe igeramiye abihereza inyama ziva mu bikoko. Iki camwa giha umubiri inguvu, kandi kikongera inkomezi z'umubiri n'iz'ubwenge. Kuba gifise amavuta menshi, ntibisigura ko abangamira umubiri nka kurya bisanzwe bikorwa n'inyama, amata bavanga n'ibifungurwa bitari bimwe n' ibindi biva mu bikoko.

Ivoka ritera akayabagu, rikomeza imitsi n'umubiri muri rusangi. Ivoka kandi kubera ibinure vyazo bitagumira umubiri (Acides gras insaturés), rifise ububasha bwo kugabanya ca kinure kibi (cholesterol) mu maraso y'abihereza inyama, amata, amagi n'ibibikozwemwo. Icunyunyu fere kiyiganjemwo naco, gituma ivoka rishobora gukinga no gutuza ingwara yo gukama amaraso ifatiye ku mirire (anémie ferriprive). Ivoka rero ni igifungurwa co kuribwa n'abantu bajonjogojwe n'umuruho canke n'indwara, abafise indihaguzi z'umutima, abarwaye ibikomere vyo mu mushito, abafise ingorane z'amagufa canke bipfuza ko agumana ubukomezi bwayo. Ivoka ni igifungurwa kidasanzwe ku gikuriro c'abana no ku magara meza y'abakuze. Igihe umuntu ahora ariyihereza kenshi, rimurinda indwara y'amaso, amafyigo, kuribwa mu magufa, umushishito hamwe n'indwara z'urukoba (nk'amaherehere, ibivyimba, ibihute n'izindi). Amavuta ahinguwe mu mavoka ni umuti udasanzwe kuri zino ndwara zikurikira : Amaherehere, urukoba

rwumaganye canke urukoba rusatagurika n'ibindi. Igihe umugore yibungenze ababara mu nda, yohora yisiga ayo mavuta atuma urukoba ruremba kandi rukagira ubwiza.

Amavuta y'amavoka atuma umushatsi utavungagurika kandi ugasigara urembye uryoheye ijisho. Amavuta y'amavoka araturuza ububabare buterwa n'indwara ya muhekenyi (Rhumatisme), kubabarira mu ngingo z'amagufa canke mu nyama. Ico gihe rero urayisiga nka kurya bisiga pomade.

Dogeteri **Georges Pamplona Roger** rero, aduha inzira yotuma umuntu aronka ayo mavuta y'agaciro bigeze hiyo: Reka amavoka ashe gushika ase n'ayaboze. Yateke mw'isafuriya y'amazi bibirane maze amavuta aca areremba hejuru ku mazi, uce uyerura ukoresheje ikiyiko. Yamimine uyakuremwo imyanda, nyuma rero uhore uyakoresha ico yagenewe nk'uko vyerekanywe aho hejuru.

Amababi y'amavoka

Amababi y'amavoka aragwiriye ibintu vyumisha igikomere kandi bikagabanya uburibwe (Tanins). Mu gihugu ca Megizike (Mexique) hamwe no mu bindi bihugu vyo muri Amerika yo hagati ayo mababi bayakoramwo umusabiko (infusion) wo kuvura kwuzura umwuka mu nda (flatulance), canke bagateka amababi mu mazi, yabira bakayakandisha

mu ruhanga no mu misaya, aho ni ku bantu bariko barameneka umutwe .

Dogiteri **Carlos Kozel** nawe atumenyesha ko icayi catetswe mu mababi y'amavoka kivura indwara z'uburuhe, umushishito, kumeneka umutwe, indwara zo mu mihogo, kutaja mu mihango ku gihe ku bagore,... Mu gihe umuntu arwaye indwara zo mu kanwa n'ibinyigishi naho, yosekura amababi mabisi y'amavoka akabihomeka aho harwaye, kuko bigabanya uburibwe kandi bigasohora amashira kandi bigakomeza ibinyigishi n'amenyo. Wohora ubikurakuranya ku munsu.

Mu gihe woba uriko urameneka umutwe canke inyama ziriko zirakubabaza naho, jobeka igitambara mu mazi ashushe watetsemwo amababi y'amavoka, uce ugishira mu ruhanga canke aho hantu ubabara.

Ushobora no gufata ayo mababi ubwayo ukayakuramwo ayo mazi agishushe, akaba ariyo uhomeka aho hantu ubabara ukabikora kenshi ku musi.

Ibibuto vy'amavoka

Ibibuto vy'amavoka biravura izindi ndwara zikurikira: Igihe umuntu atakigenda neza ku mwanda muto, amacinya, indwara y'igitsina gore irangwa no gusohoka ibintu vyera bivuriranye biciye mu gihimba c'irondoka (leucorrhée).

Uko wobigenza

Sekura ibibuto 8 gushika kw'10; binoze ubiteke mw'iritiro ry'amazi gushika aho bihakwa gucika nk'umusururu. Ca umimina hanyuma unywe igice c'agakombe gato (tasse); ubikore incuro 3 ku muni .

Ku rukoba inyuma

Ico kinyigimbe c'ibibuto vy'amavoka kirakoreshwa mu kubika amavoka kirakoreshwa mu guhisha ibivyimba canke ibihute. Fata ico kinyigimbe uhejeje gukura ku ziko utaramimina ukagihomoka hamwe harwaye kigishushe ukakimazako iminota 10 gusa hanyuma ukaguma ubikurakuranya kenshi gashoboka ku musi . Urabikora kugeza aho ubona ico kivyimba canke ico gihute gihiye. Gishobora kwimena canke ukarondera uwukikumena. Uhejeje kugikanya neza woca uhogesha amazi ukānye mu ndimu canke utayafise hafi ugaca uhoza neza ukahomoka utwondo dutovye mw'ifu y'ibumba rya mu mazi adashushe. Ivyo bituma ico gikomere kitabamwo imyanda kandi kigaca cuma vuba.

Ivoka rero irashobora kuribwa yonyene harya imbere yo gufungura, canke naho igashirwa mu mboga harya ari mbisi. Ishobora no kuribwa mu mukate, ikaba ishoboye no gusubirizwa maragarine. Umuntu kandi ashobora gusoroma amababi

y'amavoka akayanikira kure y'izuba (nko mu nzu), maze agahora ayatekamwo icayi ciza. Namba wipfuza kugira urukoba rurembye, n'umushatsi urembye kandi ukura neza, namba wipfuza kwikingira canke kwirinda indwara nyinshi zikomakomeye ziterwa n'imirire mibi; kwongereza ubunini no kugira amagara meza muri rusangi; menyereza imeza yawe icamwa c'ivoka.

*“Ivoka ni kimwe mu bintu bihambaye biva mu bimera twahawe (n'Imana) kugira ngo bisharize ibihimba (vy'umubiri) wacu ngo kibizigame kandi kinagure amagara yacu, eka mbere tudasize n'ishusho y'urukoba inyuma.”*⁴⁷

⁴⁷ Dogiteri Georges Pamplona Roger, Guides des Plantes Médecinales, vol.2, p. 720.

***AMATEGEKO
UMUNANI
Y'UBUGOROZI
BW'IVY'AMAGARA***

Imirire

Uwitwa **Raul Escobar** niwe yanditse ati :
« *Gusyebwa neza kw'indya bisigura amagara meza, kandi inzira nziza wocamwo kugira ngo indya zawe zisyebwe neza (mu nda) ni ukubera maso ivyo urya* »⁴⁸. Mubisanzwe umuntu wese mu bariho kw'ino si arazi ko urufatiro nyamukuru rwotuma agira amagara meza ari ingaburo. Ico nico gituma tubwirizwa kwama dufungura imfungurwa kama, mbisi kandi zisukuye neza buri musi. Ikirenze ivyo, ikintu cose turya canke tunywa gitegerezwa kuba kitononekaye kandi corohera ibihimba vyakira kandi bigatunganya ibifungurwa twihereje (Amenyo, igihogohogo, umushishito, urura rutonya, urura rukuru, igitigu, urwagasha n'ibindi), kandi bikaba bitarimwo ibintu bisinzikaza amagara yacu.

Indya ni iki ?

Indya ni ikintu cose umuntu atamira kikubaka uduce tugize umubiri, kikazana inkomezi, kigashoboza umubiri kubandanya ukora umerewe neza. Twisunze buno busobanuro rero, umuyaga(Oxygène) n'amazi bifadikanije n'ivyo turya

⁴⁸ A Better Way to Health, p.13

ni umugabane w'ingaburo. Imfungurwa zibereye ku bantu rero, ni izo zirimwo ibishoboye gutunga umubiri, bigatanga amagara meza, ntizigumire ibihimba vyakira bigatunganya ibifungurwa, eka mbere bikaba binatuma ivyo bihimba navyo bigubwa neza. Ibifungurwa rero bikwiye ivyo vyose tuvuze ni ivyamwa, imboga, intete, ivyamira mu kuzimu n'inazi.

Twomenya gute imfungurwa zibereye amagara y'umuntu ?

Imana yabwiye Adamu na Eva iti : « *Ehe ndabahaye ivyamwa vyose vyama utubuto biri kw'isi yose, n'igiti cose cama ivyamwa birimw'imbuto zavyo : bibabere ivyokurya vyanyu* »⁴⁹. Ndagomba ko wobanza ugasubiza amaso inyuma kw'irema ryari rihejeje kubaho. Aho uca wibuka neza ko inyoni, amafi n'ibindi bikoko bito na binini vyari vyamaze kuremwa ku musu wa gatanu⁵⁰, ariko nta na kimwe co muri ivyo umwe yari yaremye umuntu akamenya n'ivyomutunga yigeze amuhamwo ngo arye, gushika ku gihe c'umwuzure. Aho umwuzure ukamiye kw'isi, bivanye n'uko ibimera vyose vyari vyatikijwe n'amazi kubera ingaruka z'icaha, Uhoraho yasohoye itegeko riha uburenganzira abacitse kw'icumu ngo nibahebe barye ibikoko ntakundi⁵¹.

⁴⁹ Bibiliya Yera, Itanguriro 1 :29

⁵⁰ Bibiliya Yera, Itanguriro 1 : 20-22

⁵¹ Bibiliya Yera, Itanguriro 8 : 15-22, 9 : 1-3

Ariko n’aho nyene Imana yarekuriye umuntu kurya ibikoko, yaciye imushiraho akarimbi, haba bimwe imubuza kurya, ivyo yavyise ibikoko « *bihumanye* »⁵². Ikindi kandi, Imana yaciye ibabuza no kurya amaraso y’ibikoko(ubuseri) n’ibinure kuko mubisanzwe ubuseri ntaco bwari kumarira imibiri yabo kuko ataco bwinjiza mu mubiri. « *Bize bibabere icagezwe c’intahava uko ibihe vy’urunganwe rwanyu bizogenda bikurikirana yuko mu ngo zanyu zose mutazokwigera mugeza mu kanwa ibinure canke amaraso* »⁵³. Bisanzwe bizwi neza ko ingaburo igwiriye ibinure vy’ibikoko ituma imyanda irundarundana mu mubiri, igatera ubuvyibuhe bw’umurengera n’indwara ziteye ubwoba bigendana.

Iyo ukurikiranye ibikoko ubwoko bw’Imana bwari bwarabujijwe kuva inyuma y’umwuzure, usanga inyama zavyo arizo nyama mbi zibaho ku mubiri w’umuntu. Ivyo abahinga mu vyo amagara y’abantu, baramaze kuvyemeza mbere bakabitangira n’ivyemezo ntavuguruzwa. Aho twovuga nk’ingurube n’urukwavu.

Uwitwa **Raquel Orce** nawe yanditse ati : « *Imana yaremeye abantu kubeshwaho n’ibimera, atari inyama. Ivyo tubimenyeshwa n’iki ? Tubimenyeshwa*

⁵² Bibiliya Yera, Gusubira mu Vyagezwe 14 : 1-16

⁵³ Bibiliya Yera, Abalewi 3 :17

n'uko yabahaye ivyo bategerezwa gufungura. Ntabwo vyari mu migambi y'Imana ko abantu bica ibindi biremwa bizima maze ngo baheze babirye. Ivyamye ku biti vyose n'ivyo bari bakeneye kurya, ngo baronke amagara meza, tudasize inyuma intete, inazi, ivyamwa birimwo intete imbere (nk'amabungo n'ibindi) hamwe n'imboga. Imfungurwa ziva kubimera ziteguwe mu buryo busanzwe bushoboka, nizo zibereye kuzigama rwose imibiri yacu nk'abantu ». Uwundi mwanditsi nawe yaravuze ati: «*Abantu babona kure ntibarya inyama*»⁵⁴. Dogiteri **Georges Pamplona Roger** nawe avuga kuvy'ibifungurwa biberanye n'umuntu ati : «*Inyama ntaho zigeze kuba igifungurwa ciza cane* »⁵⁵

Ellen Gould White, uwo ni umwanditsi rurangiranwa wo muri Amerika wo mu kinjana ca 19 (1827-1915), yaranditse amajambo imiliyoni (25.000.000), mw'ayo majambo rero, umugabane munini wo muri yo yawuhebeye ikibazo kijanye n'ivy'amagara. Aho yariko arerekana ukuntu umuntu yomenya ingaburo ibereye iyo ariyo, yaravuze ati: «*Kugira ngo tumenye imfungurwa nziza izo arizo, dutegerezwa kwiga umugambi wambere w'Imana ku ngaburo y'umuntu. Umwe atahura ivyo (umuntu) akeneye yageneye Adamu Imfungurwa ziwe*».⁵⁶

⁵⁴ Hommes ne nous mangez pas, p.12

⁵⁵ Croquez la vie, p.125

⁵⁶ Counsels on Diet and Foods, p.81

Mwibuke rero ko ico gifungurwa ata kintu na kimwe kiva mu bikoko carimwo⁵⁷. None namba Imana izi ivyo umubiri w'umuntu ukenera kuko ariyo yawutunganiye, kuki itamugeneye ko aya inyama inyuma y'iremwa ryiwe. Mbega Imana yoba yarabihudutse?

*"Ibikoko ni bagenzi banje, kandi sinorya abagenzi banje"*⁵⁸.

Tworya ibingana gute?

Igihe cagenywe co kurirako kigeze umuntu yorya gushika yumvise inzara iheze, ariko kandi ntarinde kuvirira imeza ari uko yafoye amabondo, ataho akibishira, nakare turi ibiremwa vy'Imana. Imana iravuga iti: « *Uzoba uhiriwe wa gihugu we (Ishengero), Umwami wawe ari uwo munda y'abami (Yesu), abaganwa bawe(abizera) bakarira ku gihe gikwiye, kugira ngo baronke inkomezi, atari ukugira ngo baborerwe(bafunereze)* »⁵⁹. Kandi Imana yacu idusaba ko tugira urutonde mu kurya kandi ntiturire gufura amabondo.

Birahambaye cane ko turya ivyo tuzi ko bitobangamira imibiri yacu, aho kwishinga kurundanya gusa ivyo twita ko ari ibinoboye. Bivanye n'uko imishishito yacu atamadirisha ifise yo kurabiramwo ko twakwije ibikwiriye, dukwiriye

⁵⁷ Bibiliya Yera, Itanguriro 1:29

⁵⁸ G.B.Show, Umwanditsi wa « Hommes, ne nous mangez pas »

⁵⁹ Bibiliya Yera, Umusiguzi 10:17

gukoresha ubwenge bwacu mu kwirinda kurenza urugero mu vyo turya canke tunywa, canke mu kwihereza intica ntikize kandi tutabibuze. Ivyo ntibishaka kuvuga ko dutegerezwa kugendeshwa na kamere kacu ku kibazo co gufungura, ahubwo bishaka kuvuga ko imishishito y’abantu bose idashobora kwakira bimwe kandi ku rugero rumwe. Nta muntu n’umwe rero akwiriye kwiyumvamwo ko yoba urugero rw’abandi (critère) mu vy’imfungurwa. **Ellen G. White** niwe yavuze ati: « *Ntiduca umurongo urashe neza wo kwisungwa mu vyo imirire* ». Yarongeye kandi yivugako ubwiwe ko ibimugwa neza n’urugero rw’ivyo aya bidakwiye kuba urufatiro ku bandi: « *Sinigira urufatiro (critère) rw’uwari we wese* »⁶⁰.

Kumenya no kwihereza ivyo uzi ko worya bikakurwa neza birahambaye cane mu gihe dusanzwe tuzi ko imishishito yacu ifise uruhara ruhambaye cane mukudufasha kugumana amagara meza no mu kwama tumerewe neza. Uwitwa **Raquel Orece** niwe yanditse ati: « *Imidugararo mu nda ishobora gutuma ubuzima bufutana* ».

Hariho rero ibintu vyinshi abantu bahurirako; bakabikoresha babizi canke batabizi, bigasinzikaza amagara yabo na cane cane ibihimba vyakira kandi

⁶⁰ Counsels on Diet and Foods, P.481

bigatunganya ibifungurwa twihereza, ivyo bintu navyo nivy’ibi:

-Kurya ugahaga birenze urugero rwawe.

-Kwihereza intica ntikize .

-Kurya ugaca uja kuryamana umutwaro mu nda utaruhutse n’ imiburiburi amasaha 2 ngo ivyo wariye bibanze bisebwe mu mushishito.

-Kurya wihutagiza bigatuma indya zitanoga neza mu kanwa kandi ntizinaavangwe n’amate menshi, mu gihe mu mate haba harimwo ibintu bifasha mw’itunganywa ry’indya zigeze mu mushishito.

-Kurya igihe cose bikujemwo, bigatuma umushishito utigera uronka akaruhuko, ari navyo biteza indwara z’umushishito nko kurwa mpishi ukama wuzuye inda (indigestion), gukomereka igikomere mu mushishito (ulcère gastrique n’izindi), kugabanya ubushobozi bw’urura rukuru bwo guhingura insanganyangaburo K na B12 (disbactériose intestinale).

-Kurya no kunywa ibintu bishushe cane canke bikanye cane uretse igihe ari umuti.

-Kurira icarimwe amoko arenze atatu y’indya ari navyo biteza imidugararo mu nda no kugwa mpishi.

-Kurira icarimwe indya zitajana nk’imboga n’ivyamwa uretse ivoka, indimu na pomme kuko ivyo bijana n’imboga mu ngaburo atangorane.

-Kwibanda kurya indya canke kunywa ibinyobwa ataco vyinjiza mu mubiri gihambaye uretse kwonona (nk’ubuseri, isukari yo mu mahinguriro, irya fu yera

bakoramwo imikate n'ibindi), imikembe n'uburobe, ubugari bw'ikirobeke n'ibindi nk'ivyo.

-Gukunda gufungura ibinure vyinshi na cane cane ibiva mu bikoko.

-Kurya ushavuye canke ufise agahinda, n'ibindi vyinshi.

Ivyo ari vyo vyose, ni haba hariho ivyirwa vyo kwiga, ni ibijanye n'amagara yacu, kuko tutariho ntakiriho, kandi amagara ni amazi aseseka ntibayore.

Dogiteri Ernst Schneider niwe yakurikiranye neza akamaro k'ibihimba bihingura ibifungurwa hamwe n'ingaruka mbi ziterwa no kubifata uko bitagenewe, niho yabitwumvisha mu mvugo itomoye neza ati: *«Urura rw'umuntu rufise uruhara ruhambaye cane nk'urwo umuzi ufise ku giterwa. Umuntu ntiyoshobora kubaho atagira urura, nk'uko n'igiterwa naco kitoshobora kumara kabiri cambuwe umuzi»*.

Tworya ryari?

Raquel Orce yaranditse ati: *«Imisi yose dukwiriye guhora turya igihe dushonje, kandi ntidukwiriye kurya na rimwe tudashonje. Ivyo biterwa n'iki? Kubera ko akayabagu (appetit) keza kerekana ko umushishito witeguye kandi ko imfungurwa umuntu arya ziza guhingurwa neza ngo zivyare amagara meza»*⁶¹.

⁶¹ A Better Way to Health, P.14

Ellen Gould White nawe abisobanura ati:
«*Bamwe ntibigeze bakora akigoro gashimitse ngo bategeke akayabagu kabo canke ngo bubahirize amategeko atunganye yerekeranye n'ingaburo. Barya vyinshi cane, mbere no mu bihe vyo kurirako, maze abandi nabo bakarya imburagihe, igihe ico arico cose ikigeragezo kibashikiye. Namba abavuga ko ari aba Kristo bipfuzza gutorera inyishu ibibazo bibahanze, ni kuki ubwenge bwabo bucuze umwiza? Ni kuki ivy'idini bahahamiye ari goyigoyi bigeze hiyo hose? Mu bihe vyinshi ntibakenera kuvirira imeza zabo... Abenshi bitandukanya n'Imana babicishije mu kayabagu*». ⁶²

«*Bisaba amasaha atatu n'imiburiburi kugira imfungurwa wafunguye zihere mu mushishito, kandi nta kintu ico arico cose kiribwa cari gikwiriye kuribwa ayo masaha atararangira. Kanatsinda, umushishito ubwawo nawo ukenera ikiruhuko. Icari ciza, ni uko umusi ku musi, amasaha yo kurirako yari akwiriye kwama ari ya yandi, kuko umubiri ukora neza iyo ukoreye ku rutonde rutunganijwe neza*». ⁶³

Gufungura kabiri ku musi ni vyo vyiza cane, ariko kandi ntibibereye ku bantu bose. Abantu bakora ibikorwa bibasaba inguvu nyinshi, abagore bibungenze canke bonsa hamwe n'abana bakwiriye

⁶² Counsels On Diet and Foods, P.159

⁶³ A Better Way to Health, p.11

kurya gatatu ku musi. Iyo ngaburo rero yoba itunganijwe uku gukurikira:

Ku barya kabiri ku musi

Mu gatondo nk'isaha imwe bofungura bagahaga bikwiye. Ingaburo bamwe bamenyereye kurya sasita boca bayihereza nk'isaha icenda canke icumi ryitereye kugira ngo ntibaze kuryama bamaze kwicwa n'inzara canke buzuye inda.

Ku barya gatatu ku musi

Mu gitondo bofungura bihagije. Nk'isaha zitandatu z'umutaga boca bafungura izihakwa kungana no mu gitondo hanyuma ingaburo yo ku mugoroba bakayihereza nk'amasaha atatu imbere y'amasaha baryamirako, kandi ikaba igizwe n'ibifungurwa bidateba mu nda. Kubo vyoshobokera, babifitiye uburyo n'ubushobozi, imfungurwa bazofungura nk'ejo aho bukeraboba baraye baziteguye kugira ngo ntizize kubacereza ku bikorwa bisanzwe. Ariko kandi, mukwiriye kumenya ko umuco hamwe n'impwemu duhema (oxygène) bibangamira ivyunyunyu (sels minéraux) ndetse n'insanga-nyangaburo (vitamines) biba biri mu mfungurwa, bikanatuma zibonekamwo n'imigera y'indwara iyo zabitswe zitetswe. Uburyo rero twavuze bwo kurara

biteguwe si kurara bitetswe, ahubwo ni ku bifungurwa bitarinda gutekwa.

Mu cegeranyo cashizwe ahabona n'umurwi w'abahinga bo mw'Ishirahamwe mpuzamakungu ryitaho amagara y'abantu kw'isi (**O.M.S**), umenyeshya ibi bikurikira ku mfungurwa zabitswe zitetswe: « *Igihe indya zitetse zitanguye guhora, imigera y'indwara ica itangura kuzishwaramwo. Uko umuntu agenda azirindiriza igihe kirekire, ninako nazo zigenda zirushiriza kwandura. Kugira ngo umuntu avyikingire rero, zifungure harya zikimara gutekwa* »⁶⁴.

«Mwari mukwiriye kugira amasaha adahindagurika yo kuvyukirako, yo gusengerako hamwe no kurirako». ⁶⁵

“Kandi wironderere ingano na sayiri n'ibiharage n'inkore n'amasaka n'uburo, maze ubishire mu nkono imwe, ubicemwo uturobe tw'umutsima ... ivyo nivyo bizogutunga” ⁶⁶.

Twisunze ivyo twize kw'ino «ntambuko» yambere, ishura «ego» canke «oya» kuri bino vyiyumviro bikwirikira:

⁶⁴ Régime Alimentaire, Nutrition et Prévention des Maladies Chroniques, Série de Rapports Techniques 1990,p.197

⁶⁵ Ellen G. White, Testimonies for the church, Vol.5, p.181

⁶⁶ Bibiliya Yera, Ezekiyeli 4:9

1. Ingaburo ibereye umuntu ni ivyo vyose afungura canke anywa bimuryoheye.
2. Mw'irema Imana yari yabwiye Adamu na Eva ngo bazorye inyama ariko ntibarenze urugero.
3. Kurya imburagihe vyonona ibihimba vyakira kandi bigahingura imfungurwa.
4. Kurya imbura gihe ni vyiza ariko birekuriwe gukorwa n'abantu bakora ibikorwa biruhisha, abagore bonsa n'abana bato gusa.
5. Umuntu amaze gufungura yorindira amasaha 3 kugira asubire ibindi.

Imyimenyerezo ngororamubiri

Hariho akagani k'icongereza kavuga gati :
«*N'utaronka akaryo ko kugira imyimenyerezo ngororamubiri, ako kurwara ko ntuzokabura* ». Reka turabire hamwe ukuntu ako kagani kagana akariho. Hisunzwe ubushakashatsi bwakozwe, gukora imyimenyerezo ngororamubiri bituma umuntu yinjiza impwemu nziza kandi bigatuma ingingo zose z'umubiri zirushiriza gukora neza n'imyanda igasohoka biciye mu cya. Ivyo rero bica bituma imyimenyerezo ngororamubiri itanga ibi vyiza bikurikira:

- Imyimenyerezo ngorora mubiri irakinga kandi ikagabanya indwara z'umutima biciye mu kwongereza inkomezi z'ubushobozi bwawo hamwe no mu kugabanya umugigimbo w'umurindi w'amaraso (tension systolique).
- Imyimenyerezo ngororamubiri irakinga kandi ikagabanya indwara z'umutima, z'imisoso n'iz'ubwonko, kuko ituma ibinure vy'ikirenga vyirundanya mu mitsi bishonga nayo ikazibuka, ivyo bigatuma wa mutuku w'amaraso (globules rouges)

ukwiragiza za mpwemu duhumeka (oxygène) mu duce twose tw'umubiri na cane cane mu bwonko.

-Imyimenyerezo ngororamubiri yongera inkomezi z'imisoso (muscles) n'izo amagufa, ikanakomeza no mw'ifatanirizo (articulations) ry'amagufa n'ibindi.

- Imyimenyerezo ngororamubiri ifasha imibiri yacu guturira ivyo twihereje biri mu misoso (nk'isukari) kugira ngo bice bivamwo inkomezi (énergies) zikoreshwa n'uduce twose tw'umubiri.

-Imyimenyerezo ngororamubiri yongereza inkomezi z'abasirikare barwanira umubiri (globules blancs) mu kuwukingira ibitero vy'indwara no kuwurwanira wamaze guterwa.⁶⁷

-Imyimenyerezo iruhura umubiri igatera kuronka itiro ryiza.

-Imyimenyerezo ngororamubiri ituma icunyunyu kalisiyumu (calcium) gikomeza amagufa cinjira neza mu maraso.

Umuntu mu guhema, asohora impwemu zimuvuye mu mahaha (Gaz carbonique) akazirungika hanze ari nazo ibimera navyo bica vyikorako mu gutanga impwemu umuntu ahumeka ziza kwinjira mu

⁶⁷ The Health of the Nations, p.6

mahaha (oxygène) ziciye mu bihimba vy'ihemero (voies respiratoires).

Mu gihe abagore n'abigeme bofungura neza ibifungurwa bimera gusa, Vance Ferrell yemeza ko nibongerako imyimenyerezo ngorora mubiri bizobarinda kubabara bari mu butinyanka.

Uko ibihimba vy'ihumekero bikora.

Ibihimba vy'ihumekero (voies respiratoires) ni izuru, akamirampeke, igihogohogo (trachée) hamwe n'uduheha dukwiragiza impwemu mu mahaha (bronches). Buri muntu wese aba afise amahaha abiri, iryo uburyo n'iryo ibubafu. Mu bisanzwe rero, impwemu duhumeka zivuye hanze zinjira ziciye mu mazuru uretse kandi ko zishobora no guca mu kanwa. Impwemu zishika muri buri haha ryose zijanywe na twa duheha duto cane dukwiragiza impwemu mu mahaha (bronches), maze amaraso avuye mu mutima w'iburyo (ventricule droit) akazanwa n'umutsi wo mu mahaha. Ayo maraso arimwo impwemu dusohora hanze (gaz carbonique) ageze mu mahaha aca ashirwamwo za mpwemu dukura hanze (oxygène) agaca azijana mu mutima w'ububafu (ventricule gauche) zigiye zitwawe n'indemamubiri (protéine) yitwa emoglobine (hémoglobine) iba itembera mu maraso.

Mw'ihaha ryose twa duheha dukwiragiza impwemu zinjije (oxygène) turagenda tukigabaguramwo utundi duheha dutoduto cane (bronchioles), dufise udusaho dutoduto dufise uruhu rwonze cane kandi rutahuka (batwita alvéoles pulmonaires) ari naho habera ivyo guhanahana impwemu (échange gazeux), kugira ngo amahaha atange impwemu zivuye hanze (oxygène) zirungikwe mu mutima, hanyuma impwemu zivuye mu bice vy'umubiri zo gusohorwa hanze nazo (gaz carbonique) zakirwe n'amahaha zisohoke hanze.

Utwo dusaho tuberamwo urwo ruherekerane rw'ayo moko abiri y'impwemu (alvéoles) rero turi hagati y'imiliyoni 300 na 400. Ikibanza urwo ruherekerane ruberamwo kingana n'imetero kwadarato 50 (50 m²), mu gihe umuntu nawe yinjiza hagati y'amaritiro ibihumbi 3 n'ibihumbi 10 vy'impwemu ku musi. Mu bisanzwe rero, umubiri w'umuntu ni imashini yagenewe kutaguma hamwe. Aho itandukaniye n'izindi, ni uko igihe bishitse yoyo ikaguma hamwe ica yononekara cane. Dogiteri **Georges Pamplona Roger** abishigikira mw'ano majambo ati: *«Biramaze kwibonekeza neza ko abantu bakora imyimenyerezo ngororamubiri n'imiburiburi kane mw'iyinga mu kiringo c'iminota mirongo ine (40 min) badakunze gufatwa n'indwara zo kumugara no gukoberana kw'imitsi yo mu mutima (infarctus du myocarde) hamwe n'indwara zifatira kw'itembera*

*ry'amaraso (maladies vasculaires). Imyimenyerezo ngororamubiri irwanya indihaguzi y'umutima igakinga indwara yo kuvyibuha gushika n'aho usesa inda (obésité) maze igatuma umubiri wose umererwa neza».*⁶⁸

Mu cegeranyo giherutse gushirwa ahabona n'umurwi w'abahinga bo mw'Ishirahamwe mpuzamakungu ryitaho amagara y'abantu kw'isi (**OMS**), abo bahinga mu vy'amagara y'abantu bemeza ko gukora imyimenyerezo ngororamubiri bigabanya ivyo kurwara indwara zifatira mu bihimba bitembereza amaraso (maladies cardio-vasculaires), amakanseri amwe amwe hamwe na diyabete y'abakuze (Diabète de type 2). Bemeza ko muri rusangi, imyimenyerezo ngororamubiri ituma umubiri uhingura neza isukari yo mu maraso (Glucose) kandi ikinjizwa no mu duce tugize umubiri (cellules), ikagabanya ibinure mu mubiri kandi igatururuza umugigimbo w'umurindi w'amaraso (hypertension artérielle). Eka mbere ngo ishobora no kugabanya indwara ya kanseri yo mu rura no mw'ibere, igakomeza amagufa, ikagabanya indwara yo guta umutwe (dépression nerveuse) n'ibindi⁶⁹.

Ariko rero, hariho ikibazo abantu benshi bibaza, na cane cane igitsina gore hamwe n'abasaza ari naco

⁶⁸ Croquez la Vie, p.12

⁶⁹ Rapport sur la Santé dans le Monde 2002, p.66

c'iki: «Ni iyihe myimenyerezo ngororamubiri noshobora kandi imbereye»?

Imyimenyerezo ngororamubiri ibereye.

Dogiteri **Georges Pamplona Roger** arakibishura ati: *«Imyimenyerezo ngororamubiri ibereye umuntu wese kandi ishoboye gukorwa ata karimbi kahabaye, ni ukugendesha amaguru»*. Ivyo bamwe vyobatanzaga kuko bibaza ko umuntu wese afise amaguru agendagenda. Ariko kandi, hariho abantu bama bicaye canke biryamiye kenshi, canke bafise uburyo bwo kwiyunguruza atari amaguru gusa, ugasanga bagendagenda gake cane. Abo ni nk'abakozi bo mu biro bagendesha imiduga canke bakorera iruhande y'aho baba, abantu bakunze kuraba televiziyo n'abandi nk'abo. Dogiteri **I. Aguilar** we asaba ko umuntu yokwimenyereza kugendesha amaguru ibirometero 5 gushika kuri 6 buri musi, ni ukuvuga urugendo rw'isaha.

Jeff Wehr nawe avuga ko twihweje ivyiza bitangaje imyimenyerezo ngororamubiri izanira imibiri yacu, twafata iyo myimenyerezo «nk'ibuye rigumya imfuruka ry'amagara». **Jeff Wehr** aratanga kandi urutonde rwo kwisungwa kugira ngo umuntu wese ashobore gukora iyo myimenyerezo ngororamubiri mu buryo bworoshe, aravuga ati: *«Igihe ufashe ingingo*

yo gutangura gukora imyimenyerezo ngororamubiri, hariho ibintu bike vy'ishingiro woherako:

1.Ni vyiza kubanza gusiguza muganga, na cane cane mu gihe muri kahise kawe hoba hariho ingorane woba wari warigeze kugira, zikabangamira amagara yawe.

2.Fata ingingo y'ico wipfuza kugerageza. Twoguha icyumviro c'uko wotangura kugendagendesha amaguru bituma ya magufa 206 n'imisoso 660 hafi nka vyose bikora. Ni ikintu hafi ya buri muntu wese yokora, eka mbere ntukeneye kurinda kuvyigira ubuhinga bushasha! Igihambaye ni ukugira integuro y'ukuntu utohorokerwa.

3.Namba uhisemwo kugendesha amaguru, ntusige inyuma n'umwambaro w'ibirato uhuye n'ico gikorwa (nk'isuperesi canke ibindi bibangutse), kandi ube uzi neza ko n'umwambaro w'impuzu utegerezwa kuba uhwanye n'igihe (wihanganira ubushuhe).

4.Niwihitiremwo umusi ubona ikirere kikumereye neza ku buryo kikworohereza gusohoka.

5.Tora igihe c'umusi kikubereye ciza maze uheze ugene ko ariho hazoberako iyo myimenyerezo, kandi ubifate nk'akazi kakuzanira inyungu. Tangura ugenda buhoro buhoro kugira ngo ureke umubiri wawe umare iminota 5 gushika ku minota 10 uriko urishusha. Nyuma naho herako utangure kwiruka. Igihe cose wame ugenda unyonyera utagumaraye nk'igiti. Nyuma rero uce ufata iminota 20 canke 30 wiruka ukuzako, wirukanga cane kugira ngo

*uhemagirike, uheze uce ufata iminota 4 gushika kuri 5 yo kugenda buhorobuhoro kandi uza uratambikiza wagura intambwe. Kugenda utambikiza wagura intambwe birahambaye kugira ngo worohe. Ariko rero, wibuke ko ata muntu muriko murahiganwa, nturenze urugero ushoboye kwihanganira».*⁷⁰

Ariko kandi twobibutsa ko ubwo buryo atari bwo bwonyene umuntu yoshobora kugiramwo imyimenyerezo ngororamubiri. Dogiteri **Aileen Ludington** nawe avuga ko umuntu ashobora no kwurira igiti, kwoga mu mazi (nager), kugendesha ikinga, gukorera mu mirima. Abandanya asaba ko umuntu yari akwiriye guhora aronka iminota 30 gushika 40 yo kwinonora buri musi, mu gihe nk’umurwayi wa diyabete yipfuza ko isukari itomugwirana mu maraso nawe yohora afata isaha yose buri musi.

Uwitwa **Raul Escobar** yaranditse ati: «*Umubiri w’umuntu ukeneye gukora, kutaguma hamwe kugira ngo ushobore gutera imbere kandi ngo ukore neza, gutahura neza ivyo umubiri w’umuntu ukeneye kugira ngo ukore ni rumwe mu mfunguzo zugurura aho amagara meza ari. Kwinyagaza gusanze, ni vyo umubiri usanze umunyereye kwigira bitaruhaniye. Ntitwokekeranya ko uburyo bumwe bumwe bwo gukora mu ndimiro no mu turimo duto duto tudasize*

⁷⁰ The Health of the Nations, p.6

*inyuma n'ivyo kwihereza imirambi hamwe no kwirukanga n'amaguru hanze ari vyo myimenyerezo ngororamubiri itera kugira amagara meza kandi igatera akanyamuneza».*⁷¹

Dogiteri **Roger Pamplona** nawe atubwira ko hariho akagani ka kera kavuga gati: *«Twese turafise abaganga babiri babiri, aribo kuguru kw'iburyo n'ukw'i bubamfu ».*

None wari usanzwe uzi ko ugendana abaganga babiri ataco bagusaba mu kugukingira no mu kukuvura indwara zawe? None woba umaze kwisuzumisha kuribo kangahe? None wofata ingingo iyihe ngo ubisuzumisheko, ngo bakingire kandi bavure umubiri wawe? Dogiteri **Hans Diehl** ati: *«Ubuzima bwo kutagira imyimenyerezo ngororamubiri ni inzira irashe ijana umuntu mu mva hataragera».* Abandanya agabisha umuntu wese ati: *«Ntugakunde ko hagira ikintu ico arico cose citambika hagati yawe n'imyimenyerezo ngorora mubiri ya buri musi».* Aho yariko ahimiriza akamenyero ko guhora tuja hanze mu kayaga keza tugahemagurika cane twinjiza impwemu nziza, **Vance Ferrell** yaravuze ati: *“Urashobora kwibaza ko ata mwanya ufise wo gukora ivyo, ariko ico udashobora co n'ukwibaza ko ata kanya ko kugaragurika mu gitanda wabuze”.*

⁷¹ A Better Way to Health, p. 15

Twisunze ivyo twize kuri iyi ntambuko ya kabiri ishura «ego» canke «oya» kuri bino vyiyumviro bikurikira:

1. Umuntu wese aya neza, ivyo kurinda kugira imyimenyerezo ngororamubiri ntibikenewe.
2. Umuntu wese agendana abaganga bane aribo maguru n'amaboko.
3. Umuntu akwiriye kugira imyimenyerezo ngororamubiri iminota 30 gushika 40 buri musi.
4. Dogiteri **I. Aguilar** asaba ko umuntu afata urugendo rw'ibilometero 3 agendesha amaguru buri musi.

Kugira ngo uwukora imyimenyerezo ngororamubiri abe yikingiye ingaruka ziteye ubwoba ziterwa no gutakaza ibirenze ivyokoreshejwe n'ivyinjije, ibintu vyokwiherezwa ni ibi bikurikira:

1. Amazi

Bisanzwe bizwi n'abahinga mu vy'ingaburo n'amagara y'abantu ko umuntu mu bihe bisanzwe akwiriye kunywa ibirahuri 6-8 buri munsu. Mu gihe c'imyimenyerezo no mu ci hoho, urwo rugero rwogwizwa na kabiri canke gatatu.

2. Isukari (hydrates de carbone)

Isukari itembera mu maraso (glucose niyo isanzwe ivamwo inkomezi dukoresha igihe cose twinyagaje canke tugize ikindi kintu cose dukoze. Iyo rero ni nkenyerwa cane mu mubiri na cane cane mu gihe c'imyimenyerezo ngorora mubiri. Reka kwihenda wibwira ko icyo sukari yoba ari irya yo mu mahinguriro. Iyo ni mbi cane kuko inunuza insanganyangaburo (vitamines) igatera ingwara nyinshi nka Diyabete, Umutima (hypertension artérielle), kugumbiza (constipation), kumeneka umutwe, kuvyibuha vy'umurengera (obésité) n'ayandi mabi menshi yokwihariza igitabo cayo. Kubw'ivyo rero, ubushashakatsi bwasanze ko isukari yose umubiri ukenera dushobora kuyironka :

√Mu biharage

√Mu vyamwa

√Mu muceri

√Mu birayi no mu myumbati(ariko mukamenya ko mu burobe no mu kivunde isukari nyinshi cane iba yaratakariye muri aya mazi baba barabishizemwo).

√Soya n'ibindi bifungurwa bimera vyinshi wamenya kandi ko imboga z'amababi ziba zirimwo isukari iri ku rushi ari naco gituma n'abarwayi ba diyabete bashobora kuzihereza ntihagire ico zongereza ku rugero rw'isukari yo mu maraso.

3. Ibinure (graisses)

Ibinure n'ibintu bihambaye cane dukura mu vyo twihereza bikora ibikorwa bidasanzwe mu mubiri:

- a. bituma umuntu agira ubuvyibuhe bugereranye.
- b. Bitera ubushuhe bw'umubiri bugereranye (37°C).
- c. Bituma abakobwa n'abagore baja mu butinyanka neza.
- d. Bituma ubwonko bukora neza.
- e. Igitigu kirabihinguramwo isukari umubiri ukoresha mu bikorwa vyose bisaba inguvu mu gihe iyari mu mubiri yaheze, n'ibindi vyinshi.

Ariko rero naho biri uko igihe bibaye umurengera mu mubiri na cane cane mu gihe vyoba ari ibiva mu bikoko (inyama, amata, amagi, ifi, iforomaji) canke mu bigazi (palme), mu nazi (noix de coco) na maragarine hoho biteza amabi menshi: Indwara y'umugigimbo w'umurindi w'amaraso (hypertension artérielle), ikomantara n'ikoberana ry'imitsi ikwiragiza amaraso ajanye ibigaburira n'ibikoresha neza umubiri, kanseri, kuvyibuha vy'umurengera (obésité) n'amabi bigendana n'ibindi tutavuze.

Ahantu tworonka ibinure vyiza bidateza ingwara (kiretse tubaye imbohe z'akayabagu) ni

- mu biharage
- mu biharage no mu bwishaza vyumye
- mu nazi

- ▶ muri lantiye (lentille)
- ▶ muri sezame (sésame)
- ▶ mu ngano
- ▶ mw'ivoka
- ▶ mu bigori na cane cane muri soya narirya ico gifungurwa arico kiganza ibindi vyose bimera kw'isi.

4. Insanganyaburo (vitamines) n'ivyunyunyuru (sels minéraux)

Insanganya ngaburo n'ivyunyunyuru navyo n'ibintu bikora ibikorwa bidasanzwe mu mibiri yacu. Bisohora imyanda mu mubiri kandi bigatuma amagufa, urukoba, amaraso, ubwonko, umushatsi n'ibindi vyose bibaho neza.

Aho tubisanga naho ni mu mboga no mu vyamwa na cane cane bidatetse : ishu, itomati, ikaroti, ivoka, igisuru, isombe, igitunguru c'igoma, mu munyu utononekaye no muri birya twerekanye bitanga ibinure n'isukari. Muri rusangi rero, umuntu akora imyimenyerezo ngorora mubiri yokwirinda kwibaza ko ariyo ihambaye kurusha ingaburo iberanye nayo kiretse gusa abaye ashatse kwishira akagozi mw'izosi.

« Ariko abiteze Uhoraho bazokwama biyubura mu nkomezi nsha, bazoduga ntibaruhe, bazodugisha amababa nk'inkukuma, biruke ntibaruhe, bagende ntibadendebukirwe »⁷².

⁷² Bibiliya Yera, Yesaya 40 :31

Amazi

Dogiteri **Aileen Ludington**, umuyobozi muvya'amagara (Medical Director), niwe yavuze neza ati: *«Guhatira umubiri gukora urimwo amazi ari ku rushi bisa nko kugerageza kwogeshya ivyombo (ibikoresheho vyo mu gikoni no ku meza) igikombe kimwe c'amazi»*⁷³.

Mbega wari uzi ko ibice 60 kw'ijana (60 %) vy'ibigize umubiri w'umuntu ari amazi? Eka mbere hariho n'abahinga mu vy'amagara y'abantu bemeza ko abantu barimwo amazi uku gukwirikira:

- . Umuntu akuze: ibice 65 kw'ijana (65 %)
- . Umwana: ibice 75 kw'ijana (75 %)
- . Umusaza: ibice 55 kw'ijana (55 %)

Amazi rero akwiragiye mu mubiri w'umuntu ku rutonde rukurikira:

- ❖ Mu maraso hari ibice 6 kw'ijana (6 %)
- ❖ Muduce tutaboneshwa amaso tugize umubiri (Cellules) hari ibice 70 kw'ijana (70 %)
- ❖ Mu misoso hari ibice 75 kw'ijana (75%)
- ❖ Mu magufa hari ibice 20 kw'ijana (20%)

⁷³ Health Power, p.190

- ❖ Ahazengurutse uduce tugize umubiri (Liquide interstitiel) hari ibice 24 kw'ijana (24 %).

Uruhara rw'amazi mu mubiri

Buri gace kose ko mu mamiliyaridi y'uduce tugize umubiri w'umuntu (cellules), gakenera amazi kugira ngo gashobore kurangura ibikorwa bitandukanye vyama bibera mu mibiri yacu ubudahengeshanya. Igihe cose umuntu yinyagaje, akoresha amazi. Ibice 4 kuri 5 (4/5) vy'amaraso ni amazi, bisobanura ko n'amaraso atotembera atarimwo amazi.

Gusohora amazi kw'umubiri biciye mu rukoba (amalitiro 500 n'imiburiburi ku musi), nivyo bituma umubiri w'umuntu atarwaye ugira ubushuhe busanzwe bw' amadogre (degrés) 37.

Marlene Wehr atubwira ko « *umubiri wacu ukoresha ibirahuri 40000 vy'amazi buri musi kugira ngo bikure ibigaburira umubiri mu gace kamwe k'umubiri (cellule) abijana mu kandi hamwe no mugusohora imyanda* »⁷⁴.

Ivyo ntibisobanura ko ayo mazi yose ari mu mubiri, ahubwo ni rwa rugero rw'ibice 4 kuri 5 vy'amaraso ruguma ruzunguruka mu mubiri. Amafyigo y'umuntu arafise akayungiro gakoze mu

⁷⁴ The Health of the Nations, p.5

buryo busiga ubwenge. Ako kayungiro gafise utwenge dutoduto cane tutoboneshwa amaso dushika nko ku miliyoni (glomérules), ari natwo akoresha mu gusohora imyanda iri mu maraso n’aho hariho iyisanzwe isohoka iciye mu rukoba no mu rura rukuru (gros intestin).

Ibihimba bihingura imfungurwa bikenera amazi kugira ngo yegeranye ibisigarira vy’ibifungurwa vyasigaye inyuma y’isebwa ryavyo mu mushishito no mu rura ruto.

Urukoba rurakenera amazi ngo rurembe kandi ruse neza. Amagufa arakenera amazi kugira ngo yorohe (flexibilité osseuse) ntabe ikintu kivunika bukwi.

Mbega wari uzi ko amazi ari umugabane umwe w’ibigize ingaburo umuntu ategerezwa kuba afise? Abahinga banonosoye ivyo ingaburo (Nutritionistes) bemeza ko umubiri w’umuntu ukenera ibirahuri 40.000 vy’amazi biwuzungurukamwo buri musi kugira ngo bikwiragize ibiwugaburira (indemamubiri, insanganyangaburo, ivyunyunyu n’ibindi) mu duce twose tw’umubiri hamwe no gusohora imyanda biciye mu rukoba, mu mwanda muto na mukuru hamwe rero no mu guhumeka.

Dogiteri **Aileen Ludington**, MD, yemeza ko iyo umuntu atanywa amazi ahagije buri musi, bica bituma umubiri uhatirwa gutakaza ibintu vyinshi cane, ari

navyo bica bituma ahumeka impwemu mbi hamwe n'umwanda muto unuka nabi⁷⁵.

Birakunze kuvugwa ko abafaransa batanywa amazi cane, ahubwo ko ico binywera ari umuvinyu. Ivyo vyohava bigutangaza, ariko no muri Amerika naho birakomeye. Abantu bakuze benshi ukunze gusanga binywera ibiyeri gusumba uko banywa amazi. Ikindi naco, icayi, ikawa, n'ibindi binyobwa bihinguwe nivy vyasubiriye amazi. Dogiteri **Aileen** ati: « *Muri rusangi abanyamerika banywa ibirahuri bingahe vy'amazi atavanze n'ibindi ? Mu vy'ukuri, kuri benshi ni nk'aho ata na kimwe banywa* ».

Mbega ubwo kuri wewe hoho siko biri ? Ariko kandi, wibuke ko Dogiteri **Hans Diehl** avuga ati: « *Kunywa amazi nico kintu umubiri ukenera kugira ngo urangure ibikorwa vyose ubuzima bukenere* ». Dogiteri **Pamplona Roger** nawe ati: « *Amazi, ni muyarutishe ikindi kinyobwa ico arico cose* ».

Nonywa amazi angana gute kandi ryari?

Dogiteri **Georges Pamplona Roger** yaranditse ku vyo amazi n'urugero rukenewe ku muntu akuze ku musi, ati: « *Nimwihatire kwama munywa buri musi n'imiburiburi ibirahuri 6 vy'amazi mu bihe atari ivyo kurirako, murenze urwo rugero mu ci. Nimunywe bibiri*

⁷⁵ Health Power, p.190

mu gatondo mutarafungura, kugira ngo mwoze umushishito imyanda yiremaramamwo mw'ijoro. Ni munywe kandi ikirahuri kimwe canke bibiri vy'amazi imbere y'ingaburo yo ku mutaga n'iyi ku mugoroba».

Ku vyo urugero rw'amazi n'igihe ciza co kuyanywerako, umuntu akuze akenera ibirahuri 6 gushika kuri 8 vy'amazi buri musi. Umwanya ubereye ni kuyanywa iminota 30 imbere yo gufungura canke amasaha 2 inyuma yo gufungura⁷⁶.

Urwo rugero rwogwizwa incuro 2 canke 3 mucu, kuko umubiri uca ukenera amazi menshi gusumba. Nico kimwe no mu gihe cose umuntu adahwa, acibwamwo, yiyuka akabiragira ivyuya n'ibindi bihe nk'ivyo.

Amazi yinjira mu mubiri ku musi.

Amazi umuntu akenera ku musi ategerezwa guhura n'urugero rw'ayasohoka mu mubiri ku musi, ayo nayo akaba asohoka uku gukurikira:

- Umwanda muto : Iritiro 1 gushika rimwe n'igice
- Icuya : Nk'iritiro rimwe
- Impwemu duhumeka : Igice c'iritiro gushika kw'iritiro
- Umwanda mukuru : Igice c'ilitiro.

⁷⁶ The Health of the Nations, p.5

Ku bw'ivyo rero, abahinga basanga ko amaritiro 2 gushika ku maritiro 2 n'igice, n'ukuvuga nk'ibirahuri 10 gushika 12 vy'amazi arivyo umubiri utakaza ku musi biciye mw'izo nzira.

Indya turya zitetse canke zidatetse zitwinjiriza ibirahuri bibiri gushika kuri bine vy'amazi, ivyo bigasobanura ko umubiri, usigara ukeneye ibirahuri 8 gusa dutegerezwa kunywa, ariko mukibuka ko ivyo bitegerezwa kugwizwa na kabiri canke gatatu mu ci hamwe no mu gihe umuntu akora ibikorwa bituma atakaza ivyuya vyinshi. Ivyo navyo rero bigenda bisumbanya amazi uku gukurikira:

- Ivyamwa n'imboga bitumye : ibice 85 kw'ijana
- Umukate wowo uba usigaranye : ibice 37 kw'ijana.

Ivyamwa n'imboga vyumye biba bisigaranye utuzi duke cane, ari naco gituma ivyamwa vyumye binyoteza mu gihe imboga zumye nazo ziguma. Nico gituma bisabwa kuzitekesha amazi aruta ayo wotekesha imboga mbisi. Kubw'ivyo rero, ibinyobwa tunywa bitegerezwa kuba bingana n'iritiro n'igice ku muntu no ku musi (ni ukuvuga ibirahuri 6 gushika 8 ku musi). Ivyo navyo vyoba ari nk'amazi, ivyayi bitonona umubiri (tisanes), imitobe y'ivyamwa yateguwe mu buryo bwiza canke isupu. Ariko kandi mwibuke ko ata kinyobwa na kimwe gikwiye gusubirira amazi.

Umuntu ategerezwa kunywa amazi kugira ngo abeho. Mu bugaragwa, umuntu atagira amazi kandi akaba atavuye aho ari, ashobora kubaho imisi 5 gushika ku misi 8 mu bushuhe bw'amadogre (degrés) 37. Hamwe yoba agendagenda mw'ijoro naho ntiyobaho imisi irenga 3. Hamwe yoba agendagenda ku murango hoho, ntiyorenga imisi 2. Nico gituma Dogiteri **Aileen Lundington**, MD, ayavugako ati: « *Amazi ni ikinyobwa gitunganye, kandi ni umwe mu migisha ikomeye cane ku buzima* ».

Twibuke ko urugero rw'amazi umuntu akenera rutegerezwa kuvana n'ibikorwa akora hamwe n'urugero rw'ubushuhe arimwo uko rungana. Igihe hari indugumba nyinshi, urukoba rusohora amazi menshi, ivyo bigasaba kunywa cane. Ariko rero n'aho biri uko ibirahuri 6 gushika ku 8 nirwo rugero ruto rubaho rudategerezwa guhara ku muntu akuze kandi ku musi. « *Uko uruzi rutemba rwihuta, ni nako n'amazi yarwo arushiriza kuba meza, uko aba ikidengeri ni nako arushiriza kuba mabi nk'uko biri ku kiziba* »⁷⁷.

Kubw'ivyo, amafyigo n'urukoba navyo nyene bitegerezwa gusohora imyanda yo mu mubiri kugira ngo bikore neza, ico gihe naho bikaba birinda gukenera amazi ahagije.

⁷⁷ Philosophie de la Santé, p.38

Uko amazi akora mu mubiri.

Amazi iyo ashitse mu mushishito avuye mu kanwa, ntaguma muri uwo mushishito, kuko igihe umuntu ayanywereye mu nda nsa, mu minota 30 gusa aba avuyemwo ageze mu rura ruto (intestin grêle), ariho aca ava aja mu maraso aciye mu dutsi duto duto cane turi mu ruhu rw'urura ruto (réseau de capillaires sanguins). Igihe ayo mazi ashitse mu maraso aca atuma ayo maraso avuragira k'urugero rwiza hanyuma agashobora gukwiragira mu mamiliyaridi y'uduce tugize umubiri (cellules) hamwe n'ahazengurutse buri gace kose (liquides interstitiels) hari hayakeneye.

Ariko kandi, bivanye n'uko amazi atakaye adaca asubirizwa ubwonyene, umubiri ufise uko uca uvuyifatamwo: Iyo umuntu anyoye amazi menshi, aca asohoka ku bwinshi biciye mu mwanda muto no mu cya; iyo unyoye amazi ari ku rushi naho, bica bibonekera mu kunyoterwa.

Kunyoterwa kuza gute?

Igihe umubiri utanguye gukena amazi, imbere y'uko na twa duce duto cane turemye umubiri (Cellules) tumenya ko twayabuze, ico umubiri ukora ca mbere na mbere, ni ic'uko amaraso aca avuragira ku rugero rudasanze. Amaraso aca asigara ari

nk'ikinyigimbe, akagwiriranamwo umunyu (Sels) n'indemamubiri (protéines). Kubw'ivyo rero, umuntu ashobora kunyoterwa bitewe n'uko umubiri wiwe ukeneye amazi canke amaraso yiwe yagwiriranye mwo umunyu n'indemamubiri. Kunyoterwa kumenyekanira mu kwuma mu kanwa. Hamwe umuntu yoba yatakaje ibice 10 kw'ijana (10%) vy'amazi ari muri we, ivyo bitera amasanganya akomeye cane. Umuntu apima ibiro 60 yoba atakaje amaritiro 6 y'amazi. Hamwe yotakaza ibice 20 kw'ijana (20 %) naho, vyoshobora gutuma asezera isi. Ico nico gituma mukunze kubona canke kwumva ko iyo umuntu agize ingorane yo gucibwamwo canke kudahwa cane ashobora no gukama amazi mu mubiri igihe bidashobotse ko ayo yasohoye ayasubizayo bidatevye, agaca apfa.

Igihe umuntu, anyotewe, usanga anywa ibice 90 kw'ijana (90%) vy'amazi abuze agaheza akageza ngaho: mu kanwa hariho uduhimba twama twiteguye kwakira amazi tukamenyesha ayo utegerezwa kunywa uko angana, mbere ivyo bikaba n'imbere y'uko n'ayo mazi yakirwa n'umubiri. Vya bice 10 kw'ijana (10 %) bisigaye biraheza bikaza kunyobwa mu masaha ane aza gukurikira, kiretse gusa mu gihe ivyo kwumva ugadutse vyobandanya, kubera ko kwica akanyota bitaza gusubiriza amazi yose umubiri uba watakaje.

Akandi karorero twotanga karabana n'inyota: ingamiya yo mu bugaragwa itakaza amaritiro 100 y'amazi mu ndwi, iyo ishitse aho iyanywera, ica inywa amaritiro 100 mu minota 10.

Iyo amazi akeshe

Iyo amazi akeshe mu mubiri, mu bwonko mu rwikorerero inyuma y'amaso (Lobe parietal) hariho icicarwo kiberamwo inyota (thalamus) gitanga ibintu bita orumone ADH canke Hormone antidiurétique (Hormone ADH) igatangwa n'agahimba kangana n'umutwe w'urutoke rw'uruhererezi (glande pituitaire) canke hypophyse. Iyo orumone ica ituma amazi yari gusohorwa hanze uko yishakiye anyegetera mu mubiri. Ico gihe umwanda muto uca usigara wagabanutse rwose, mbere ivyo bikaba hariho n'igihe bishobora guteza isanganya ry'ibihimba bisohora imyanda hamwe no gutuma amaraso avuragira gushika n'aho yipfundapfundika akarema utubuye tumeze nk'udusenyezi (calculs). Umwanda mukuru nawo urumagana, ugacika nk'ikinombe, uwo muntu akaba agumbije. Twa duce dutoduto twubatswe umubiri (cellules) natwo duca dukora nabi, umuntu agaca yumva arushe mukamenya ko umwana ariwe abangamirwa n'iyi ngorane gusumba umuntu akuzwe, maze ivyo bikamutera kwama arakazwa n'ubusa, yijiriwe kandi ariragurika ata gituma kiboneka.

Impamvu irasobanutse neza, nayo ikaba ari kubera ko ubwo bwonko buhereranye no mu rwikorerero (Lobe pariétal) aribwo cicaro c'ivyipfuzo: inzara, inyota, umunezero, ishavu, umubabaro, uburibwe n'ibindi nk'ivyo, none kikaba cabuze ico gikeneye, amazi.

Icoba ciza rero, ni ukurekera ikirahuri c'amazi ahantu umwana yoshobora gushikira, no kutamurinda kunywa amazi igihe cose ayashatse, kiretse gusa mu gihe yoba agira arye canke ahejeje kurya. Igihe vyashitse umuntu agasohoka amazi menshi cane (yadashwe canke yagize gucibwamwo, yabize icuya cinshi canke yayasohotse mu mwanda muto ku bwinshi), ni ngombwa kunywa amazi menshi cane arimwo akunyu (mw'iritiro ry'amazi woshiramwo igarama rimwe canke abiri (icagatatu c'akayiko gato), canke agahabwa isupu y'imboga nyinshi zirimwo ivyunyuyu (sels minéraux), ahandi ho amaraso yojoboroka nka kurya kw'amazi bikabije, n'uduce tugize ibihimba vyo mu mutwe natwo tukavyimbagana, ari navyo bica biteza ihindagurika ry'inyifato (troubles de comportement) hamwe n'iry'imiterere y'ubwenge (réflexes).

Urugero rw'amazi ufatiye ku vyo umuntu akora

Abahinga mu vyo kuduga ibisozi bihanamye (alpinistes) bagerageje kuduga igisozi Evereste

(Everest) gifise uburebure bw'imetero 8848, birabata ku w'amazi kubera ko barushe bagacobogora bivanye n'uko bari barimenyereje kunywa ibirahuri bibiri vy'amazi ku musu. Aho abo bahinga banywereye ibirahuri 12 vy'amazi ku musu hoho, baciye bawuduga birakunda.

Abahinga mu rukino rwo gusiganwa n'amaguru (athlètes) biruka ahantu hashushe, biruka ibilometero 5 n'igice (5,5Km) kw'isaha. Umurwi wa mbere nta mazi wari wabanje kunywa imbere yo kwiruka, maze uraheza uhagarara umaze kwiruka amasaha 3 n'iminota 30. Umurwi wa kabiri wowo wari wanyoye amazi urashira inyota: bamaze amasaha 6 yose biruka. Mu bisanzwe amazi yatakara mu cya no mu mpwemu basohora bari bayasubirije ica gatatu cayo (1/3) gusa. Umurwi wa gatatu wowo wahatiwe kwiruka wabanje kunywa urugero rw'amazi rungana n'urwo baza gutakaza birutse: inyuma y'amasaha 7 bari baciruka batarananiwira.

K'ubw'ivyo rero, iyo umuntu akoresha umubiri ibisaba inguvu, ategerezwa kunywa amazi imbere y'uko anyoterwa, kandi akanywa amazi arenze kuzimya inyota. Nk'uko tubimenyeshwa n'umurwi w'abahinga ujejwe ubushakashatsi mu vy'ingaburo wo muri American Academy of Pediatrics, *"inyota*

irashobora kutaba ikimenyamenya ntabanduka c’uko umubiri ukenye amazi”⁷⁸.

Igikorwa c’amazi ku rukoba

Urukoba narwo, ni urugingo ruhambaye cane rusohora imyanda y’ubwoko bwinshi mu mubiri biciye mu ntoboro zitaboneshwa amaso ruhemeramwo (Pores). Igihe umubiri ugize ubushuhe izo ntoboro ziriye kugira zisohore canke zinjize. Mu gihe rero urwo rukoba rudakorewe isuku rikwiriye, imyanda yose iba iri ku rukoba ruca ruyisubiza mu mubiri. Nico kimwe n’igihe umuntu yambara impuzu zidasukuye naho yoba yoze neza. Irya myanda iri muri zo ica yinjira mu mubiri. Na ntaryo hama hariho ibinure bisohorwa n’umubiri kandi navyo bikaba bitegerezwa kwama vyogejwe ngo bive ku rukoba uko bukeye uko bwije. Iyo bitagenze uko rero naho, twa twenge urukoba ruhemeramwo (pores) duca tuzibishwa n’iyo myanda, maze imikorobi nayo ikaka indaro mu mubiri. Igihe wumva upfutse kandi usukuye ninaho wumva n’urukoba rwawe rumerewe neza. Iyo bisigura ko amazi akenerwa imbere y’uko inyota ibaho. Inyota rero imeze nko kurira kw’umwana muto kuko nyina canke umurezi yamwirengagije.

Kukaba nkako, gukaraba amaboko uvuye mu kazu ka surwumwe (W.C) canke mu gihe uba wagize

⁷⁸ Pediatric Nutrition Handbook, p.54

ibintu vyanduye ukorako (nk'amafranga n'ibindi), hamwe rero n'imbere yo gufungura ico arico cose, ivyo nivyo ntambwe ya mbere igize isuku.

Uko amazi yo kunywa yoba ameze

Amazi yo kunywa ntategerezwa kuba arurumba canke akanye cane. Amazi akanye cane nk'ayo muri firigo yonona ibihimba bitunganya imfungurwa (mu kanwa, umushishito, igitigu, ...) nico kimwe n'igihe arurumba cane. Iyo amazi akanye cane atera imisoso igize umushishito gukanyarara no gusigara yadendebukiwe, ivyo bigatuma igihe umuntu ariye imfungurwa zitihuta kuva mu nda, umuntu akarwa mpishi. Iyo ashushe cane naho bishobora gutuma umuntu arwara igikomere co mu kibanza umushishito ufatanirijweko n'urura ruto (duodénium), umuntu akaba arwaye igikomere co mu mushishito (Ulcère gastroduodénal).

Ariko kandi, igihe bishobotse, vyoba vyiza ko umuntu abanza kunywa amazi angana n'ikirahuri c'amazi ashushe ku rugero rudaturira harya agomba arye canke ahejeje, kuko ayo ataco yonona kandi atonatuma indya ziteba mu nda nk'igihe umuntu anyoye ayakanye.

Ku vy'ayo mazi make ashuhije, **Ellen G White** abivugako ati: « *Amazi ashushe anyowe imbere yo*

*kurya (nk'ikirahure), nta kibi namba azokwigera azana, ahubwo nyabuna azana ivyiza vyinshi ».*⁷⁹

Amazi mu mwanya wo gufungura

Ntukigere unywa amazi uriko urafungura, kuko ivyo biteza ingorane nyinshi. Mu bisanzwe wibuke ko iyo umuntu anyoye amazi ata ndya ziri mu nda, amara iminota 30 gushika kuri 45 gusa akaba avuye mu mushishito ashitse mu rura. Ariko iyo umuntu anyoye amazi agaca aya canke ariye akaca anywa amazi hoho, bituma ibintu bita sike gastrike (suc gastrique) birimwo ibintu bifasha mw'itunganywa ry'indya bijoboroka (dilution), ari navyo bica bituma indya ziteba mu mushishito gushika n'aho inda iguma yuzuye, zikagashiramwo, umuntu nawe agatangura gutura amangati (uretse ko hariho n'izindi mpamvu zibitera).

Bituma kandi umushishito unanirwa no gusekura izo mfungurwa, ari naco gituma uca ufata igikorwa co kubanza gushusha ayo mazi no kuyavangura n'indya ukayarungika mu rura ruto, hanyuma ukabona kuzoca utangura gusya izo ndya. Ivyo rero bica vyonona urutonde rwiza rw'amasaha yo kurirako kuko uza gusubira kurya umushishito utigeze uronka akaruhuko bivanye n'uko waremerejwe umuzigo utagenewe n'Uwawuremye. Ivyo ni navyo

⁷⁹ Counsels on Diet and Foods, p.419

kandi bituma abatari bamwe iyo bahejeje kurya baca bumva imisonga mu nda, kandi bakagwa mpishi. Iyo umuntu yabigize akamenyero hoho, ashobora no kurwara igikomere mu mushishito (ulcère gastrique) canke igihe cose ariye n’aho yoba yariye duke kandi tutanagumye, akama yuzuye inda (indigestion) kuko umushishito warambiwe n’umutwaro uremekwa uko bukeye uko bwije. Ayo rero niyo makosa aharawe gukorwa mu ngo nyinshi cane mw’isi yose, abantu bakaba bariko barimbisha imva amenyo batabizi canke bavyirengagije, kuko abantu bagenda bakurikira akamenyero barazwe na ba sekuru. Ukugabisha kwa Dogiteri **Brundtland** kurabereye kwitwararikwa n’abafise akamenyero ko kunywa nabi amazi: *“Isi irahanzwe bitewe n’uko tutigera duhitamwo canke twaramuka duhisemwo naho tugahitamwo nabi”*.⁸⁰

Namba ukunze kunyoterwa uriko urarya, burya hariho impamvu bivako, ushobora kwisuzuma ko ari wewe ubitera:

- Hari igihe woba warimenyereje kunywa uriko urarya
- Woba urya ibintu binyoteza cane nk’ipiripiri, umunyu mwinshi n’indya zigumye cane.

Kwisunga inama zikurikira bizogufasha kutaba ukinyoterwa uriko urarya:

⁸⁰ Rapport sur la santé dans le monde 2002 OMS (sur la couverture)

- Hora unywa ikirahuri kimwe canke bibiri iminota 30 imbere yo kurya bizotuma utanyoterwa uriko urarya.
- Hagarika kwimenyereza kurya usomeza amazi canke ikindi kinyobwa.
- Hagarika kurya ipiripiri kuko uretse ko inyoteza, isanzwe iteza amabi menshi mu mubiri, nk'ibikomere vyo mu mushishito.
- Gabanya urugero rw'umunyu ukoresha ku musi, utorenza amagarama 5 y'umunyu ushira mu vyo urya vyose (akayiko gato kamwe ku musi).

Ku batanyoterwa ...

Egome, hariho abantu bamwe bashobora kumara umusi canke n'itatu batanyotewe, ariko iyo si impamvu y'uko imibiri yabo idakeneye amazi. Ikindi naco, inyota si co kimenyetso nyamukuru kitwereka ko imibiri yacu ikeneye amazi. Abahinga rurangiranwa mu vy'ingaburo n'amagara y'abantu barahuriza hamwe mu kwemeza ko kunyoterwa atari co gikwiriye kudutera kunywa conyene.

Nywa amazi ariko kandi meza

Ellen G. White ni we yanditse ati: «*Abantu ibihumbi vyinshi barapfuye bishwe no kubura amazi meza* »⁸¹.

⁸¹ Counsels On Diet and Foods, p.419

Mw'itangazo ryashizwe ahabona n'Ishirahamwe mpuzamakungu ryitaho amagara y'abantu kw'isi (**OMS**), aho hari muri 1986, bemeje ko ibice 80 kw'ijana (80%) vy'indwara zisinzikaje abantu na canecane mu bihugu bikiri mu nzira y'amajambere zokingwa hamwe abantu bonywa neza amazi meza⁸².

Mu cegeranyo giherutse gushirwa ahabona n'iryo shirahamwe, basanze ko gushika mu mwaka w'2000, ibice 88 kw'ijana (88%) vy' indwara zo gucibwamwo zaterwa no kunywa amazi mabi ⁸³.

Mu turere tutari tumwe two kw'isi na cane cane mu bihugu bikiri mu nzira y'amajambere nk'Uburundi, ukunze gusanga abantu badakunze kuronka amazi meza banywa. Bamwe usanga banywa amazi yo mu nzuzi canke mu biyaga, abandi banywa ayo mu myonga no mu mariba, eka hariho n'abayavoma mu binogo, tutibagiye ko hariho n'abakoresha amarekano y'imvura. Aho vyitwa ko agirirwa isuku, usanga avomwa ku marobini yubakiwe ku buryo bwa kijambere, mbere ugasanga ayo mazi arashirwamwo n'imiti yica imikorobi itari imwe. Ariko ubwo buryo bwose ntibutomoye gushika n'aho umuntu yobwizigira. Mbega woba ugeze uno musu utarabona canke utarumva aho abantu bavoma utuyoka, intozi

⁸² Natural Remedies Encyclopedia, p.97

⁸³ Rapport sur la Santé dans le Monde 2002, p.73

canke udusiba dutoduto ku mabombo y'ikizungu ? None ivyo biba vyaje bivuye hehe ? Ikizwi coco, ni uko niyo boramuka buguruye mw'itangi (étang) y'amazi bakoza kandi bagashiraye imiti, bataba bogeje n'amatiyo amazi azananamwo ari nayo usanga yarashonokoye(yaranduye) cane.

Ico nico gituma mu cegeranyo cakoze n'umurwi w'abahinga bo mw'Ishirahamwe mpuzamakungu ryitaho amagara y'abantu kw'isi (**OMS**) basanze ko abantu bapfa ku mwaka bazize kunywa amazi mabi n'isuku rike babarizwa ku muliyoni n'ibihumbi amajana indwi (1.700.000) kandi icenda kw'icumi bo muri abo bakaba ari abana, kandi hafi ya bese bakaba ari abo mu bihugu bikiri mu nzira y'amajambere ⁸⁴.

Ni naco gituma uwitwa **Raul Escobar** adukurira inkoni ku gishitsi mu kutwumvisha neza ko ata yindi nzira tworonkamwo amazi meza atari mu kuyateka gusa, kuko n'iyo miti bashira mu mazi ntiyijana. Aravuga ati : « *Inzira imwe rudende yotuma amazi aba atarimwo imigera y'indwara ni ukuyateka imbere yo kuyakoresha* » ⁸⁵.

Kugira ngo dushire amakenga ku mazi tunywa rero, ni ngombwa ko tuba twitwararitse ibi bikurikira:

⁸⁴ Rapport sur la Santé dans le Monde 2002, p.XVII

⁸⁵ A Better Way to Health, p.18

- Ikibanza tuyavomamwo
- Igikoresho tuyavomamwo
- Urugero rw'ubushuhe afise
- Ko yoba yatetswe akabira
- Ko inyuma yo gutekwa yashinguwe mu kintu cogejwe neza kandi apfundikiwe
- Ko atabitswe imisi irenga ibiri, na cane cane igihe yashinguwe mu bikoresho bitizigiwe cane vyo kuyarinda imyanda.

Twisunze ku vyo twize kw'ino « ntambuko ya 3, ishura « ego » canke « oya » kw'ibi vyiyumviro bikurikira:

1. Amazi meza ni ayo yose avomwe kw'irobini canke kuri za rusengo.
2. Amazi meza ni amazi yakiwe n'izuba kuko izuba ryica imigera y'indwara iba mu mazi
3. Amazi meza aba yatetswe akabira hanyuma akabikwa apfunduruye kugira ngo ahore.
4. Umuntu akuze yonywa ibirahuri 8 ku musu kandi mucu.
5. Amazi umuntu anywa mucu hageze mu rushana yoca ayagwiza na kabiri canke gatatu.
6. Umwanya mwiza wo kunywa amazi ni ukuyanywa amasaha 2 imbere yo gufungura canke iminota 30 inyuma yo gufungura.

« Ufise amagara meza canke urwaye, amazi meza ni umwe mu migisha iruta iyindi ijuru ryatoranije. Kuyakoresha neza bitera kugira amagara meza. Ni ikinyobwa Imana yatanze ngo kizimye akanyota k'ibikoko n'ako umuntu. » Ellen G. White, Umwanditsi rurangiranwa wo mu kinjana ca 19 (1927-1915).

“Kandi n'amazi uzokwama uyanywa ku rugero”⁸⁶

⁸⁶ **Ezekiyeli, 4:11**

Umuco w'izuba

Izuba niryo soko rya mbere ry'inkomezi ziboneka kw'ino si yacu. Umuco w'izuba ni nkenyerwa cane ku buzima no ku magara.

Insanganyangaburo D

Kubw'izuba, urukoba rwacu rushobora kwihingurira insanganyangaburo (Vitamine) D ikomeza amagufa n'amenyo mu gufasha guhoma icunyunyu kalisiyumu na fosiforo aho ku magufa no ku menyo.

Igihe umuco w'izuba urasiye ku rukoba n'iyi hoba ari ku maboko no mu maso gusa, umubiri uca wihingurira iyo nsanganyangaburo D. Iyo nsanganyangaburo D rero ica igenda igafata icunyunyu kalisiyumu na fosiforo (phosphore) biri mu mara kugira ngo ibikoreshe mu kwubaka igikankara c'amagufa gikomeye, kuko ituma ico cunyunyu cihoma ku magufa. Iyo bica bituma nk'abana batarwara ya ndwara ituma amagufa ajegenyuka agasigara ahwahutse (Rachitisme) kandi igakinga n'indwara y'ijegenyuka n'ihwahuka ry'igikankara c'amagufa ku bagore (Ostéoporose) canke ku bagabo

(Ostéomalacie). Ikindi naco, abantu baca barindwa kuvirirana amaraso mu binyigishi.

Umuco w'izuba kandi utuma abasirikare barwanira umubiri (the immune system) bagwirirana, ugabanya ububabare mu gihe umuntu aribwa mu ngingo z'amagufa, ugabanya ca kinure kibi mu maraso.⁸⁷

Aho umuco w'izuba uri hari ubuzima n'amagara meza. Ikindi naco iyo karya kazuba ko mu gatondo karasiye ku rukoba rwacu, niyo hoba ku maboko no mu maso gusa, bica bituma igice kimwe c'ibinure biri munsu y'urukoba bihinduka insanganyangaburo D ya gatatu (Vitamine D₃), igaca iza gushingurwa mu gitigu kugira ngo umubiri uze guhora uyikorako igihe cose uyikeneye mu gikorwa co gutuma ca cunyunyu kalisiyumu cihoma ku gikankara c'amagufa (squelette), ari navyo bituma umuntu agira amagufa n'amenyo bikomeye. Iyo nsanganyangaburo D₃ rero, ushobora kuyibika mu gitigu ukamara n'amezi uyikorako no mu gihe woba utari ahantu ushoboye kuyironka umusi ku wundi ivuye ku zuba canke muvuye urya.

Umuri w'agahinda

Biramaze kwibonekeza ko mu bihugu bitari bimwe iyo hageze mu rushana aho hashobora guhera igihe kitari gito hatabonetse umuco w'izuba abantu baho

⁸⁷ Health Power, p. 195

bakarirwa n'indwara zifatira mu mutwe, nko kwama ufise agahinda (Stress). Ubushakashatsi buramaze kuvumbura ko umubiri w'umuntu ushoboye kwihingurira ibintu bituma umuntu yama anezerewe bita indofine (Endorphins). Igikorwa c'ayo ma indofine rero, ni ugutuma umuntu, iyo agize ikimubabaje, aca yiyumanganya bigashoboka. Kugira ubitahure, raba ukuntu umuntu ashobora gutsitara kw'ino canke akihonda ku rutoke akababara cane, ariko inyuma y'umwanya muto wa mubabaro ukaba wayongayonze. Uba wagiye hehe?

Ya ma indofine (Endorphins) ahingurirwa mu bwonko butumberanye no mu rwikorerero (Lobe pariétal) muri kagahimba kangana n'urwishaza bita hypophyse, ntagabanganya uburibwe n'ububabare gusa ahubwo atuma ukira n'aho wakomeretse canke warwaye, kuko yongereza inkomezi z'abasoda barwanira umubiri (immune system), kandi agatuma wumva umerewe neza mu buryo butangaje.

Dogiteri **Aileen Ludington**, MD, atumenyesha ko kwama wakoze imyimenyerezo ngorora mubiri n'imiburiburi iminota 30 ku musu ukanaronka umuco w'izuba bituma ubwonko buhingura izo indofine (Endorphins) zirwanya ivyo kwamana agahinda, maze umuntu akumva yifitiye amahoro ⁸⁸.

⁸⁸ Health Power, p.226

Mbega hari umuntu n'umwe yoshobora kubaho ata zuba ririho? Mbega ukuntu iyi si yose iba yuzuye amarushwa gusa hamwe ikirere cose kiba ari ibicu n'ibipfungu gusa! Izuba ritariho, ibimera vyose vyoca bitikira, abantu n'ibikoko navyo bigahona. Eka mbere n'ikirere naco gikenera imishwarara y'izuba kugira ngo gishobore gutanga impwemu duhumeka zivuye hanze. Mu bushakashatsi bwakozwe n'abahinga mu vyo kwiga ubuzima bw'ibihema (Biologistes), basanze rirya bara ry'akatsi gatoto ivyatsi n'amababi usanga bifise ribiterwa n'umuco w'izuba. Ivyo ni wagomba kubihinyuza, urafata ishurwe canke igiti ugishire mu gikopo kirimwo ivu n'umwavu uce ushira hanze uhore ukivomera, uzosanga gitotahaye. Ariko niwafata ico giterwa nyene ukagishira mu nzu, n'aho uzogikorera ivyo wagikoreye kikiri hanze, uzosanga cahishiye, kirwaye.

Ninaco gituma Dogiteri **Carlos Kozel** we avyita ngo ni «*Nyina w'ubuzima* ». ⁸⁹

Hamwe izuba ryohagarara ntiribe rigiseruka kw'ino si yacu, ubuzima bwose bwoca buhagarara, maze inkurikizi zavyo nazo zikaba ziteye ubwoba. Insanganyangaburo n'ivyunyuny twihereza ziva ku zuba n'ikuzimu bikubaka imibiri yacu n'iy'ibikoko. Ivyo vyose vyoba birangiye.

⁸⁹ The Science of Natural Healing, p.48.

Abanyabwenge b'isi bamwe bemeza ko izuba rimaze imyaka amamiliyoni menshi ririko riraka. Bibaza ko niryamara iyindi myaka amamiliyaridi atanu canke atandatu ririko riraka rizohava rihindagurika rigacika ikinyenyeri rutura gitukura. Ico kinyenyeri kizoca kirovya amasi (Planets) nka Merikire (Mercury), Venisi (Venus) eka mbere n'ino si tubako, ivyo bitume ubuzima bwose bw'ino si buhagarara ⁹⁰.

N'aho nyene tutokwizera ivyo vyiyumviro vy'abo bashakashatsi mu vy'ikirere (Astronomers) nk'aho ari ivyo ukuri kuko bivuguruza umugambi Umuremyi afitiye iyi si n'abayibako, ivyo bavumbuye ku ruhande rumwe birerekana ko izuba ari *"Nyina w'ubuzima"* nk'uko Dogiteri **Carlos Kozel** abivuga. Twisunze ubushakashatsi bwakozwe n'abanyeshure ba Bibiliya, isi imaze imyaka 6000 irengako mike gusa.

Abo bahinga kandi baragirako nabo nyene bakivuguruza mu guhumuriza abantu babaremesha ngo ntibarazwe ishingira no kwibaza ko iyi si igiye guhava ihinduka amayoberane, aho ubuzima budashoboka. Ahubwo bemeza ko bitebe bitebuke abayibako bose bagiye kuyivako bakaja kwibera mu yandi masi. Umve uko babivuga mu mvugo ihumuriza umutima w'abizera n'aho nyene boba babivuga nk'aho bizoba muri kazoza ka kure cane:

« Ibiremwa muntu ico gihe (imbere y'uko izuba rizohinduka ntiribe rigitanga ubuzima kw'isi), bizoba

⁹⁰ The NOVUS Solar System Mobile (1987), p.4

*vyamaze kwimukira mu tundi turere two mu yandi masi maze baheze bibere mu masi mashasha. Kumbure muri ako kazoza kakure cane, tuzoba twamaze kubonana n'ibiremwa bifise inkomezi zityoroye, tutagikeneye iyi mibiri ikorakorwako, canke isi n'izuba, dusigaye dushoboye kwitemberera mu nyenyeri atakituzitira ».*⁹¹

Yohana nawe ati: « *Mbon'ijuru risha n'isi nsha, kuko ijuru rya mbere n'isi ya mbere vyari vyagiye... Kandi wa murwa nturinda kwakirwa n'izuba canke ukwezi, kuko ubwiza bw'Imana aribwo buwakira kandi wa mwagazi ariwe tara ryawo ».*⁹²

Dogiteri **Aileen Ludington**, MD, ati: « *Guhora witaragaje ku zuba igihe kirekire bishobora kugukwegera kanseri yo ku rukoba hamwe no kuzana iminkanyari no gusaza kw'urukoba hataragera. Ariko kandi iyo umuntu aryose ku rugero rwiza hoho, imishwarara y'izuba ishobora kuba myiza ku magara yawe».*⁹³

Umuti w'itiro

Mw'ino myaka iheze, abahinga baherutse kuvumbura ko umubiri w'umuntu hariho ibintu bita mélatonine (Melatonin mu congereza), bitera gusinzira neza. Abana rero ngo usanga baronka iyo melatonine nyinshi cane ari naco gituma bakunze

⁹¹ The Novus Solar System Mobile (1987), p.4.

⁹² Bibiliya Yera, Ivyah. 21: 1, 23.

⁹³ Health Power, p.194.

gusinzira gusumvya abakuze, ariko kandi ngo igenda igabanuka uko umwana agenda akura. Iyo melatonine rero umubiri uyihingura mw'ijoro hatabona igahingurwa n'ubwonko. Iyo melatonine kandi ntishoboye kubikwa mu mubiri, akaba ari naco gituma twama twayikeneye buri musu kugira ngo tubone gusinzira neza. Ubushakashatsi bwerekanye ko kwama wota akazuba buri musu bituma iyo melatonine igwirirana ku bwinshi.

None izuba ryopimwa gute?

Abahinga mu vy'ikirere (astronomers) baremeza ko ca gisenge bita “Couche d'Ozone” kijejwe kuyungurura imishwarara y'izuba gikomeza gusaza. Uno musu rero bituma imishwarara y'izuba ishika kw'ino si ifise ubushuhe bukomeye cane kuruta uko vyari kera. Ni naco gituma Dogiteri **Pamplona Roger** atugabisha ku vyo kwitaragaza ku ruzuba ati: *«Kwitaragaza ku ruzuba ikiringo c'amasaha abiri ntaho vyigeze biba vyiza, ariko uno musu ho birakabije kuba bibi»*.

Ni nkenyerwa rero kwota izuba ariko kandi, iryo zuba tworyota umwanya muto kandi rikaba ari rirya ryo mu gatondo canke ku kagoroba, kuko iryo ku mutaga ari ryo riteza kanseri y'urukoba. Iyo kanseri y'urukoba rero, ngo irakunze kubangamira abantu bakunze kwihereza ingaburo igwiriyemwo ibinure biva

mu bikoko. Bene abo bantu ukunze gusanga badakunze no kurya imboga z'insoromano n'ivyamwa bigwiriye mu insanganyangaburo (Vitamines) A,C,E hamwe n'icunyunyu (Sel minéral) seleniyumu (Sélénium) ahanini biboneka mu bimera kandi bikaba bifise uruhara ruhambaye mu gukingira umuntu iyaduka ry'indwara ya kanseri. Ubushakashatsi bumaze gukorwa n'abahinga mu vy'ingaburo n'amagara y'abantu bwasanze ko uko umwaka utashe, kw'isi haboneka abarwayi ba kanseri y'urukoba bashika 450.000, kandi ahanini bakabiterwa no kurya ibinure vyinshi biva mu bikoko hamwe rero no kwitaragaza ku zuba igihe kirekire.⁹⁴

Dogiteri Carlos Kozel avuga ko igihe ciza co kwota izuba ari harya mu gatondo, kandi ko umuntu akwiriye kwirinda cane rurya ruzuba rwo ku mutaga.⁹⁵

Iyo umuco w'izuba urasiye mu nzu, ushobora gusangangura imigera y'indwara ihari ukica n'udukoko dutoduto twoduteje indwara tutabizi. Iyo bisigura ko amazu yacu yari akwiriye kugira amadirisha manini manini, kandi akaba aherereye iyo izuba rituruka ku buryo iyo mishwarara iruhukira mu nzu.

Ariko kandi, umenye ko nko mu gihe imishwarara y'izuba irasiye ku biyo (vitres) vy'inziye canke

⁹⁴ The Health of the Nations, p.6, soma kandi Health Power, p. 195.

⁹⁵ The Science of Natural Healing, p.278.

vy'amadirisha no kumarido, ivyo biyo bituma ya nsanganyangaburo D3 idashobora guhingurwa kuko ububasha bw'izuba budashobora kubirengana ngo ishike mu nzu. Naho rero ushobora kwicara mu nzu ukumva akazuba kagushitse, ntuze uhave wihenda ngo n'iyo nsanganyangaburo nayo wayironse.

Inzira irashe yo kuyironka, n'uko wosohoka hanze ukaryota, ivyo navyo akaba ata mwanya bigutwara, kuko iminota 30 canke isaha yonyene ihagije kugira ngo ube uronse ibikenewe ku zuba.⁹⁶

Ibiti canke amashurwe bitera igugara, ntibikwiriye guterwa ku madirisha canke ngo vyegerezwe ahantu vyashobora kuzibira umuco w'izuba ngo ntiwinjire mu nzu uciye mu muryango canke mu madirisha. **Ellen G. White** avuga ukuntu abantu benshi bagira urwangara rwo kureka ngo umuco w'izuba n'akayaga keza vyinjire mu nzu, na cane cane mu vyumba vy'abarwaye. Umuco w'izuba rero, ni ikintu ciza cane Imana yashize kw'isi, igitangira ubuntu ku bw'imbabazi zayo, ariko abo kw'isi benshi, haheze imyaka irenga ibihumbi 6 (6.000) bataruha bakimenya ico ari co. **Marlene Wehr** ati: « *Umuco w'izuba ni umwe mu migisha ikomeye cane ivura indwara umuntu yahawe* ».

⁹⁶ Philosophie de la Santé, p.27.

Twisunze ivyo twize kw'ino « ntambuko ya 4 », ishura « ego » canke « oya » kuri bino vyiyumviro biri hano hepfo:

1. Izuba ritahari ariko amazi akaboneka, ubuzima kw'ino si bwobandanya.
2. Kwota izuba ikiringo kirenze isaha na canecane iryo ku muhingamo, bidukingira kanseri yo ku rukoba
3. Umuco w'izuba utuma umugabane umwe w'ibinure vyo munsu y'urukoba bihindukamwo icunyunyu kalisiyumu gikomeza igikankara c'amagufa n'amenyo.
4. Umuco w'izuba utuma ubwonko buhingura ibintu bita melatonine bituma umuntu yama yumva ashavuye ata mvo.
5. Umuco w'izuba utuma ubwonko buhingura ibintu bita indofine (endorphins) bituma umuntu yama anezerewe.
6. Umuco w'izuba uteza kanseri y'urukoba, rero urice kure.
7. Umuco w'izuba utuma udukoko duteza indwara tugwirirana aho hose ugeze.
8. Ibiyo n'amarido ntibishoboye kuzibira ubushobozi bw'izuba ngo ntirifashe abari mu nzu guhingura insanganyangaburo D.
9. Insanganyangaburo D iyo igwiriye mu maraso ituma ibinyigishi bivirirana amaraso.

10. Akazuba kabereye umubiri ni karya ko hagati y'isaha zitanu (11h) n'icenda (15h) z'umurango.

*«Imana iravuga, iti nihabeho umuco; umuco ubaho. Imana ibona umuco ko ari mwiza ».*⁹⁷

⁹⁷ Itanguriro 1: 3-4.

Kwirinda

Umuhinga mu vyo kwiyumvira (Philosophe) w'umugiriki yitwa **Socrate** niwe yavuze ati: « *Abantu bamwe babaho kugira ngo barye, ariko jeho ndya kugira ngo mbeho* » .

Ayo majambo hamwe woyakurikirana neza, yerekana ko abantu bashobora kubaho bategekwa n'inda zabo canke aribo bazitegeka. Umuntu rero ntakwiriye kubaho ategukwa n'akayabagu kiwe, kuko iyo bigenze uko arya kandi akanywa ico cose kimuje mu vyiyumviro ataravye ico arico n'igihe akironkeye. Iryo jambo « Kwirinda » (tempérance) rero, rishobora gusigura kwitegeka, kwigerera, kwibuza canke kwifata. **Marlene Wehr** nawe asobanura «ukwirinda» ati: « *Ukwirinda ni ukwomatana rwose n'ico cose gituma habaho amagara meza. Kwirinda, ni kwigizayo ico cose conona nk'inzoga, itabi, imiti irimwo uburozi, icayi n'ikawa, ibinure hamwe n'isukari y'intete* »⁹⁸.

Ukutirinda rero gushobora kwibonekeza dufatiye ku vyo turya n'ivyo tunywa, kuko uwudashoboye kwirinda mur'ivyo no mu bindi ntiyitegeka ngo

⁹⁸ The Health of the Nations, p.5

bikunde. Hamwe woba ushoboye kwihweza ngo ubone, wosanga ko isi ya kino gihe igeramiwe n'ibintu bitatu bikurubikuru:

- Ukutamenya,
- Ukutitegeka,
- Ubukene.

Ukutirinda gutuma abantu ibihumbi vyinshi bapfa bakenyutse canke bagafutanira mw'ino si babitewe no kwihereza ibintu bazi ko bisinzi kaza amagara yabo ariko bakaba ata nkomezi bagifise zo kuvyibuza. Ivyo navyo ni nko kunywa inzoga zirimwo alukole, kurya inyama, amagi n'amafi hamwe n'ibihingwe muri vyo. Kunywa isukari yo mu mahinguriro nyinshi, kunywa icayi n'ikawa, kurya imburagihe no kurenza urugero mu kurya no mu kunywa tudasize inyuma no kugira urwangara rwo kwihereza ivyubaka imibiri yacu kandi twari dushoboye kubironka. Uwitwa **Bryan Adams** niwe yavuze ati: *"Mmaze imyaka 12 yose ndya ibimera gusa kandi sindigera nsinzi kaza n'ingwara na rimwe. Imfungurwa zigizwe n'ibimera zikomeza abasirikare bakingira umubiri ; jewe ndizera ko kurya inyama bitera ingwara."*

Ibihe vyinshi rero, usanga n'iyi umuntu amaze kumenya ivyiza n'ibibi ivyo ari vyo, ashishikara kugendera mu bidakwiye kubera akamenyero katoroshe kunesha. Dogiteri **Aileen Ludington**, MD,

niwe yabivuze ko ati: « *Kwama wasubiyemwo ikintu ari ciza, ari kibi bitera ingeso gukomera mu buzima bwacu: kandi ingeso zamaze gushinga imizi, zerekana imico yacu iyo ariyo*».

None ingeso ziremwa gute?

Nk’uko bishoboka ko wari usanzwe ubizi, ubwonko bw’umuntu burarungikira amakuru ibindi bice vy’umubiri bubicishije mu duce dutoduto (cellules) tugize udutsi two mu bwonko. Buri gatsi kose rero gafise icicarwo mu gihimba co mu bwonko kijejwe ibintu vyose bijanye n’inzara, inyota, ishavu, ubushobozi n’ubushake bwo kurangura amabanga y’abubatse, itiro, umunezero, kubabara, uburibwe, kugira akamenyero k’ikintu runaka, imimerere y’imvukanano, ico naco bakaba bacita talamisi (thalamus), gikorera muri bwa bwonko buhereranye no mu rwikorerero (Lobe pariétal).

Ubwonko rero burungika amakuru mu bindi bice vy’umubiri bubirungikaniye udutsi two mu bwonko (cellules nerveuses), mu gihe agatsi kose isanga gafise ikibanza gahuriramwo na tugenzi twako aho mu bwonko nyene, ari naho abahinga bita mw’itororokanirizo ry’amakuru (synapses). Aho nyene hariho n’uyundi mutsi muremure cane ushobora kuva mu bwonko ukamanuka uruti rw’umugongo ugashika no mw’ino, bakawita akisone (Axone). Iyo mitsi yo mu bwonko itanga amakuru (cellules nerveuses),

irafise utundi dutsi dutoduto cane kandi twinshi twakira amakuru yinjiye avuye hanze.

Igihe uyo mutsi muremure utwara amakuru mu bwonko ukoreshejwe canke biciye mu kwiyumvira, guhoza ikintu mubwenge canke kucumva kenshi, ku maherezo y'utwo dushami twawo (dendrites) haca hipfundikako udutetetete dutoduto cane ariko twinshi (boutons), kandi uko utwo dushami (dendrites) tw'uwo mutsi akisone (axone) tugwiza utwo dutete (boutons), ninako amakuru yinjira mu bwonko anyaruka cane kandi mu buryo bubangutse. Ivyo navyo biba iyo umuntu yumva ikintu kenshi canke akagihozako ubwenge.

Ivyo bidufasha gutahura ukuntu ingeso canke ubumenyero vyiremera mu bwonko muri bwa bwonko bwigenga butumberanye no mu rwikorerero (Système nerveux autonome). Ico ninaco gituma gusoma ibitabo cane canke kwiga cane bituma ubwenge bwi Yongera, umuntu akamenyera gufata ivyo yize canke yumvishije ubwenge bwiwe.

None iyo utwo dutete tumaze kwifundikanya vyoba bishika tukahava?

Utwo dupfundo (boutons) iyo twamaze kwipfundika ntidusubira kuvaho, ari naco gituma umuntu ashobora kuzinukwa no guheba ubusambanyi, ariko atazokwigera yibagira ko yasambanye, uwo yasambanije n'aho yabikoreye,

kuko icyo cyumviro kiba cagiye kigaruka mu bwenge kenshi.

None wumva vyashoboka ko umuntu aheba akamenyero amaranye ibihe n'ibindi?

Ego birashoboka ariko umuntu yubaka ubundi bumenyero bushasha kandi akabikobetereza cane kurusha mbere n'uko yari yarabigenjeje ku bwo yipfuzaga kurandurana n'imizi. Ivyo navyo bisaba kwimenyereza bishasha, kuvyiyumvira kenshi. Ivyo igituma bishoboka, ni kubera ko n'abahinga bemeza ko umuntu atari we ategukwa n'inyota, inzara, akayabagu, ishavu, ivyipfuzo vy'umubiri, n'ibindi nk'ivyo, ahubwo ari we abitegeka.⁹⁹

Ni kuki bitoroshe guhindura ingeso?

Incabwenge imwe niyo yavuze ko atari icoroshe guhindura ingeso. Yavuze iti niwaba ubikekeranya, gerageza uno musu mu ijoro uze guhinduranya uruhande uhora uhereramwo mu kuryama n'umufasha wawe, maze ubirabe.

Ellen G. White aremeza ko umuntu wese afise imirere mvukana (hérédité), ariko kandi ko icyo idashobora kumutegeka kiretse abigizemwo urwangara mu kuyisubiriza icyindi Imana yemera:

⁹⁹ Philosophie de la Santé, p.113.

« Twese turafise ubunyantegenke mvukanano canke twaronse dukuze, ariko kandi turashoboye kuburonkako intsinzi y'agaciro buri musu »¹⁰⁰.

«Abashira ivyizigiro vyabo muri Kristo ntibategerezwa kugirwa imbohe n'ingeso canke akamenyero ak'ari ko kose bavukanye canke baronse bakuze»¹⁰¹.

Ku bw'ivyo rero, incabwenge nyinshi nka Dogiteri **Aileen Lundington**, Dogiteri **Hans Diehl**, **Jeff Wehr**, **Marlene Wehr** n'abandi, bemeza ko ushobora gufata amayinga 3 kugira ngo ube ushoboye gutuma ingeso canke akamenyero gashasha gashinga imizi.¹⁰²

Marlene Wehr nawe, avuga ko bitwara imisi 21 (amayinga atatu) kugira ngo umuntu abe yashoboye kurandura ingeso canke akamenyero ka kera no kuba yagasubirije gashasha. Ariko ivyo kugira ngo bishoboke, bisaba ko iyo misi yoyimara yitegereza Yesu agakura amaso kuri we no ku vyo akunze, kuko burya umuntu asa n'ico ahanze amaso.¹⁰³

Ni nako bimeze no ku kwirinda mu vy'imirire. Bisaba inkomezi zikomeye zirenze izo dufise, kuko «uko tugenda twegereza iherezo ry'ibihe, ikigeragezo

¹⁰⁰ Tell of His Power, p.228

¹⁰¹ Tell of His Power, p.227

¹⁰² Dogiteri Ludington, Health Power, p.223

¹⁰³ The Health of the Nations, p.15

*ca Satani co kunezereza akayabagu kizoba gikomeye cane kandi kitoroshe namba kunesha ».*¹⁰⁴

Ariko kandi, igihe umuntu aririye ku birenge vy'umwe yaneshereza akayabagu mu bugaragwa¹⁰⁵, ashobora kuronswa inkomezi zo kunesha: « *Abantu ntibazokwigera bacika abirinda nyakuri gushika igihe ubuntu bwa Kristo buzobera itegeko rigenga imitima yabo ».*¹⁰⁶

« *Mu bikorane vyacu bikuru vyose, twategerezwa gushikiriza abatwumva inyigisho zitavuguruzwa zishigikira ukwirinda kandi tukabinginga dukobeje rwose. Umwami yadushinze kwigisha ukwirinda rukristo twishimikije Bibiliya ».*

Ellen G. White, umwanditsi rurangiranwa w'umunyamerikakazi (1827-1915).

Ivyigwa vyerekeranye no kwirinda mu mirire, mu minywere no mu bindi birahambaye cane rwose mu bavuga ko biteguriye uguhindukira kw'Umucunguzi wabo. Kwirinda bituma haboneka kwezwa kw'umutima n'umubiri kandi bikagabanya imibabaro y'umubiri. Rero, nta juru ry'abatirinda rihari, kuko kwirinda ni itegeko rya Bibiliya.

“Ariko ivyo Mpwemu yama ni urukundo, umunezero, amahoro, ukwihangana, kugira neza,

¹⁰⁴ E. G. White, Counsels on Diet and Foods, p.59

¹⁰⁵ Bibiliya Year, Matayo 4:3-4

¹⁰⁶ Counsels On Diet and Foods, p.35

177

*ingeso nziza, ukwirinda: ibimeze bitryo nta vyagezwe bibibuza”.*¹⁰⁷

Ntihagire rero umutegetsu n’umwe yaba uwo mw’isi canke mw’ishengero yishira mu vyo atagezwemwo mu kurwanya inyigisho yo kwirinda ku mugaragaro canke mu mpisho kuko ntazobishobora, ahubwo azoba ariko arikwegera umuvumo w’Imana.

*“Igikorwa c’ubugorizi bw’ivy’amagara ni inzira Imana ikoresha mu kugabanya umubabaro mw’isi no mu kweza Ishengero ryayo. Iki gikorwa kidomweko ikidodo n’ijuru, kizokwugururira inzira ukundi kuri kw’agaciro. Muri kino gikorwa hariho ikibanza kw’uwo wese yipfuza gukorana ubwenge”*¹⁰⁸.

Kwigerera mu kurya ni akaranga kerekana abavuga ko ari abagize Ishengero ry’Imana. Abayoboke b’Imana muri kino gihe c’iherezo ni barya baja b’akayabagu.

*« Uzoba uhiriwe, wa gihugu, umwami wawe iyo ari uwo mu nda y’abami, abaganwa bawe bakaririra mu gihe gikwiye, kugira ngo baronke inkomezi, atari ukugira ngo baborerwe »*¹⁰⁹

Twisunze ivyo twabonye kuri iyi ntambuko ya 5, niwishure « ego » canke « oya » kuri ibi vyiyumviro:

¹⁰⁷ Bibiliya Yera, Abi Galatiya 5: 22-23.

¹⁰⁸ Ellen G. white, Service Chrétien, P.166

¹⁰⁹ Umusiguzi 11 : 17

1. Kwirinda ni inyigisho yadukanywe n'akarwi k'indenzarugero kuko iryo jambo ataho riboneka muri Bibiliya canke muri mpwemu y'ubuhanuzi
2. Kwirinda nta na hamwe guhurira n'ivyo dufungura canke tunywa
3. Umuntu arashobora kuja mw'ijuru hamwe yoba yitondera amabwirizwa cumi
4. Kurya inyama vyerekana ukutirinda
5. Kwirinda ni ukwigizayo ico cose conona umubiri nk'icayi, ikawa, amafu yononokariye mu mahinguriro, inyama, amata n'amagi, ifi n'isukari yera.

Akayaga keza

Uno musi uri hejuru, abantu benshi bararajwe ishingira n'ikibazo co kumenya aho umuyaga mwiza bahumeka wova. Biramaze kwibonekeza kenshi ko n'abantu batanywa itabi ariko bakaba baba ahantu umuyaga bahumeka wanduye usanga babonekwako n'ibimenyetso bimwe n'ivyo abanywi bitabi. Dogiteri **Georges Pamplona Roger** niwe yanditse ati: «*Mwibuke ko igihe hariho umuntu ariko aranywera itabi mu cumba cugaye, abantu bose bariko bahumeka izo mpwemu zanduye nabo nyene baba bariko baranywa itabi.*»

Ukwandura kw'ikirere rero kugabanya urugero rw'impwemu nziza zishobora kuja mu maraso ziciye mu mahaha. Abahinga mu vy'amagara y'abantu basanze ko abantu ibihumbi vyinshi bariko bahindikirana uko umwaka utashe. Turashoboye kumara amayinga menshi ataco turya n'imisi myinshi ataco tunywa, ariko rero, nta muntu yorenga iminota 2 canke 3 adahema. «*Akayaga keza, ni umwe mu miti idasanzwe duhabwa n'ivyaremwe*»¹¹⁰.

¹¹⁰ Philosophie de la Santé, p. 29

Impwemu duhumeka mu muyaga ni nkenerwa cane kugira ngo ivyo twafunguye biturirwe maze bivyare inkomezi umubiri ukeneye. Guhumeka nikwo kwonyene gushoboye kuturonsa izo mpwemu ziva hanze (oxygène).

Ku muntu, uduce tugize ubwonko turakora cane gusumba ibindi bice vy'umubiri, gushika n'aho dukenera impwemu zivuye hanze (oxygène) incuro 20 gusumba ibindi bice vy'umubiri. Ni naco gituma nk'igihe vyoshika umuntu akamara iminota 5 canke 6 adahema, ubwonko butasubira gukora neza, ivyo navyo bigaca bitera inkurikizi ziteye ubwoba mu mubiri w'umuntu.

Nk'akarorero:

Umwana avutse agaca abura impwemu ubwo nyene, uca usanga asa n'ubururu (bleu), kubera ko aba abuze impwemu zivuye hanze (oxygène). Nko mu gihe abahinga babishoboye boca bamara iminota 20 bamuhumekeramwo impwemu (réanimation), yobaho ariko yohinduka ikijuju kitazi aho kiri n'ivyo kirimwo (débile), kubera ko imitsi yakira kandi igakwiragiza amakuru mu bice vyose vy'umubiri ikanakoresha n'ubwenge (neurones) iba yatabagaye ubutakivayo.

Igihe guhema bihagaze bitewe n'indwara runaka, ibihimba bihahonera gusumba ibindi ni ivy'ubwonko na cane cane ibijejwe ubwenge n'inyifato y'umuntu. Ico gihe rero umuntu aca agira ingorane

zifatiye ku rwibagiza, kwiyumvira, gusigara arakazwa n'ubusa n'ibindi nk'ivyo.

Ahantu haduga cane canke ku misozi ihanamye, mu bisanzwe ntihaboneka impwemu nyinshi (oxygène). Ni naco gituma iyo umuntu ariko araduga ahantu canke yurira igiti, ahora yumva ibimenyetso bifatiye ku guhema nk'ivyo abona ariko araduga. Ibimenyetso rero bica vyigaragaza vyerekana ko impwemu ziva hanze ari nke, nivyo vy'ibi:

- Kuruha cane
- Kudendebukirwa
- Kwisinzirirako
- Kuzahagurika kw'umutima
- Kurakazwa n'ubusa
- Kuvurungana mu bwenge
- Kutaba ugifise ivyiyumviro bitomoye
- Kubura itiro
- Kumeneka umutwe, iseseme canke kudahwa gutewe no kuvyimbagana mu bwonko
- Kutaba ukibona neza
- Kusigara wumva mu matwi havugira ingoma
- Indihaguzi z'umutima
- Umurindi w'amaraso
- Kutaba ugihema bikoroheye.

Kubura impwemu bitewe n'uko uri ahantu wugaranywe birabangamira ubwonko, bigatuma uwo muntu ashobora gusigara afise ubwenge budakora neza, agasigara akunda gusamara, ntabe acumva ko

ashobora kugira isanganya (nk'iry'umuduga), ntabe acihangana kandi agasigara arakazwa n'ubusa kandi ntiyigarure. Ukwo kubura impwemu ziva hanze (oxygène) nyene gushobora gutuma asigara aya inda ikaguma yuzuye, urukoba ntiruheme neza, imitsi ikadadarara maze akagira n'ingorane zo gusinzira.

Impwemu duhumeka ziva hehe?

Kubera ko impwemu duhumeka (oxygène) arizo ziturira ivyo twariye (nk'isukari nk'akarorero) kugira ngo bivyare inkomezi, tube maso kugira ngo ntiduhawe dusanga twazikenye. Imana ivyo yakoze bisiga ubwenge. Izi mpwemu dusohora hanze (gaz carbonique) zica zija ku biterwa, ari nazo zica zifatanya n'imishwarara y'izuba mu gikorwa co gutuma ibiterwa bironka rirya bara ry'urwatsi rubisi (photosynthèse), mu nyuma ivyo biterwa navyo bigaca bishira mu kirere izi mpwemu twinjiza mu mahaha (oxygène).

Guhumeka neza

Abantu benshi na cane cane abantu birirwa bicaye ntibakore ibikorwa binonora umubiri (Sédentaires) ntibahema neza: barinjiza impwemu muri bo (oxygène), ariko nabo ntibashoboye gusohora impwemu zibarimwo (Gaz carbonique) nk'uko bikwiye, ivyo bigatuma mu mahaha yabo haguma

harundarunda impwemu zategerezwa kuba zasohotse (gaz carbonique). Nimureke tube duhumeka cane: duhore dusohora impwemu ziri mu mahaha hanyuma tubone kwinjiza izindi mpwemu nyinshi kugira twuzuze neza amahaha yose. Dogiteri **Georges Pamplona Roger** ati: « *Ni ngombwa guhumeka neza cane, ariko kandi tukanahumeka akayaga keza* ».

Igihe duhema rero, dukwiriye kwama twibuka ko ari guhemera mu mazuru, kuko impwemu zinjiranye mu kanwa zitari cokimwe n'izinjiranye mu mazuru. Mu mazuru hariho ubwoya hamwe n'ibindi bintu vyitwa mikisi (mucus) biyungurura impwemu bikazikuramwo imyanda zishobora kuba zari zinjiranye, kandi bigatuma izo mpwemu zinjiye ziba ku rugero rw'ubushuhe ruberanye n'umubiri. Igihe hashushe zirakanya, hakanye naho zigashuha.

Kutaba ahantu hugaye

Kwama twaretse aho tuba ngo hagume hinjira akayaga kavuye hanze ni kimwe mu bintu bihambaye bifasha kugira ngo tugire amagara meza. Impwemu twinjiza zitegerezwa kwama ari nshasha buri kanya biciye mu kuba ahantu hahita akayaga, kubera ko amahaha n'urukoba vyacu vyama vyasohoye imyanda mu mubiri.

Ivyo rero bisigura ko amazu yacu akwiriye kuba atunganijwe ku buryo aguma yuguruye ku murango no mw'ijoro, kugira ntihagire igihe na kimwe twicara canke turyama mu cumba cugawe. Iyo umuntu yaraye mu cumba cuguruwe amadirisha kigahitamwo akayaga keza kavuye hanze maze izo asohora mu mubiri nazo zigasohoka hanze, avyuka yumva amerewe neza kandi anonotse. Kuba mu cumba cama cugaye bishobora kuba imwe mu mvo zitera indwara ya hasima, gushavuzwa n'ubusa, kumeneka umutwe, kwama urushe burigihe hamwe no kwama ukonyokewe uciye intege.

Inkungugu, imbeho canke ubushuhe birengeje urugero mu kirere ni vyo bintu bibangamiye inzira z'ihemero (voies respiratoires). Ivyo bica bituma kandi umuntu akunda gukarirwa n'ibicurane (rhumes) hamwe n'indwara y'amahaha iterwa n'ikora nabi rya twa dutsi dukwiragiza impwemu twinjiye mu mahaha (Bronches), iyo ndwara nayo bakayita bronchite.

Ukwandura kw'ikirere kubera imiduga

Imiduga igihe iriko iraka isohora uburozi (Gaz toxique) hamwe n'utundi tuntu dutoduto cane tutaboneshwa amaso dutangwa n'ikora ry'imoteri, amafire, kumyoragurika kw'amapine. Utwo tuntu rero tukaba turushiriza kuba utubangamyeye bivanye n'uko dusanzwe ari na dutoduto tutaboneshwa amaso

(microparticules). Umuduga uriko urasubira inyuma buhoro buhoro usanzaza utwo tuntu dutoduto twababa amamiliyaridi 100 ku musegonda. Muri ino misi amamiliyoni 2 canke 3 y’amatoni y’iyo nkungugu yanduza ikirere ni yo ariko azunguruka ikirere c’ino si yacu.

Amahinguriro

Amahinguriro asuka imyotsi yayo hamwe n’ibindi bintu vy’ibisigarira vy’ivyo bahinguye mu kirere, maze bikaba bifise uruhara mu gikorwa co kwanduza ikirere no mu kuba isoko ry’indwara na cane cane z’amahaha. Eka mbere nko mu bihugu biteye imbere cane hoho, usanga ikirere caho gikunze kuba cagiriwe n’igipfungu c’imyotsi gushika aho ababibamwo batama baronse imishwarara y’izuba, ivyo bikababera intandaro yo kujegenyuka amagufa, kwamana agahinda n’amakanseri. Mu vyukuri, *“isi ihumanijwe n’abayibako”*¹¹¹.

Itabi

Mu bisanzwe, umwotsi w’itabi niwo mpwemu zanduye zibaho kw’isi, zikaba zonona umubiri wa nyene kurinywa n’uwo barinywereye iruhande.

¹¹¹ Bibiliya Yera, Yesaya 24:5

Kugira ngo duhumeke neza

Ni nkenerwa cane kandi ko tumenya ko duhema impwemu nziza. Izo mpwemu nziza twinjiza (oxygène) zituma amaraso yacu yirukanwamwo imyanda. Kugira ngo duheme neza rero, ni ngombwa ko tunywa amazi ahagije, narirya ibice 75 kw'ijana vy'ibigize amahaha dukoresha mu guhema ari amazi. Iyo tudahema neza, umubiri nturuhuka bikwiriye. Kubura impwemu nziza no kudahema bikwiriye, bishobora no gutuma tubura n'itiro.

Ni ngombwa kandi ko aho dukorera canke turara haba hatunganijwe ku buryo hama huguruye amadirisha igihe cose, tukanaronka akayaga keza ku murango no mw'ijoro. Abantu ibihumbi vyinshi bakunze gukora ikosa badatahura, naryo ni iryo gukorera canke kuba mu vyumba vyugaye, na canecane ivyo bikaba bikunze gushika mw'ijoro. Kugira ngo twame turonka impwemu nziza ku murango no mw'ijoro, izi ngingo zokwubahirizwa:

1. Igihe umuntu yubaka inzu, akwiriye kwitwararika cane ku buryo ihabwa amadirisha manini, kandi akaba aherereye ahanu hotuma akayaga keza n'umuco w'izuba bishika mu nzu.

2. Ivyumba vyo gukoreramwo, canke kuraramwo vyoba biteguwe ku buryo vyokwama vyuguruwe amadirisha ku murango no mw'ijoro, ni kuvuga ko yoba ariko vya vyuma bibuza umuntu kuyinjiramwo (grillages) kandi hariko na twa tuyungiro dukinga ngo imibu ntiyinjirane mu madirisha (moustiquaires).
3. Ibiti canke amashurwe ntibikwiriye guterwa iruhande y'amazu ku buryo vyokinga akayaga keza n'umuco w'izuba kwinjira mu nzu.
4. Aho tuba hokwama hakorerwa isuku, kugira ngo ntiduhumeke impwemu zanduye.
5. Imyambaro n'imibiri vyacu bikwiriye guhorana isuku kugira ngo imyanda ntizibire intoboro umubiri uhemeramwo (pores) ngo bibuze imyanda iri mu mubiri gusohokana mu rukoba hamwe n'urukoba guhema neza.
6. Igihe cose bishoboka, kuba ahitaje ibisagara birundanyemwo abantu n'amahinguriro, ni vyo vyoturansa impwemu nziza, abo bidashobokeye nabo bohora bafata nk'imisi 2 mw'iyinga bakaja mu misozi gufata akayaga keza.
7. Hora ufata umwanya muto imbere yo kuja kuryama hamwe n'iyu uvyutse ugire imyimenyerezo ngorora

mubiri itavunanye, ivyo bizotuma unasinzira neza. Ushobora guhemagurika cane incuro 18 gushika kuri 20.

Dogiteri **Pamplona Roger** ati: «*Ni ngombwa guhumeka neza cane, ariko kandi tukanahumeka akayaga keza... Guhumeka nico gikorwa cambere c'ubuzima. Ubwonko bwawe hamwe n'umubiri wawe wose bizokora neza ni waramuka uhumetse neza akayaga keza mu buryo bwose bushoboka* ».

Ellen G. White aradukebura kw'ikosa ryo kwama twiyugaraniye mu vyumba bidahitamwo umuyaga, ati: «*Amazu menshi ntatanga akayaga keza mu buryo nyabwo, kandi kubikora biraruhije; ariko rero, hari hakwiriye gukoreshwa utwigoro twose dushoboka kugira ngo icumba c'umurwayi gitunganywe ku buryo gishobora guhitamwo akayaga keza ku murango no mw'ijoro*». ¹¹²

«*Ntukaroge inzu yawe*». **Ailen Ludington**, umuganga wo mu kinjana ca 21.

Iyumvire uko iyi si yacu iba imeze iyo Imana irema abantu n'ibikoko ariko ntishireho itazanure (ikirere) ririmwo impwemu nziza. Idakoze igitangaza, ibihema vyose ntivyari kubaho, kuko umuntu arashoboye kubaho amayinga atagira imfungurwa ariko

¹¹² The Ministry of Healing, Ed. 1999, p. 142

ntashobora kubaho iminota 10 atagira impwemu zinjira mu mahaha. Imana ihimbarizwe ivyo yakoze.

“...Ibikorwa vyawe ni ibitangaza; kandi ivyo umutima wanje urabizi neza”.¹¹³

Twisunze ivyo twize kuri ino ntambuko ya 6, ishura “ego” canke “oya” kuri bino vyiyumviro biri hano hepfo:

1. Umuntu afungura neza ntiyorinda gukenera akayaga keza kugira ngo agire amagara meza.
2. Kwugurura amadirisha y’ivyumba bararamwo mw’ijiro n’ay’ivyo birirwamwo ku murango ni bibi cane kuko nko mu gihe hatari imbeho nyinshi cane vyoteza indwara z’amahaha
3. Kuba mu muduga barimwo baranyweramwo itabi utariko urarinywa, Dogiteri **Pamplona Roger** yemeza ko ataco vyogutwara
4. Gutera amashurwe n’ibiti uvyegereje cane amadirisha y’inzu bikwegera mu nzu akayaga keza kandi niyo ngendo ibereye.

¹¹³ Bibiliya Yera, Zaburi 139:14

Ikiruhuko

Dogiteri **Hans Diehl** ati: « *Ubuzima bw'uno musi burihuta cane, burahagaritse umutima, buraruhije. Kurara inkanamaso vyabaye icago cateye. Abantu bariko birongomeza amamiliyoni n'amamiliyoni y'imiti yobaronsa agatiro hamwe n'iyobaruhura mu bwenge, birengagije ikiruhuko kinagura inkomezi zabo* ».

Umwanditsi w'igitabo «**Philosophie de la Santé**» nawe yavuze ivy'umuruho ati : «*Ni icago cateye isi ya kino gihe. Umuruho w'uno musi utewe n'imyitwarariko, amaganya, ibikorwa umuntu ajejwe n'agahinda*».

Umuruho utewe n'ibikorwa

Mu bisanzwe, ubuzima bwose bugizwe n'ibikorwa, kandi ugukora kw'ingingo zubatse umubiri gukenere imfungurwa hamwe n'impwemu ziva hanze (oxygène), kuko izo mpwemu arizo umubiri wikorako mu guturira izo mfungurwa ngo zivyare inkomezi (Energie) z'umubiri, ico gikorwa naco kikaba kibera mu misoso iyo indya zamaze kuva mu mushishito no mu rura ruto, zigashika mu maraso.

Nk'akarorero, igihe ya sukari yo mu maraso (Glucose) ihuye n'impwemu nziza (oxygène), ica iturirwa ikavyara inkomezi n'ubushuhe umubiri ufise, mukibuka ko inkomezi z'umubiri ukoresha hafi nka zose uzikura mw'isukari (glucose). Igihe izo mpwemu duhumeka zivuye ku bimera (oxygène) zitari mu mubiri ku rugero rwiza naho bitewe n'uko tutazinjije, iryo turirwa ry'isukari ntiribaho nk'uko vyasabwa, maze ihingurwa ry'iyi sukari rigaca riteba cane, ari navyo bica bivyara imyanda iroga uduce twubatse umubiri (cellules), iyo myanda nayo bakayita aside lakitike (acide lactique), aside amoniyake (acide amoniaque), ipinotogisine (hypnotoxine).

Ku bw'ivyo rero, igihe uduce tugize umubiri dukoreshejwe ibikorwa birengeye ivyo twategerezwa gukora, duca dusangangura isukari (glucose) twari twibikiye, tugakena za mpwemu ziva ku bimera (oxygène), maze tugaca dutangura guhingura ya myanda yonona utwo duce nyene tugize umubiri (acide lactique). Ivyo kandi bica bituma mu mubiri harundarundana imyanda myinshi (corps toxiques), na cane cane nk'imyanda iva ku bisigazwa vyabonetse inyuma y'itunganywa ry'indemamubiri (Protéines) arivyo bita aside amoniyake (acide amoniaque) hamwe rero na ya aside lakitike (acide lactique) twavuze aho hejuru.

Wibuke kandi ko iyo aside amoniyake igihe ibaye umurengera mu mubiri iroga ubwonko, igatuma umuntu yumva afise icakaka kandi akabura amahoro; utugingo twubatse umubiri (cellules) turahasinzikarira kuko tudashobora guca dusohora ayo ma aside mabi uhereye agitangura kuboneka mu mubiri. Ukwo gucobogora k'utwo duce twubatse umubiri (cellules) rero guca gutuma umubiri udakora neza. Muri make rero, ubwo burozi bw'ayo ma aside (amoniac na acide lactique), bushobora kwonona uduce twubatse umubiri gushika n'aho dupfa. Kuruha rero, hariho igihe kuba kwiza. Iyo umuntu arushye, aca aruhuka, ivyo navyo bikaba bica bituma ingingo z'umubiri zari zacobogoye zisubirana, zikanaguka. Guhema neza nibwo buzima, kuko bisohora impwemu umubiri utagikeneye (gaz carbonique) maze bikinjiza impwemu nziza (oxygène) zitikiza ya myanda yo mu maraso (acide lactique na amoniac) kandi bigasohora mu mubiri n'iyindi myanda myinshi.

Kuruha nturuhuke hoho ni ukuroga uduce twubatse umubiri kuko bituma iyo myanda yaka indaro mu mubiri. Mw'ico gihe rero, biba bitewe n'uko umubiri wakoze ukarenza urugero, ariko kandi birashobora no guterwa n'uko umuntu ariko arakorera ahantu hadatuma umubiri ukora neza.

Ikindi kandi, kurwara indwara zifatira mu bihimba vy'ihemero nka hasima (asthme), inkorora

(toux), boronshite (Bronchite), sinizite (sinusite) n'izindi, bishobora gutuma umuntu ataronka impwemu zivuye hanze (oxygène) nk'uko vyasabwa.

Igihe umuntu arwaye mu nda, na canecane mu mara, bishobora navyo gutuma iyo umuntu ariye ata kintu bimarira umubiri gihambaye, kuko aho mu rura ruto ariho nyene ivyo twariye vyinjirana bigiye mu maraso, kugira ngo nayo abijane aho bikenewe. Ingorane y'amara rero ikunze kugeramira isukari gusumba ibindi, narirya ari nayo yama yakenewe gusumba ibindi mu mubiri kugira ngo turonke inguvu n'inkomezi.

Kurwara amafyigo canke igitigu, bituma imyanda idashobora gusohorwa bikwiriye, na rirya ivyo bihimba bibiri (amara n'amafyigo) ari vyo bishinzwe gusohora uburozi hafi ya bwose bwohava bubangamira umubiri.

Mw'ijambo rimwe rero, gukora nturuhuke, kurwara mu bihimba vy'ihemero, igitigu n'amafyigo hamwe n'amara bidakomeye bitera ingorane y'uko imyanda irundarundana mu duce twubatse umubiri (cellules), utwo duce tukaremerwa n'ubwo burozi hanyuma tugaherako tugacobogora cane, tugapfa burundu.

Igihe agace kamwe mu duce twubatse umubiri karushe, gakwega n’utundi duce, bigatuma imyanda yo gusohorwa mu mubiri yiyongera, ivyo navyo bigaca birinda gukenera imfungurwa nyinshi n’impwemu zivuye hanze (oxygène) nyinshi kuko izo mpwemu arizo zisangangura imyanda mu maraso. Ingingo zinjiza indya n’izisohora ibisigarira vyazo hamwe n’uburozi nazo zica zicobogora kubera ico gikorwa congewe ku vyo zari zijewe. Igica gikurikira, ni ic’uko zica zitondesha (gukora bukebuke) ico gikorwa cazo, mu gihe uduce twose twubatse umubiri (Cellules) natwo duca turogwa n’uko tutaronse impwemu (oxygène) n’isukari itembera mu maraso (glucose) hamwe n’ukwo kudasohoka kw’imyanda. Uko niko umuruho uca uhungabanya umutekano w’ikora neza ry’umubiri wose.

Ubwoko butari bumwe bw’umuruho

Buri ngingo zose z’umubiri zirakeneye gukora no kuruhuka, ukuyemwo imisoso (muscles), ubwonko (cerveau) n’umutima.

1. Kuruha kw’imisoso

Igihe imisoso (muscles) irushe canke ikaba yinjiranywe n’uburozi (intoxication), ntisubira gukora neza, ica iguma yitunatunye canke yikoberanije (contractions musculaires), ari navyo biteza ya

ndwara yo kugwa ikinya kw'imisoso (crampes musculaires) hamwe no gukomantara kw'imisoso yarushe, bikanatuma idakora nk'uko bisanzwe.

Ya aside lakitike (acide lactique) yo mw'iyo misoso iratembera ikaja kwonona ubwonko hamwe n'iyindi misoso itagize ico ikora. Umubiri uca urushiriza gukenera isukari (glucose) n'impwemu zivuye hanze (oxygène), ari navyo bica bituma habaho:

- a. guhemagurika cane no gutera indihaguzi z'umutima kugira ngo vyongereze za mpwemu zari kuba zavuye hanze (oxygène) kandi ngo bisohore impwemu umubiri utagikeneye (gaz carbonique). Ariko kuba ari ukwiruhiriza ubusa.
- b. kwaguka kw'imitsi mikuru (vaisseaux) y'umubiri hamwe no kwuguruka kw'udutsi dutoduto twonze nk'umushatsi dutemberamwo amaraso ariko akaba atawotubonesha amaso (cappillaires), mu ntumbero yo gutuma amaraso arushiriza gutembera cane. Hariho ibintu vyinshi vy'uburozi ku mubiri biterwa n'umuruho, ubwo burozi rero, busohoka mu mpwemu zica mu kanwa (haleine), mu mwanda muto no mu vyuya vy'abantu barushe, ari naco gituma iyo umuntu yarushe, usanga impwemu ahema, ivyuya abira n'umwanda muto asohoka bimota nabi cane.

2.Kuruha kw'ubwonko

Umuntu wese arafise umugabane w'ubwonko, uwo mugabane w'ubwo bwonko bakawita igishishwa c'ubwonko (écorce cérébrale) canke korotegisi (cortex). Uwo mugabane w'ubwo bwonko bwo mu ruhanga rero niwo utegeka ubwenge (intelligence), ivyiyumviro (pensée), ubugombe (volonté), ijwi ry'umutimanama (conscience) hamwe no kwibuka ivyo wabonye canke wumvise (mémoire).

Umugabane w'ubwonko bwo mu ruhanga nabwo nyene buraruha nk'uko bigenda no ku misoso. Kuba ubwonko bwama buriko burakora akanya kose ku murango no mw'ijoro bituma ubwonko burundarundanamwo ibintu vyinshi vy'uburozi bibwonona: nka aside lakitike na ipinotogisine (l'hypnotoxine). Ivyo bica bituma umuntu aca atwarwa n'itiro adashobora kwibuza riza gutuma ubwonko buruhuka, rigaca rinatuma bwa burozi bugenda burahava ata ntambara ibaye. Igihe bishitse hakaba impamvu iyo ariyo yose ikoma mu nkokora iryo tiro, yamyanda yari mu bwonko isinzikaza ubutakivayo rwa rufatangane rwa za miliyaridi 14 y'uduce dutoduto cane two mu ubwonko (neurones) gushika naho dushobora no gupfa, ikindi kandi igihe dupfuye ntitwongera kubaho ukundi (P...).

Akamaro k'itiro rero, ni kuko riruhura ubwonko hamwe n'ingingo zose z'umubiri, imitsi n'imisoso vyadadaraye kubw'umuruho bigasubirana, maze indihaguzi z'umutima no guhemagurika navyo bigaturura. Umuruho w'ubwonko rero, ushobora guterwa n'izi mvo nya mukuru:

- Gusoma canke kwiga cane ukarenza aho ubwonko bwawe bugeza, ari navyo bica bituma twa duce dutoduto cane turemye ubwonko tugakoresha ubwenge (neurones) turuha cane gushika n'aho ataco tuba tugifata.
- Kwiyumvira cane hamwe no kwakira amakuru menshi avuye hanze y'umubiri.

Ubwonko bw'umuntu, abahinga babugabura mu migabane ine mikuru mikuru (sections), maze iyo migabane bakayita « Lobes » :

- Hariho ubwonko bwo mu ruhanga (Lobe frontal)
- Hariho ubwonko bwo mu rwikorerero (Lobe pariétal)
- Hariho ubwonko bwo mu gakomokomo (Lobe occipital)
- Hariho ubwonko bwo mu misaya (Lobe temporal)

Nk'akarorero, ubwo bwonko bwo mu rwikorerero (Lobe pariétal) nibwo cicaro c'ibikorwa bikurikira:

- Inzara n'inyota

- Umunezero n'umubabaro
- Kuryoherwa no kurakara
- Itiro no kurema ingeso
- Icipfuzo n'ubushobozi vyo kurangura amabanga y'abubatse
- Kwitinya (complexes) hamwe n'imimerere mvukanano (hérédité psychique).

Ivyo bica bituma ubwo bwonko bwo mu rwikorerero buruha cane kuko bwama buriko burakira amakuru akanya ku kandi atuma buguma bwahindaguye ukuntu bukora. Uko buruha rero, ni nako bwiga kumenyera ibibushikira, ari harya usanga umuntu asigara ahora yijiriwe ata mvo ibituma iboneka (stress), ivyo iyo bibandanije bikaba bishobora no gutuma umuntu asigara yataye umutwe gushika n'aho ata kintu kiba kikimunezera (dépression nerveuse), bitewe n'uko ibice vyose bigize ubwonko bitagikorera ku rutonde uretse ko gukora mu kajagari (anarchie psychique) ari vyo biba bisigaye vyatse indaro.

Kubw'ivyo rero, si igitanganza mu gihe uzobona ko abantu bose bama bashushe umutwe bakabura akanya ko kuruhura ubwenge kubera ibibaraje ishingira usanga ari abantu bakaza ishavu, bibagira cane, babura itiro, bama barakaye kandi bakaba abantu badakunze kunezerwa. Fata akarorero k'abadandaza bakomeye cane maze witegereze uko bameze, n'aho nyene udasabwe kubabera umucamanza.

Umuti w'uburuhe

Si icoroshe ko umuntu, na cane cane wo mu kinjana ca 21 aronka akaryo ko kuruhura ubwenge n'umubiri wose. Impamvu ibituma n'uko iy'isi iriko iriruka ku muvuduko utangaje, kandi abo kuri yo nabo bakaba bashaka gusiganwa nayo. Dogiteri **Hans Diehl** ati : « *Ubuzima bw'uno musu burihuta cane, burahagaritse umutima, buraruhije. Kurara inkanamaso vyabaye icaga cateye. Abantu bariko birongagiza amamiliyoni n'amamiliyoni y'imiti yobaronsa agatiro hamwe n'iyobaruhura mu bwenge, birengagije ikiruhuko cobaruhura mu bwenge* ».

Buri muntu wese wo mu bariho kw'isi, arafise isaha-mvukanano igendana n'ibihimba vy'umubiri. Aho rero, itiro riri mubigize iyo saha kuko ryerekana aho ibihe bigeze, rikamenyesha umubiri ko hageze canke harengeranye kuwuruhura. Abahinga bakurikiranye ivy'amagara y'abantu bavuga ko itiro rifise uruhara ruhambaye mu gikorwa co kuruhura umutwe n'umubiri wose, n'aho nyene hariho n'izindi nzira vyokorwamwo.

Namba wipfuza kugira amagara meza, ukwiriye kwubahiriza amasaha yo gusinziriramwo, akenewe n'umubiri wawe. Nimba wipfuza kwikingira ikibi umuruho n'amaganya vyokwegera umubiri wawe,

hano hariho inama zizogufasha ngo ugumane inkomezi zawe n'impwemu nziza hamwe woramuka uzigendeye :

Ryama utararuha, maze niwaba uri umuntu akuze, uryame amasaha 7 gushika ku 8 mw'ijoro. Kora ibikorwa vyawe vya buri musu ku rutonde. Niwaramuka ugize ingorane, zitorere umuti mu maguru mashasha. Korana ubwira, kandi ukore unezerewe. Namba udashoboye gusinzira, vyuka unywe icyi c'amababi runaka (ariko atonona umubiri) nk'ico amacyicacyi, amababi y'amavoka n'ibindi, hanyuma uce wisubirira kuryama. Kora imisi itandatu, uruhuke ku musu ugira indwi . Ntukihebure, ahubwo wizigire Imana muri vyose.

Iyo umubiri usinziriye rero, niho uduce duto duto cane tutaboneshwa ijisho tugize umubiri (cellules) dushobora kwiyubaka, maze utwapfuye natwo tugasubirizwa utundi dushasha.

Umuntu yoruhura umubiri gute biciye mu gusinzira?

Dogiteri **Hans Diehl** ati: «*Abantu barakeneye ubwoko bw'ikiruhuko butandukanye, kandi agatiro karuhura umubiri ko mw'ijoro niyo ngendo nziza*». Dogiteri **Hans** rero avuga ko abantu batandukanye bakwiriye gufata ikiruhuko c'itiro uku gukurikira:

- Inzoya : amasaha 16 gushika kuri 20
- Abana bato : amasaha 10 gushika kuri 12
- Abakuze : amasaha 7 gushika kuri 8

Mu gitabo **Philosophie de la Santé** naho nyene batanga urugero rudatandukanye kanini n’urwo rwa **Dogiteri Hans** :

- Inzoya n’abana bato : amasaha 10 gushika kuri 12
- Urwaruka : amasaha 7 gushika kuri 9
- Abakuze : amasaha 6 gushika kuri 8
- Abasaza : amasaha 6 gushika kuri 7

Abahinga bakoze ubushakashatsi bwerekeranye n’ukuntu indwara n’impfu zifata abantu (**Etudes épidémiologiques**), basanze ko amasaha umuntu aryama mw’ijoro ashobora kugira uruhara mu rugero rw’imyaka yo kwitega kubaho (espérance de vie).

Nk’akarorero, umuntu yimenyereza kuryama amasaha ane gusa mw’ijoro, ico conyene kirasazisha ingingo zubatse umubiri wiwe gushika n’aho aba agabuyemwo kabiri imyaka yobayeho¹¹⁴. Ico kibi umuntu aba akoreye umubiri wiwe, **Ellen G. White** yemeza ko ari icaha gihwanye n’ubwicanyi:

« Ibikorwa vyose vy’ububisha bigamije kugabanya igihe ubuzima bwomaze; agatima kw’urwanko no

¹¹⁴ Philosophie de la Santé, p.119

kwihora, canke kwinezereza mu cipfuzo kiyoborera umuntu ku gukorera abandi ibibasinzikaza, canke bikanatuma tubipfuriza nabi (kuko uwanka mwene se wese ari umwicanyi); ukwikunda gutera kwirengagiza kugirira neza umukene n'uwubabaye, ukwinezereza kwose canke ukwiyima kudakenewe (kwibuza ivyo wari ukeneye) canke kwiruhisha ukarenza urugero kugamije gusinzikaza amagara... ivyo vyose ni uguhonyanga icagezwe ca 6 ku rugero rukomeye cane canke ruto (Ntukice : Kuv. 20:13)»¹¹⁵.

Izindi nzira zo kuruhura umubiri

1. Kunonora umubiri ku murango ubikoreye hanze hahita akayaga keza no ku mucu w'izuba, bizofasha mu kugira akaruhuko usinziriye.
2. Fata ibintu wohora ukora imbere yo kuja kuryama, tudasize inyuma kwiyuhagira amazi y'akazuyazi, gusoma ibitabo vyiza utuje canke kunywa igikombe c'icayi kitonona umubiri: Time (thym), Romare (Romarin), amacayicayi (citronnel), canke amababi y'amavoka.

¹¹⁵ Patriarchs and Prophets, (1979), p. 277

3. Wirinde ibintu vyose bikabura ivyiyumviro nk'imboneshakure (Télévision), ibiganiro bibi, imitongano no kuvuga abandi nabi, kunywa icayi n'ikawa n'ibindi nk'ivyo.
4. Nturye ngo urenze urugero canke ngo urye indya zigumye mu ngaburo yo ku mugoroba.
5. Ryama amasaha ane canke atatu inyuma y'ingaburo ya nikera. Igihe umuntu agiye kuryama indya yariye zitarava mu mushishito, bituma ararana umuzigo mu nda, bikamutera kudasinzira neza kandi akarara ararazirana ibidakenewe kuko ubwonko buca burara burushe bukarara mu ruhagarara rwinshi.
6. Hamwe hoba hariho igikorwa runaka canke ico wari wiyemeje gushikako ariko ntubitunganye nk'uko wavyipfuza bikagutera kubabara, fata akaryo ko kubitorera inyishu canke kubifata nk'ibisanzwe imbere y'uko uja kuryama.
7. Gira amasaha adahindagurika yo kuryamirako.
8. Horana akayaga keza mu cumba uryamamwo. N'ukuvuga ko icumba cokwama cuguruye idirisha igihe cose ata mbeho y'umurengera canke umuyaga mwinshi bihashika.

9. Igihe ugize ibikunaniza bikakubuza amahoro, bizane ku birenge vya Yesu utishisha biciye mu masengesho.
10. Tangura akamenyero ko gusoma Bibiliya n'ibindi bitabo vyiza, bidasamaza kandi bidateragira imbuto mbi mu muntu (nk'ibivuga intambara, politike, ubuhumbu, imigani n'inkuru z'imburakimazi. Nta muntu n'umwe asoma Bibiliya abishizeko umutima kandi afise intumbero yo kwemera kwigishwa nk'umwana maze ngo abure kwumva imitwaro yiwe iremurutse. Dogiteri **Georges Pamplona Roger** yemeza ko uno musi atari icoroshe kuronka.

« Yesu aravuga, ati munyigireko ; kuko ndi umurwaneza, niyoroheje mu mutima, namwe muzoronka uburuhukiro. Dutegerezwa kwinjira mw'ishure rya Kristo, kugira ngo twige ku bugwaneza n'ukwiyoroshya vyawe. Ugucungurwa, ni irya nzira umutima wigishirizwamwo ivy'ijuru. Ukwo kwigishwa, gusobanura kumenya Kristo. Gusobanura kwikunkumura ivyiyumviro, ubumenyero hamwe n'imikorere vyagiye mw'ishure ry'umutware w'umwijima. Umuntu ategerezwa kubohorwa akavanwa mw'ivyo vyose bidahuje n'ukuyobokera Imana »¹¹⁶.

¹¹⁶ Ellen G. White, *Desire of Ages*, Ed. 1999, p.28

Uragaba ! Yesu araruhura, ariko Satani we yama ashaka kutwugariza n'ibitero vyawe kugira ngo twicwe n'amaganya, agahinda no guta umutwe. Abo bese batishize musu y'ubutegetsi bwa Yesu Kristo azoshobora kubabura ikiruhuko c'ubwenge n'umubiri, babitwe n'uko ubwenge bwabo bwihaye ivy'isi gusa.

“Satani niyabishobora azobabura kwitegura kuzohagarara kuri urya musu (igihe c'amageragezwa). Azokora igishoboka cose kugira ngo abazitire akoresheje ubutunzi bw'isi, abikoreze umutwari uremereye uvuna, kugira ngo imitima yabo iremerwe n'umwitwarariko w'ivy'ubu bugingo, ngo wa musu w'amageragezwa ubazeko giturumbuka nk'umutego.”¹¹⁷

Twisunze ivyo twize kuri iyi «ntambuko» ya 7, ishura «ego» canke «oya» kuri bino vyiyumviro biri ngaho hepfo:

1. Gusinzira amasaha 7 gushika 8 mw'ijoro ku muntu akuze bituma itiro rimuhirana agasaza ningoga.
2. Kunywa igikombe c'icayi canke c'ikawa bitera agatiro keza.
3. Kugabanya imyitwarariko bitera kuruhuka mu bwenge no kuronka itiro riruhura umubiri.

¹¹⁷ E.G.White, Cosmic conflict,p.548

4. Kuryamana indya mu nda bitera gusinzira neza mw'ijoro kuko umuntu aba amerewe neza
5. Indya ziva mu mushishito amasaha atatu gushika kuri ane inyuma yo gufungura.
6. Kwama uryama amasaha 8 buri joro birateba bigakwegera umuntu indwara y'umutima.

Incabwenge imwe niyo yanditse iti: « *Ubuzima bwo kubaho mu buryo bwiyoheje buzofasha vyinshi amagara yacu kuruta ubuhinga buteye imbere mu vy'ubuvuzi* ».

Kwizigira ubushobozi bw'imana

Ntukizigire ubutunzi bwawe, igihugu cawe, amashure yawe, umuryango wawe canke abagenzi bawe, imiti y'ikizungu canke ubuvuzi kama canke ikindi ico arico cose ngo ukigire nyambere mu buzima bwawe. Dogiteri **Carlos Kozel** niwe yayamaze ati: « *Imana si ivyaremwe. Eka mbere n'ivyaremwe si vyo Mana. Imana ni Imana, ivyaremwe navyo ni ivyaremwe... Uwizigira ko ivyaremwe ari Imana maze akabishira hejuru nk'Umuremyi aho gushira hejuru Umuremyi ubwiwe, aba akoze icaha gihambaye kingana no gusenga ibigirwamana* »¹¹⁸.

N'aho nyene umuntu wa kino gihe we yafashe ibimukikije akaba arivyo agira imana yiwe, Imana yo iravuga iti: « *Ntukagire izindi mana umbangikanya* »¹¹⁹.

Amajambo ya Dogiteri **Aileen Ludington** arafise uburemere cane ku bantu bihebuye kandi bihevye: « *Igihe ikindi ico arico cose cananiwe, gerageza Imana* ».

¹¹⁸ The Science of Natural Healing, p. 22

¹¹⁹ Bibiliya Yera, Kuv. 20: 3

Abantu benshi muri kino gihe barataye umutwe. Bamwe usanga barabuze amahoro gushika n’aho ata kintu na kimwe kikibanezera. Hari n’abageze ku rugero rwo kwimanika canke kwisuka mu nzuzi no mu biyaga canke bakiha uburozi bwica, kuko bibwira ko gupfa vyoba bibarutiye kubaho... barataye ivyizigiro.

Imvo ibibatuma ntigoye gutahura: bari mu ntambara z’ubuzima zitaboroheye kurwana no gutsinda. Eka mbere ntibafise n’uwubarwanirira babonesha amaso. Ivyo bica bituma baba ivyihebe ku rugamba rw’ubu buzima. Birashoboka ko hariho umurwi w’abantu barazwa ishingira no kwumva babaye abantu batunganiye Imana n’abantu muri vyose. Ariko uko umusi ukura uwundi baguma bibonako amakosa n’utunengenenge bigatuma bihebura. Bibwira ko bamaze kwiyanzeza ku buryo n’Umuremyi wabo atoshobora kuba acihanganira ivyabo. Abandi nabo barembejwe n’amaganya n’imyitwarariko y’ubu bugingo gushika naho batagitwira n’agatiro. Bataye umutwe. Ivyo bibatera kwiheba no guhitamwo kwivira mw’ino si gusumba kubaho. Ariko guta umutwe mw’ubwo buryo, siwo muti w’ingorane. Ico Imana isaba bene abo bafise imitima imenetse, ni ukuyisanga aho iri baje uko bari¹²⁰, nayo ikumviriza kandi igatorera umuti ibibaremereye. Umuntu naho yoba yarivanyanze mu bicumuro bishisha Imana kandi bigasesema n’abamarayika, aracafise agaciro kubo mw’ijuru.

¹²⁰ Bibiliya Yera, Mat. 11: 28-29

« Naho ivyaha vyotukura tukutuku, bizokwera derere nka Shelegi (nk'urubura); n'aho vyotukura nk'agahama, bizohinduka nk'ubwoya bw'intama y'umweru, nimwemera mukumvira »¹²¹.

Dogiteri Aileen Ludington ati: *«Agaciro k'ubuzima bwacu ntigaterwa n'ico dukora canke ico turico, ahubwo gaterwa n'abo uwo turibo »¹²².*

Abasoda barwanira umubiri hamwe no kwitsa umutima

Burya buri muntu wese ategerezwa kugendana abasirikare barwanira umubiri wiwe kugira ngo bawurinde ibitero vy'indwara. Abo basoda batembera mu maraso. Ubushakashatsi butumenyesha ko kw'imililitiro 1 (1/1000 I) y'amaraso usanga harimwo abasoda 5000 gushika 9000¹²³, ivyo bigatuma mu mubiri w'umuntu hatembera ama miliyoni n'amamiliyoni y'abo basoda barwanira umubiri (Système immunitaire)¹²⁴.

Abo basoda kandi bagabuwe mu mirwi itandukanye, maze umurwi wose ukaba ufise igikorwa ujejwe. Igihe umuntu afise amagara meza, abo basoda baragabanuka bagasigara ari bake ku kirindiro. Iyo hagize igitero gitera umubiri naho abandi basoda baca bazagamuka gutabara bagenzi babo mu

¹²¹ Bibiliya Yera, Yesaya 1: 18-19

¹²² Health Power, p.243

¹²³ Biology, Forth Edition, p. 280

¹²⁴ Health Power, p. 217

kwivuna umwansi. Abo basoda bakingira umubiri ibitero vy'indwara (globule blancs) bahingurirwa mu gitigu (foie), mu mpindura (rate) no mu gahimba bita timisi (tymus) kaherereye mu muhogo¹²⁵.

Dogiteri **Hans Diehl** atumenyesha kandi ko ingaburo nziza, imyimenyerezo ngororamubiri hamwe no kwamana umutima ukeye bikangura kandi bigakomeza abo basirikare bagwanira umubiri (body's immune system), mu gihe ku rundi ruhande naho indwara, ibinyobwa biboreza hamwe no kwamana umwivira bituma abo basoda bacika magoyagi mbere bagapfa¹²⁶, ari navyo bica bituma umuntu yama ari magoyagi kandi arwaragurika cane.

Abashakashatsi kandi baremeza ko igihe umuntu aruhura umubiri, biciye no mu kuruhura ivyiyumviro canke gutuza mu bwenge vyongereza inkomezi abo basoda bakanagwira. Akarorero, turamaze kwumva intahe z'abantu batari bamwe bahora bafata umwanya wo gutuza, bakamara imisi ibiri canke itatu bihereranye n'Imana mu masengesho mu kwisonzesha, bakavayo bakize indwara runaka bari barwaye nka giripe (grippe), malariya n'izindi. Imvo zibituma, ubwa mbere n'uko Imana ishoboye gukiza indwara zose ku wuvyizera ko bishoboka. Ubwa kabiri naho indwara zose ziterwa n'umugera (virus) nka

¹²⁵ Biology, Forth Edition, p. 280; Health Power, p. 216

¹²⁶ Health Power, p. 216

giripe, SIDA n'izindi nk'izo, nta muti uzivura canke usohora uwo mugera (virus), ahubwo uwo muti ico ukora ukangura ba basoda bakirwanira bo nyene mukamenya rero ko mu gihe umuntu afise amahoro mu mutima akihererana n'Imana mu masengesho yisonzesheje vyongereza inguvu abasirikare bagwanira umubiri (body's immune system). Ivyo n'ubushakashatsi buramaze kubivumbura. Umwanditsi umwe niwe yabishingiye intahe ati:

« Kumara amasaha 36 wisonzesheje vyongereza cane ubushobozi bw'abasoda b'umubiri bwo kumiragura imigera y'indwara (pouvoir phagocytaire). Baca barushirizaho kurwanya imikorobi »¹²⁷.

Hamwe n'ivyo rero, duca dutahura impamvu Imana yo izi uko umubiri w'abo yaremye ukoze n'uko ukora kurusha uko abahinga bo mu bantu bavyize, yavuze ku vyo ubushobozi umubiri wisanganiwe bwo gutuza ibitero vy'indwara, iti: *«Umutima unezerewe ni umuti ukiza ariko umutima usavye wumisha amagufa »¹²⁸.*

Ariko rero kuronka ubwenge n'ivyiyumviro bitekanye muri kino gihe c'ingorane z'urudaca, si igikorwa coroshe na gato. Abantu benshi rero, baca baronderera umuti mukwizigira ubushobozi bw'Imana, maze bagasanga gusoma ivyanditswe vyeranda no

¹²⁷ Philosophie de la Santé, p. 55

¹²⁸ Bibiiya Yera, Imigani 17: 22

kwihererana n'Imana mu masengesho bibamereye nk'ikirahuri c'amazi apfutse mu gihe c'uruzuba. Ukwizigira hamwe no kwizera bishobora kudukorera ibihambaye mu kuturonsa umutima wuzuye ituze. Ayo mahoro rero nk'uko twabibonye, agira ingaruka zikomeye ku magara y'ubwenge, ay'ivy'impwemu n'ay'ivy'umubiri. Kanatsinda, umwizera aba yizigiye ko yifitiye uwuri hejuru ya vyose amutahura neza kandi amukunda.

Igitangaje gusa, bene ayo mahoro tuvuze, umuntu ntashobora kuyaronswa n'ikintu na kimwe mu biboneka hano kw'isi kuko ava ku Mana gusa. Umuntu ashobora kuba yaronse ibihinda vyose umutima wiwe wipfuzwa ariko akabura amahoro, nk'uko kandi umuntu ashobora kuba yahuye n'ivyago canke akarara ubusa ariko akagira ayo mahoro yo mu mutima mu gihe yoba abana na Yesu. Vyose rero biterwa n'umwifato tugira imbere y'amasezerano y'Imana aboneka mw'ijambo ryayo Bibiliya:

« Uzozigama amahoro masa umuntu akwegamikako umutima wiwe, kuko akwizigiye »¹²⁹.

Intumwa (Messagère) y'Imana **Ellen G. White** abivuga neza ati : *« Abizigira Yesu mw'ijambo ryiwe, bakamwegurira ubugingo bwabo ngo burindwe nawe, n'ubuzima bwabo ngo abutunganye, bazoronka amahoro n'umutekano. Nta kintu na kimwe co mw'isi*

¹²⁹ Yesaya 26: 3

coshobora kubatuntuza mu gihe Yesu abatera agahimbare mu kubaba i ruhande »¹³⁰.

Urafise agaciro imbere y’Imana

Hariho inkuru yabaye ku muhinga mu vyo gukoresha inama nkarishabwenge (séminaire). Uwo mugabo yatanguje inama nkarishabwenge abanje kumanika hejuru inoti y’amadorari 20 y’abanya Amerika (\$ 20). Mw’ico cumba inama yari igiye kuberamwo, cari gikoraniyemwo abantu 200, yarabajije ati: «*Ni nde yipfuza iyi noti ?*» Baciye batangura kumanika amaboko. Nawe ati: «*Ngiye guha iyi noti y’amadorari umwe muri mwebwe, ariko hinge mbanze ngire iki kintu*». Yaciye atangura kuyivungavunga. Niho yaheza akabaza ati: «*Ubu ho ni nde ayikeneye?* » Ya maboko yongeye kumanikwa kandi. Nawe ati: «*Ntaco bitwaye, vyogenda gute hamwe nogira iki kintu?* » Yaciye asanzura ya noti, ayirambika hasi, ayivungavungira mu mukungugu akoresheje amano yiwe. Arayitora yacitse iyondo yondo kandi yuzuye imyanda. Niho yongera ati: «*Hoba hariho uwuyipfuza noneho?* » ya maboko yose amanikwa hejuru kandi. Niho yaherako akababwira ati: «*Ncuti zanje mwese mwarize inyigisho y’agaciro. Ivyo nakoreye ano mahera ntaco vyayagize, mwagumye muyakeneye, kubera ko bitagabanije*

¹³⁰ Desire of Ages, Ed. 1999, p. 288

agaciro kayo. Aracari amadorari 20 y'abanya Amerika».

Dogiteri **Ludington** nawe ati: *«Ibihe vyacu mu buzima bwacu turarundukira hasi, turavungagurika, kandi tukavumbagara mu myanda biciye mu ngingo dufata hamwe no mu bidushikako mu rugendo rwacu. Hari aho bishika tukiyumvamwo ko ataco tukimaze. Ariko ivyadushikiye canke ibizodushikako, ntaco bivuze. Ntitwigera duta agaciro mu nyonga z'Imana. Twaba twanduye, twavungaguritse canke twafutanye, tuguma dufise agaciro ntangere imbere yayo». Agaciro k'ubuzima bwacu ntigaterwa n'ico dukora canke ico turico, ahubwo gaterwa n'abo Uwo turi bo».*

Kubana n'Imana no kuyikorera bizana amahoro nyayo

Abantu benshi biyumvira ko kuronka uburyo bwo kwibeshaho bufadika bishobora kubatuma baruhuka imyitwarariko ibarembeje, ariko itunga ritagira Yesu ni bwo bworo ruhebwa. **Jeff Wehr** niwe yanditse ati: *«Ugukiza umubiri nyakwo guhera mu kweza ivyiyumviro hamwe n'ivyipfuzo vyacu. Ibikorwa vyiza hamwe n'ibikorwa bibi bigira ingaruka ku magara yacu vyose bikomoka mu mutima. Iyo dushishikaye kunohokera indya zisinzikaza amagara hamwe no kuguma twizingitiriye ku yindi mikorere isinzikaza amagara, tuzoba turiko turiyongerereza indwara.*

Intambwe yambere wotera kugira ngo utsinde imikorere mibi ni uko woza kuri Yesu nk'uko uri. Yesu ati: « Nimuze kuri jewe mwese abarushe n'abaremerewe, ndabaruhura »¹³¹. Za kuri we maze umutakambire ngo aguharire ivyaha vyawe vyose vyo muri kahise, udasize inyuma n'imikorere isinzikaza amagara.

Ubwa kabiri naho, iyemeze kugira ubuzima bwiga Bibiliya na ntaryo, na cane cane wite ku buzima no ku nyigisho za Kristo.

Ubwa gatatu naho, teza imbere akamenyero ko kwama wiha umwanya wo kwihererana n'Imana mu masengesho, fata umwanya hamwe n'ikibanza bidasanzwe vyo kuvuganiramwo n'Imana. Yikundire imenye ibiguhagaritse umutima, intambara zawe hamwe n'ibikunzezeza. Uko uzogenda ubishira mu ngiro, ni nako uzoba uriko uriga kuyikunda no kuyizigira biruseho.

*Ubwa kane, bwira abandi ivy'ubuzima bwa Kristo, hamwe n'ivy'**amategeko 8 y'izahabu y'ivy'amagara**. Uko uzogenda usabikanya n'abandi ivyo vyiyumviro n'izo ngingo ngenderwako vy'agaciro ntangere, ni nako bazogenda bahabwa imigisha ikomeye cane.*

¹³¹ Bibiliya Yera, Matayo 11: 28

*Ubuheruka naho, ntukigere wihebura! Buri ntsinzi iryoshe yo kunesha imikorere yonona yose, izokwongera imyaka y'agaciro ku kubaho kwawe».*¹³²

*« Kwiha agaciro kaboneka, tubiterwa n'uko tuzi aho turi, igituma turi ngaha hamwe n'iyi turiko turaja».*¹³³

Na Dogiteri **Hans Diehl** nawe arashimangira ico ciyumviro ca **Jeff Wehr** mu ntumbero nyayo yo gutorera umuti ingorane:

*« Iyo gukura mu vya mpwemu bihawe icicar, gushobora gutorera inyishu agahinda, ubwoba, umutima wiyagiriza ibibi hamwe n'ukwitsa umutima. Gushobora kandi no kunagura inkomezi no gusendanisha akandi kanovera ko kubaho».*¹³⁴

Ihweze intambara urimwo uno musi. Ihwezanye ubwitonzi ivyakubayeko, ibiriko birakubako, ivyo ubona canke wibaza ko bigiye kukubako. Mbega woba ubona ko inama za Dogiteri **Georges Pamplona Roger** zokugirira ikimazi gikomeye?

«Imenyereze gukora wakirana ituze ibintu, ntiwijirwe, ntiwamanire abandi umwikomo canke ngo uwiwamanire ubwawe. Wame umwenyagurana

¹³² The Health of the Nations, p. 6

¹³³ Health Power, p. 241

¹³⁴ Health Power, p. 222.

*ivyizigiro igihe cose uhanganye n'imiruhho y'ubu buzima».*¹³⁵

Biramaze kwibonekeza ibihe vyinshi ko kwamana ubwenge butuje kuri mwene urwo rugero ari inzira imwe ihambaye cane kugira ngo umuntu agire amagara meza. Dogiteri **Pamplona Roger** ati: «Mbega mwari muzi ko kanseri ikunze kwizizira cane abantu badatekanye mu mutwe kandi bamana umwivira ?» Ivyo birafise ico bivako.

Twisunze ivyo twize kw'ino « ntambuko » y'umunani, vuga « ego » canke « oya » kuri ivyo vyiyumviro biri ngaho hepfo :

1. Ni ikintu kidashoboka ko impahazwa n'umukene boronka amahoro yo mu mutima.
2. Umuntu wese agendana abasoda 5000 gushika 9000 gusa vy'abasoda baba mu maraso barwanira umubiri (globules blancs).

None woba wamaze gusobanukirwa neza ko ya « mategeko 8 y'izahabu y'ivyo amagara » ari umuti ukiza? Raba uko intumwa y'Imana **Ellen G White** abona amategeko 8 y'ubugororizi bw'ivyamagara:

« Akayaga keza, umuco w'izuba, kwirinda, ikiruhuko, imyimenyerezo ngororamubiri, imirire myiza, gukoresha amazi, kwizigira ubushobozi

¹³⁵ Croquez la vie, p. 15.

bw’Imana - iyo niyo miti nyakuri. Buri muntu wese yari akwiriye kugira ubumenyi bw’ibintu vyaremwe bivura indwara hamwe n’ukuntu bikoreshwa»¹³⁶.

Aho yariko avuga ku vy’ayo mategeko 8, **Ellen G White** yavuze ati: *“Ni icaha guhonyanga amategeko agenga imibiri yacu nk’uko ari icaha kwica amabwirizwa cumi”*.¹³⁷

Igisigaye rero, n’uko uno musu wamenya ko Imana yakugiriye ubuntu ngo utahure iri banga. Hariho abantu ibihumbi vyinshi bagorewe mw’ino si kuko batamenye isoko ry’ubuvuzi nyakuri Imana yatanze. Imana yaduhishuriye iri banga ry’ubuvuzi kugira ngo, biciye mw’iki gikorwa, ishobore gukora ibitangaza. Menya kandi wame uharanira kumenyesha abandi iryo banga, ata kintu na kimwe kikwitambitse imbere. Eka mbere ntugatinye ibikangisho n’iterabwoba ry’ab’inyama n’amaraso. Ndazi ko amaronko, ubuzima, abagenzi, abagutegeka aha canke hariya ataco bitazokora ngo uyu muco ukubere impfagusa kandi ngo ntuwugeze ku bandi. Rwana kigabo, kandi urwane unesha.

« Igikorwa c’ubugorozi bw’ivyo amagara ni inzira Imana ikoresha mu kugabanya umubabaro mw’isi no mu kweza Ishengero ryayo. Nimwereke buri wese ko ashobora guhinduka uwushigikira Umwami mu

¹³⁶ Ellen G. White, Counsels on Diet and Foods, p.301

¹³⁷ Counsels on Diet and Foods, P.45

gukorana nawe mu kunagura amagara y'umubiri n'ay'ivy'impwemu. Iki gikorwa gifise ikidodo c'ijuru, kizokwugururira urugi ukundi kuri guhambaye. Mw'ico gikorwa hariho ikibanza kw'uwo wese yipfuza gukorana ubwenge »¹³⁸.

*« Mu gihe umuvugabutumwa akwiragira hirya no hino, agenda ahura n'abantu benshi barwaye. Ategerezwa kugira ubumenyi nyabwo burabana n'ibitera indwara kandi akamenya n'ubuvuzi bwiyoheje kugira ngo ahumurize abababaye. Ikindi kandi, ategerezwa gusengana ukwizera n'ukwiyoroshya asengera abarwaye, mu kuberekeza ku muganga mukuru ».*¹³⁹

Umenye neza ko ubuvuzi kama ubwo aribwo bwose budafatikanije n'amasengesho akomeye asenganywe ukwizera ari igikorwa gipfuye, kuko ico coba ari igikorwa c'Imana gikorewe mu mubiri gusa¹⁴⁰.

¹³⁸ Ellen G. White, Service Chrétien, p. 166

¹³⁹ Ellen G. White, Service Chrétien, p. 164.

¹⁴⁰ Bibiliya Yera, Abikorinto 2: 10-15